



শ্রুত কণিকা ২০২২



বৃক্ষপ্রাণে প্রকৃতি - প্রতিবেশ
আগামী প্রজন্মের টেকসই বাংলাদেশ




বন অধিদপ্তর
পরিবেশ, বন ও জলবায়ু পরিবর্তন মন্ত্রণালয়

সূচীপত্র

বাংলাদেশের ভূমি ব্যবহার মানচিত্র ২০১৫	২
বাংলাদেশের বন	৩
পাহাড়ী বন	৩
শাল বন	৪
প্রাকৃতিক ম্যানগ্রোভ বন	৪
জলাভূমির বন	৫
সৃজিত উপকূলীয় বন	৬
উপকূলীয় বনায়নে অর্জিত সাফল্য	৬
জেলা ভিত্তিক বৃক্ষ আচ্ছাদন	৭
বন অধিদপ্তরের নার্সারী	৮
সামাজিক বনায়ন	৮
সামাজিক বনায়নে অর্জিত সাফল্য	১০
রক্ষিত এলাকায় সহ-ব্যবস্থাপনা কার্যক্রম এবং গুরুত্ব	১০
সামাজিক বনায়ন ও সহ-ব্যবস্থাপনায় নারীর ক্ষমতায়ন	১১
বার্ষিক কর্ম সম্পাদন চুক্তি	১২
রক্ষিত এলাকা সমূহ	১২
সোয়াচ অব নো-গ্রাউন্ড মেরিন প্রোটেক্টেড এরিয়া	১৪
সেন্টমার্টিন মেরিন প্রোটেক্টেড এরিয়া	১৪
বাংলাদেশের বন্যপ্রাণী ও জীববৈচিত্র্য	১৫
বাংলাদেশের বিলুপ্ত বন্যপ্রাণী	১৬
বন্যপ্রাণী দ্বারা আক্রান্ত মানুষের জান-মালের ক্ষতিপূরণ বিধিমালা, ২০২১	১৮
বন্যপ্রাণী সংরক্ষণে বিধিমালা ও নীতিমালা	১৯
বন্যপ্রাণী অপরাধ দমন ইউনিট	১৯
শেখ কামাল ওয়াইল্ডলাইফ সেন্টার	২৩
বাংলাদেশের প্রকৃতি ও প্রতিবেশ পর্যটন	২৫
সাফারী পার্ক	২৬
বঙ্গবন্ধু শেখ মুজিব সাফারী পার্ক, কবাজার	২৭
বঙ্গবন্ধু শেখ মুজিব সাফারী পার্ক, গাজীপুর	২৮
জলবায়ু পরিবর্তন-প্রেক্ষাপট বাংলাদেশ	৩০
বন সেক্টরের সাম্প্রতিক কার্যক্রম ও অগ্রগতি	৩০
প্রকল্প তালিকা	৩১
টেকসই বন ও জীবিকা (সুফল) প্রকল্প	৩৩
বাংলাদেশের ডলফিন সংরক্ষণে গৃহীত পদক্ষেপ সমূহ	৩৭
সুন্দরবনের বাঘ শুমারী	৩৮
বাংলাদেশ বন মহাপরিকল্পনা (২০১৭-২০৩৭)	৩৯
জাতীয় শুদ্ধাচার কৌশল	৩৯
বন অধিদপ্তরের উদ্ভাবনী দক্ষতা বৃদ্ধি ও নাগরিক সেবা	৪০
ই-নথি (অফিস ব্যবস্থাপনা)	৪০
বন সংরক্ষণ ও ব্যবস্থাপনায় জাতীয় ও আন্তর্জাতিক পুরস্কার	৪১
বৃক্ষরোপণে প্রধানমন্ত্রীর জাতীয় পুরস্কার	৪১
বঙ্গবন্ধু এওয়ার্ড ফর ওয়াইল্ডলাইফ কনজারভেশন	৪২
উদযাপিত আন্তর্জাতিক দিবস সমূহ	৪৩
বিভিন্ন আন্তর্জাতিক দিবস	৪৬
সংরক্ষিত বনভূমিতে বাস্তুচ্যুত মায়ানমার নাগরিক কর্তৃক বসতি স্থাপন, বনজ সম্পদ ও পরিবেশ ধ্বংসের তথ্যাদি	৪৭
East Asia Australasian Flyway Partnership (EAAFP) Sites in Bangladesh	৫২
কিছু গুরুত্বপূর্ণ তথ্য	৫৫
বর্তমান সরকারের গৃহীত কার্যক্রমের প্রেক্ষিতে বন অধিদপ্তরের অর্জন	৫৬
বন্যপ্রাণী ও বন্যপ্রাণী অপরাধ সম্পর্কিত কতিপয় প্রয়োজনীয় তথ্য	৫৭

বাংলাদেশের ভূমি ব্যবহার মানচিত্র ২০১৫



বাংলাদেশের বন

বাংলাদেশের আয়তন ১,৪৭,৫৭০ বর্গ কি.মি. এবং সরকার নিয়ন্ত্রিত বনভূমির পরিমাণ প্রায় ২৩ লক্ষ হেক্টর; যা দেশের মোট আয়তনের প্রায় ১৫.৫৮%। বন অধিদপ্তর নিয়ন্ত্রিত বনভূমির পরিমাণ প্রায় ১৬ লক্ষ হেক্টর; যা দেশের আয়তনের প্রায় ১০.৭৪%। বাংলাদেশের বৃক্ষ আচ্ছাদিত ভূমির পরিমাণ দেশের মোট আয়তনের ২২.৩৭%। ভৌগোলিক অবস্থান ও জলবায়ুর তারতম্যের কারণে বাংলাদেশে বিভিন্ন ধরনের বনাঞ্চল রয়েছে। যেমন- পাহাড়ী বন, প্রাকৃতিক ম্যানগ্রোভ বন, সৃজিত উপকূলীয় বন, শালবন, জলাভূমির বন ইত্যাদি।

পাহাড়ী বন

অবস্থান: চট্টগ্রাম, রাঙ্গামাটি, খাগড়াছড়ি, বান্দরবান, কক্সবাজার, সিলেট, মৌলভীবাজার এবং হবিগঞ্জের পাহাড়ী এলাকা।



পাহাড়ী বন

পরিমাণ: উল্লিখিত জেলাসমূহের সরকারি বন এবং পার্বত্য জেলার অশ্রেণিভুক্ত বনাঞ্চলসহ পাহাড়ী বনের পরিমাণ প্রায় ১৩ লক্ষ ৭৭ হাজার হেক্টর; যা দেশের আয়তনের ৯.৩৩%। বন অধিদপ্তর নিয়ন্ত্রিত পাহাড়ী বনভূমির পরিমাণ ৬ লক্ষ ৬৪ হাজার হেক্টর; যা দেশের আয়তনের ৪.৫৪% এবং বন বিভাগ নিয়ন্ত্রিত বনভূমির ৪৩%।

উদ্ভিদ প্রজাতি: গর্জন, চাপালিশ, তেলসুর, উড়িআম, ঢাকিজাম, সিভিট, সেগুন, গামার, চম্পা, জারুল, বৈলাম প্রভৃতি গাছ এ বনে পাওয়া যায়। এছাড়া এ বনাঞ্চলে প্রচুর পরিমাণে বাঁশ ও বেত পাওয়া যায়।

বন্যপ্রাণী: এ বনের উল্লেখযোগ্য বন্যপ্রাণী হচ্ছে হাতি, চিতাবাঘ, বন্যশুকর, হরিণ, হনুমান, বানর, উল্লুক, সজারু, বনরুই, ধনেশ, মথুরা, বনমোরগ, শকুন, অজগর, টিয়া, ময়না ইত্যাদি।

শাল বন

অবস্থান: এ বন মূলতঃ কুমিল্লা, গাজীপুর, টাঙ্গাইল, ময়মনসিংহ ও শেরপুর জেলায় অবস্থিত। তাছাড়া দেশের উত্তরাঞ্চলের দিনাজপুর, রংপুর, লালমনিরহাট, নওগাঁ, ঠাকুরগাঁও ও পঞ্চগড় জেলায় অল্প কিছু শাল বন রয়েছে।



গাজীপুরের শাল বন

পরিমাণ: এ বনের আয়তন প্রায় ১ লক্ষ ২০ হাজার হেক্টর; যা দেশের আয়তনের ০.৮১% এবং বন অধিদপ্তর নিয়ন্ত্রিত বনভূমির ৭%।

উদ্ভিদ প্রজাতি: এ বনের মূল প্রজাতি শাল (*Shorea robusta*) যা অনেকেই গজারী বলে জানেন। শুরু মৌসুমে (ফেব্রুয়ারি-মার্চ) শাল গাছের পাতা ঝরে যায় বলে একে পত্রঝরা বনও বলা হয়। এ ছাড়া এ বনে হরিতকি, বহেরা, কড়ই, শিমুল, অর্জুন ইত্যাদি প্রজাতির বৃক্ষ রয়েছে।

বন্যপ্রাণী: এ বনের উল্লেখযোগ্য বন্যপ্রাণীর মধ্যে রয়েছে মেছোবাঘ, বনবিড়াল, বানর, শিয়াল, সাপ, পাখি ইত্যাদি।

প্রাকৃতিক ম্যানগ্রোভ বন

অবস্থান: খুলনা, বাগেরহাট ও সাতক্ষীরা জেলায় অবস্থিত পৃথিবীর একক বৃহত্তম প্রাকৃতিক ম্যানগ্রোভ বন হচ্ছে আমাদের সুন্দরবন। বঙ্গোপসাগরের কোল ঘেঁষে এ বন অবস্থিত।



প্রাকৃতিক ম্যানগ্রোভ বন (সুন্দরবন)

পরিমাণ: এ বনের আয়তন প্রায় ৬ লক্ষ ১ হাজার ৭০০ হেক্টর; যা দেশের আয়তনের ৪.০৭% এবং বন অধিদপ্তর নিয়ন্ত্রিত বনভূমির ৩৮%।

উদ্ভিদ প্রজাতি: সুন্দরী, গেওয়া, গরাণ, কেওড়া, পশুর, বাইন, কাঁকড়া ইত্যাদি এ বনের প্রধান বৃক্ষ প্রজাতি।

বন্যপ্রাণী: এ বনের উল্লেখযোগ্য বন্যপ্রাণী হচ্ছে রয়েল বেঙ্গল টাইগার, হরিণ, বানর, শূকর, কুমির, অজগর ইত্যাদি।

নদী/খাল: এ বনের মধ্য দিয়ে প্রবাহিত প্রধান প্রধান নদীগুলো হলো- পশুর, শিবসা, বলেশ্বর, রায়মংগল ইত্যাদি। তাছাড়া শত শত খাল এ বনের মধ্যে জালের মতো ছড়িয়ে আছে।

মৎস্য সম্পদ: শুধু বৃক্ষসম্পদ নয়, এ বন মৎস্য সম্পদেরও এক বিরাট আধার। এ বনে ইলিশ, লইট্যা, ছুরি, পোয়া, রূপচাঁদা, ভেটকি, পারসে, চিংড়ি, চিত্রা ইত্যাদি মাছ ও কাঁকড়া পাওয়া যায়।

বিশ্ব ঐতিহ্য: সুন্দরবনের ৩টি বন্যপ্রাণী অভয়ারণ্য নিয়ে গঠিত ১ লক্ষ ৩৯ হাজার ৭০০ হেক্টর বনাঞ্চলকে ইউনেস্কো ১৯৯৭ সালে বিশ্ব ঐতিহ্য হিসেবে ঘোষণা করেছে।

জলাভূমির বন

অবস্থান: সিলেট ও সুনামগঞ্জ জেলার হাওড় ও বিল জুড়ে এ বন বিস্তৃত। রাতারগুল দেশের অন্যতম একটি দৃষ্টিনন্দন জলাভূমির বন। সিলেট জেলার গোয়াইনঘাট উপজেলায় এ বন অবস্থিত।



রাতারগুলের জলাভূমির বন, সিলেট

পরিমাণ: রাতারগুলের আয়তন ২০৪.২৫ হেক্টর; যা দেশের আয়তনের ০.০১%।

উদ্ভিদ প্রজাতি: এ বনের প্রধান বৃক্ষ প্রজাতিসমূহ হলো- হিজল, করচ, পিটালী, বরুণ ইত্যাদি। বছরের প্রায় অর্ধেক সময় এ বনের গাছ পানিতে আংশিক ডুবে থাকে।

বন্যপ্রাণী: বানর, মেছোবাঘ, ভোঁদড়, কাঠবিড়ালী, সাপ, পাখি ইত্যাদি।

মৎস্য সম্পদ: এ বন মিঠা পানির মাছের আবাসস্থল ও প্রজননের জন্য অত্যন্ত গুরুত্বপূর্ণ।

সৃজিত উপকূলীয় বন

অবস্থান: নোয়াখালী, লক্ষ্মীপুর, ভোলা, পটুয়াখালী, বরগুনা, পিরোজপুর, চট্টগ্রাম এবং কক্সবাজার জেলার উপকূলীয় এলাকা। উপকূলীয় এলাকায় জেগে উঠা চরভূমিতে ১৯৬৫ সাল থেকে এ বন সৃজন করা হচ্ছে। এ বনকে প্যারা বনও বলা হয়। এ বন ঘূর্ণিঝড় ও জলোচ্ছ্বাসের তীব্রতা হতে উপকূলীয় এলাকার জান-মাল রক্ষা করে। এ বন জেগে ওঠা চরভূমিকে স্থিতিশীল ও দৃঢ় করে কৃষি কাজসহ অন্যান্য উন্নয়নমূলক কাজের জন্য উপযোগী করে তোলে।



সৃজিত উপকূলীয় বন

পরিমাণ: পরিমাণঃ এ বনের আয়তন প্রায় ২ লক্ষ ২৭ হাজার ৬ শত ৭০ হেক্টর; যা দেশের আয়তনের ১.৫৪% এবং বন অধিদপ্তর নিয়ন্ত্রিত বনভূমির ১৪.২৩%।

উদ্ভিদ প্রজাতি: কেওড়া, ছৈলা, গেওয়া, কাকড়া, বাইন, ধুন্দল, পশুর, সুন্দরী, গোলপাতা ইত্যাদি। প্রাকৃতিক ম্যানগ্রোভ বনের মতো এ বনও জোয়ার-ভাটায় প্লাবিত হয়।

বন্যপ্রাণী: হরিণ, মেছোবাঘ, কুমির, শূকর, শিয়াল, বানর, বনবিড়াল, বালিহাঁস ইত্যাদি।

মৎস্য সম্পদ: এ বন উপকূলীয় মৎস্য ভান্ডারেরও একটি বিরাট উৎস। এখানে ভেটকি, লইট্যা, পারসে, চিংড়ি ইত্যাদি মাছ ও কাঁকড়া পাওয়া যায়।

উপকূলীয় বনায়নে অর্জিত সাফল্য

বাংলাদেশ বিশ্বে সর্বপ্রথম উপকূলীয় চরাঞ্চলে সফল বনায়নকারী দেশ। বন বিভাগ ষাটের দশক থেকে উপকূলীয় অঞ্চলে জেগে ওঠা চরে বনায়ন শুরু করেছে। উপকূলীয় চরে বনায়ন প্রক্রিয়ায় বনজ সম্পদ সৃষ্টির পাশাপাশি উপকূলবাসীকে প্রাকৃতিক দুর্যোগের ক্ষতিকর প্রভাব থেকে সুরক্ষা করেছে এবং সাগর থেকে ভূমি জেগে ওঠাসহ দৃঢ় করণ প্রক্রিয়াকে ত্বরান্বিত করেছে। জলবায়ু পরিবর্তনের সাথে অভিযোজন এবং এর নেতিবাচক প্রভাব হ্রাসে ঘূর্ণিঝড় এবং জলোচ্ছ্বাস প্রতিরোধে সবুজ বেষ্টিনী হিসেবে কাজ করেছে; সেই সাথে দেশে কার্বন মজুদ বৃদ্ধি পেয়েছে। উপকূলীয় বনায়ন বন্যপ্রাণীর অভয়াশ্রম ও মৎস্যসমূহের প্রজনন ক্ষেত্র তৈরি করেছে।

- ❖ বনায়নের মাধ্যমে বঙ্গোপসাগর থেকে ১ হাজার ৬৮০ বর্গকিলোমিটার আয়তনের ভূমি দেশের মূল ভূ-খন্ডের সাথে যুক্ত হয়েছে।
- ❖ উপকূলীয় চরাঞ্চলে এ যাবৎ ২ হাজার ২৭৬.৭ বর্গ কি.মি. চর বনায়ন করা হয়েছে, যা উপকূলবাসীকে ঝড়, জলোচ্ছ্বাস ও নদীভাঙ্গন-এর মতো প্রাকৃতিক দুর্যোগের কবল থেকে রক্ষা করে আসছে।

- ❖ উপকূলীয় চর বনায়নের প্রভাবে উপকূলীয় বনের ভূমি স্থায়িত্ব অর্জন করায় উপকূলের ১ লক্ষ ১২ হাজার ৬৩ একর জমি শস্য উৎপাদনের লক্ষে ভূমি মন্ত্রণালয়ে ফেরৎ প্রদান করা হয়েছে।

জেলা ভিত্তিক বৃক্ষ আচ্ছাদন

বন অধিদপ্তর ও যুক্তরাষ্ট্রের মেরিল্যান্ড বিশ্ববিদ্যালয় এর যৌথ গবেষণায় ২০১৪ সালের Landsat স্যাটেলাইট ইমেজ (Image Resolution 30m) এর তথ্য বিশ্লেষণ করে বাংলাদেশের জেলা ভিত্তিক বৃক্ষ আচ্ছাদনের পরিমাণ নিরূপণ করা হয়। নিম্নে তার তথ্য উপস্থাপন করা হল:

জেলা	বৃক্ষ আচ্ছাদন% (বর্গ কিঃ মিঃ)	বৃক্ষ আচ্ছাদন %	জেলা	বৃক্ষ আচ্ছাদন ২০১৪ (বর্গ কিঃ মিঃ)	বৃক্ষ আচ্ছাদন %
বাগেরহাট	২১০১.৫৫	৫০.৪৪	লালমনিরহাট	১২১.৯৯	৯.৮৪
বান্দরবান	৩৪০৩.৪৬	৭৩.৬৭	মাদারীপুর	১০৪.৫৪	৯.২৪
বরগুনা	৩০৬.৭৪	১৭.৯২	মাগুরা	১৭৫.৪৮	১৬.৮২
বরিশাল	৫৬৬.১১	২২.০৮	মানিকগঞ্জ	১৪৫.২৬	১০.৪৩
ভোলা	৬৬৩.৬৫	১৭.৫২	মৌলভীবাজার	৯০১.৩৫	৩৩.৩২
বগুড়া	২৬৭.৬০	৯.১৩	মেহেরপুর	৯০.৭৫	১২.৮৪
ব্রাহ্মণবাড়িয়া	১৩৪.৭২	৬.৯৪	মুন্সিগঞ্জ	৫০.২১	৫.৩৭
চাঁপাইনবাবগঞ্জ	২৩৯.৮৬	১৪.৩৭	ময়মনসিংহ	৮২০.৬৮	১৮.৯৪
চাঁদপুর	৩৪১.৫১	১৯.৯৩	নওগাঁ	১৫৭.১৫	৪.৫৯
চট্টগ্রাম	১৫৭২.৭৯	২৬.৮৪	নড়াইল	১০৫.৬৯	১০.৬৯
চুয়াডাঙ্গা	১৭৫.০৯	১৫.২৩	নারায়ণগঞ্জ	৪৩.০৯	৬.০৮
কুমিল্লা	৪১৬.৬৪	১৩.৩৬	নরসিংদী	৩৩৬.৬০	২৮.৯৮
কক্সবাজার	৬১৫.৫৭	২০.২৮	নাটোর	২৬২.৯১	১৩.৮১
ঢাকা	১৬৪.৪৩	১১.১৮	নেত্রকোনা	২৫৮.৫৮	৯.২৫
দিনাজপুর	১৫০.২১	৪.৩৫	নীলফামারী	১১১.১২	৬.৯৭
ফরিদপুর	২৫০.২০	১২.৩৩	নোয়াখালী	৫৪১.৮৪	১২.৬৫
ফেনী	২০৬.৯৭	২২.৩৪	পাবনা	২৬৮.৯২	১১.৩২
গাইবান্ধা	১৮১.২৭	৮.৪৪	পঞ্চগড়	৬৪.৬৯	৪.৬৪
গাজীপুর	৬১৫.৮৩	৩৩.৯২	পটুয়াখালী	৪৬৩.০৩	১৩.৩৪
গোপালগঞ্জ	১০৬.৩৬	৭.১৮	পিরোজপুর	৪৫২.৫১	৩৫.৫৩
হবিগঞ্জ	৪২৭.৩২	১৬.৩৭	রাজবাড়ী	১৫৫.৮০	১৩.৬৬
জামালপুর	২১৮.১৯	১০.৬১	রাজশাহী	২৬৩.৫৯	১০.৮৯
যশোর	৫৮৬.৯৯	২২.৯২	রাঙ্গামাটি	৪০১৪.৩৩	৭০.২৬
ঝালকাঠি	২৬৩.৮১	৩৫.৫০	রংপুর	২৮১.৭২	১১.৯৪
ঝিনাইদহ	৩৫৫.৯৬	১৮.২১	সাতক্ষীরা	১৩৩১.৩৮	৩৩.৬১
জয়পুরহাট	৬২.৬৭	৬.৩২	শরীয়তপুর	১৩৭.৯৮	১১.৪৯
খাগড়াছড়ি	১৯৮৬.৭৬	৬৭.৩১	শেরপুর	১৭৯.৯১	১৩.৭২
খুলনা	১৮০৯.৫১	৪০.৯১	সিরাজগঞ্জ	২২১.৬৪	৮.৮৩
কিশোরগঞ্জ	৩১৬.০২	১২.৩২	সুনামগঞ্জ	১৭৩.৯৫	৪.৭৫
কুড়িগ্রাম	২৩৬.২৭	১০.৩২	সিলেট	৬০১.৮৪	১৭.৫২
কুষ্টিয়া	২৫০.৪০	১৫.৩৬	টাঙ্গাইল	৭০৯.৭১	২১.০৩
লক্ষ্মীপুর	৪৩৮.৮০	২৯.২১	ঠাকুরগাঁও	৩০.৪৯	১.৭০
বৃক্ষ আচ্ছাদনের মোট ভূমির পরিমাণ				৩৩০১২	২২.৩৭

বন অধিদপ্তরের নার্সারী

বন অধিদপ্তরের আওতায় দেশের ৬৪টি জেলার মধ্যে ৬১টি জেলায় মোট ১০১টি এস,এফ,এন,টি,সি (সামাজিক বনায়ন নার্সারী ও প্রশিক্ষণ কেন্দ্র) এবং ৩১২টি উপজেলায় এস,এফ,পি,সি (উপজেলা সামাজিক বনায়ন কেন্দ্র) রয়েছে। বন বিভাগে বিদ্যমান এ ৪১৩টি নার্সারীতে বিভিন্ন বনজ, ফলজ, ঔষধি, শোভাবর্ধনকারী ও বিলুপ্তপ্রায় গাছের চারা উত্তোলন করতঃ সরকারী মূল্যে বিক্রয় করা হয়ে থাকে। ২০২০-২০২১ অর্থ বছরে এসকল নার্সারীতে বিক্রয়/বিতরণের জন্য ৩১,০৬,২৫০ টি চারা উত্তোলন করা হয়েছে। উল্লেখ্য যে, ২০০২ সাল হতে ২০২০-২০২১ অর্থিক সাল পর্যন্ত সারা দেশে ব্যাপক বনায়নের লক্ষ্যে বন অধিদপ্তরের বিভিন্ন নার্সারী কর্তৃক ১১ কোটি ১৫ লক্ষ ৯১ হাজার ২৫০ টি বিবিধ প্রজাতির বনজ, ফলদ, ঔষধি, শোভাবর্ধনকারী ও বিলুপ্তপ্রায় গাছের চারা উত্তোলন পূর্বক সরকারী স্বল্প মূল্যে বিক্রয়/বিতরণ করা হয়েছে। তদরূপ ২০২১-২০২২ অর্থ বছরে বন অধিদপ্তরের ৪১৩টি নার্সারীতে বিক্রয় ও বিতরণের জন্য বিভিন্ন প্রজাতির বনজ, ফলদ, ঔষধি, শোভাবর্ধনকারী ও বিলুপ্তপ্রায় উদ্ভিদের ২৩ লক্ষটি চারা উত্তোলন করা হয়েছে; যার বিক্রয়/বিতরণ কার্য চলমান রয়েছে। অর্থাৎ ২০০২ সাল হতে ২০২১-২০২২ অর্থ বছর পর্যন্ত বন অধিদপ্তরের বিভিন্ন নার্সারীতে ১১ কোটি ৩৮ লক্ষ ৯১ হাজার ২ শত ৫০ টি বিভিন্ন প্রজাতির চারা উত্তোলন করা হয়েছে।

সামাজিক বনায়ন

সামাজিক বনায়ন হলো স্থানীয় দরিদ্র জনগণকে উপকারভোগী হিসেবে সম্পৃক্ত করে পরিচালিত বনায়ন কার্যক্রম। ভূমিহীন, দরিদ্র, বিধবা ও দুর্দশাগ্রস্ত গ্রামীণ জনগণের সামাজিক ও অর্থনৈতিক সুবিধা নিশ্চিত করাই সামাজিক বনায়নের প্রধান লক্ষ্য। সামাজিক বনায়নের মূল উদ্দেশ্য হলো দরিদ্র জনগোষ্ঠীর কর্মসংস্থানের সুযোগ সৃষ্টি করে তাদের স্বনির্ভর হতে সহায়তা করা এবং তাদের খাদ্য, পশুখাদ্য, জ্বালানী, আসবাবপত্র ও মূলধনের চাহিদা পূরণ করা। নার্সারী সৃজন, প্রান্তিক ও পতিত ভূমিতে বৃক্ষরোপণ করে বনজ সম্পদ সৃষ্টি, মরুময়তা রোধ, ক্ষয়িষ্ণু বনাঞ্চল রক্ষা ও উৎপাদন বৃদ্ধি, পরিবেশ উন্নয়ন ও জীববৈচিত্র্য সংরক্ষণ, নারীর ক্ষমতায়ন ও নেতৃত্ব সৃষ্টি এবং সর্বোপরি কর্মসংস্থান সৃষ্টি ও দারিদ্র্যতা নিরসনে সামাজিক বনায়ন গুরুত্বপূর্ণ ভূমিকা রাখছে।



সামাজিক বন বিভাগ, দিনাজপুর এর সামাজিক বনায়ন কর্মকাণ্ড

বাংলাদেশে সামাজিক বনায়ন গ্রামীণ জনপদে আর্থ-সামাজিক উন্নয়ন ও দারিদ্র্য বিমোচনে এক নতুন দিগন্তের সূচনা করেছে। সেই সাথে সামাজিক বনায়ন পরিবেশের ভারসাম্য রক্ষা, জলবায়ু পরিবর্তনের অভিঘাত প্রশমন ও অভিযোজন এবং জীববৈচিত্র্য সংরক্ষণে গুরুত্বপূর্ণ ভূমিকা রাখছে। বন বিভাগ ১৯৬০-এর দশকে বন সম্প্রসারণ কার্যক্রমের মাধ্যমে সর্বপ্রথম বনায়ন কর্মসূচি বনাঞ্চলের বাইরে জনগণের কাছে নিয়ে যায়। অতঃপর ১৯৮১-৮২ সাল হতে উত্তরবঙ্গের সরকারি বনভূমিতে বনায়নের জন্য বৃহত্তর ৭টি জেলায় কমিউনিটি উন্নয়ন প্রকল্পের মাধ্যমে জনগণের অংশগ্রহণে অংশীদারিত্বমূলক সামাজিক বনায়নের প্রচলন করে। সরকার ২০০০ সালে সামাজিক বনায়ন কার্যক্রমকে ১৯২৭ সালের বন আইনে অন্তর্ভুক্তির মাধ্যমে আইনি কাঠামোতে নিয়ে আসে। সামাজিক বনায়নকে আরও শক্তিশালী করার জন্য সরকার ২০০৪ সালে সামাজিক বনায়ন বিধিমালা প্রবর্তন করে। এ বিধিমালা-কে আরো যুগোপযোগী ও কার্যকর করার লক্ষ্যে ২০১০ ও ২০১১ সালে উহাতে সংশোধনী আনা হয়। সংশোধিত বিধিমালায় সরকারি বনভূমিতে বনায়নের জন্য স্থানীয় জনগোষ্ঠীর বিনিয়োগের সুযোগ সৃষ্টি করা হয়েছে। উল্লেখ্য যে, ২০২১ সালে সামাজিক বনায়ন বিধিমালা ২০০৪ (২০১০ - ২০১১ সনে সংশোধিত)-এর অধিকতর সংশোধনী প্রস্তাব, ২০২১ পরিবেশ, বন ও জলবায়ু পরিবর্তন মন্ত্রণালয়ে প্রেরিত হয়েছে। যার যাচাই-বাছাইয়ের কার্যক্রম চলমান রয়েছে।

আবর্তকাল ও উপকারভোগী নির্বাচন

সামাজিক বনায়নের আওতায় সৃজিত বাগানের আবর্তকাল ন্যূনতম ১০ বছর। সৃজিত স্ট্রিপবাগানে প্রতি কিলোমিটারে সর্বনিম্ন ৫ জন এবং উডলট/ব্লক বাগান/বাফারজোন/এগ্রোফরেস্ট/উপকূলীয় চরভূমি/ফোরশোর ইত্যাদি বাগানে প্রতি হেক্টরে ১ জন হিসেবে উপকারভোগী সম্পৃক্ত করা হয়। অধিকাংশ উপকারভোগী সৃজিত উডলট ও কৃষি বন বাগানে অন্তর্বর্তীকালীন ফসল হিসেবে আদা, হলুদ, আনারস, গম, চীনাবাদাম, কচু, লেবু, সবজি এবং ঔষধি গাছপালা ও অন্যান্য ফসল চাষ করে লাভবান হয়। অংশীদারিত্বমূলক লভ্যাংশ বন্টন চুক্তিনামা অনুযায়ী সামাজিক বন থেকে প্রথম ৭ বছর পর্যন্ত প্রুনিং ও থিনিং কালে কর্তৃত বৃক্ষ, ফলদ বৃক্ষের ফল, উৎপাদিত কৃষি ফসল ইত্যাদি থেকে প্রাপ্ত সকল আয় সম্পূর্ণরূপে উপকারভোগীগণ পেয়ে থাকেন এবং আবর্তকাল শেষে বৃক্ষ কর্তন পূর্বক লভ্যাংশ চুক্তিনামা (PBSA) অনুযায়ী উপকারভোগীদের মাঝে বন্টন করা হয়।



মাননীয় প্রধানমন্ত্রী কর্তৃক সামাজিক বনায়নের উপকারভোগীদের মধ্যে লভ্যাংশের চেক বিতরণ

সামাজিক বনায়নে অর্জিত সাফল্য

- ▶ সামাজিক বনায়নের আওতায় ১৯৮১-১৯৮২ হতে ২০২০-২০২১ অর্থবছর পর্যন্ত মোট ১ লক্ষ ২ হাজার ৩৩৯.২৮ হেক্টর ব্লক/উডলট এবং ৭৬ হাজার ৬৫২.৭৬ কিলোমিটার স্ট্রীপ বাগান সৃজন করা হয়েছে। উল্লেখ্য, ২০২১-২০২২ অর্থ বছরে বন অধিদপ্তর কর্তৃক সারাদেশে ৭৫০০ হেক্টর ব্লক বাগান ও ১০০০ সিডলিং কিলোমিটার স্ট্রীপ বাগান সৃজনের লক্ষ্যমাত্রা নির্ধারণ করা হয়েছে; যার কার্যক্রম চলমান রয়েছে।
- ▶ সৃজিত বাগানে ৭ লক্ষ ২৬ হাজার ৬৫৪ জন উপকারভোগী সম্পৃক্ত করা হয়েছে। তন্মধ্যে মহিলা উপকারভোগীর সংখ্যা ১ লক্ষ ৪০ হাজার ৮৬৫ জন।
- ▶ সামাজিক বনায়নের মাধ্যমে সৃজিত বাগান সমূহ হতে মোট ৪৮ হাজার ২৯৭ হেক্টর ব্লক/উডলট এবং ২১ হাজার ৫৫৭ কিলোমিটার স্ট্রীপ বাগান কর্তন করা হয়েছে। যার বিক্রয় মূল্য মোট ১৪৬৫ কোটি ৯৭ লক্ষ ৫২ হাজার ১৫৭ টাকা মাত্র।
- ▶ এয়াবৎ ২ লক্ষ ২২ হাজার ৯৯৪ জন উপকারভোগীর মাঝে মোট ৪১১ কোটি ৫২ লক্ষ ৬৭ হাজার ৯০১ টাকা মাত্র বিতরণ করা হয়েছে।
- ▶ ২০২০-২১ অর্থ বছর পর্যন্ত পুনঃবনায়ন কার্য সম্পাদনের নিমিত্ত বৃক্ষরোপণ তহবিলে (টিএফএফ) মোট ১১৩ কোটি ১৪ লক্ষ ৮০ হাজার ৭৯৯ টাকা জমা করা হয়েছে।
- ▶ এয়াবৎ সামাজিক বনায়নের মাধ্যমে সরকারের অর্জিত রাজস্ব আয়ের পরিমাণ মোট ৫৪০ কোটি ১৮ লক্ষ ৯৭ হাজার ৯৩৮ টাকা মাত্র।
- ▶ ভূমি মালিক ও ইউনিয়ন পরিষদসহ অন্যান্য অংশীজনের মধ্যে বিতরণকৃত টাকার পরিমাণ মোট ২১৯ কোটি ২৬ লক্ষ ৩৩ হাজার ২৪৮ টাকা মাত্র।

রক্ষিত এলাকায় সহ-ব্যবস্থাপনা কার্যক্রম এবং গুরুত্ব

বন্যপ্রাণী (সংরক্ষণ ও নিরাপত্তা) আইন, ২০১২ এর ধারা ২(৩১) অনুসারে “সহ-ব্যবস্থাপনা” অর্থ কোনো একটি এলাকার প্রাকৃতিক সম্পদ ব্যবস্থাপনার ক্ষেত্রে সংশ্লিষ্ট সকল অংশীজনের মধ্যে ঐক্যমতের ভিত্তিতে উক্ত সম্পদের পরিচালনা বা রক্ষণাবেক্ষণের জন্য অংশীদারিত্বের মাধ্যমে সকল পক্ষের সক্রিয় অংশগ্রহণ নিশ্চিতকরণ বুঝায়।

প্রাকৃতিক সম্পদ ব্যবস্থাপনায় দীর্ঘকালের চলে আসা প্রথাগত পদ্ধতির নানা দুর্বলতা দূর করে বিশ্বের বিভিন্ন দেশে (বিশেষতঃ উন্নয়নশীল বিশ্বে) প্রাকৃতিক সম্পদ রক্ষায় সহ-ব্যবস্থাপনা পদ্ধতি আশার সঞ্চার করেছে এবং প্রাকৃতিক সম্পদ ব্যবস্থাপনায় এ পদ্ধতি আদর্শ একটি মডেল হিসেবে স্বীকৃতি লাভ করেছে। বাংলাদেশ বন বিভাগ ও ইউএসআইডি যৌথ উদ্যোগে নিসর্গ সহায়তা প্রকল্প (২০০৪-২০০৮) এর মাধ্যমে ৫টি রক্ষিত এলাকায়, সমন্বিত রক্ষিত এলাকা সহ-ব্যবস্থাপনা প্রকল্প বা আইপ্যাক প্রকল্প (২০০৮-২০১৩) এর মাধ্যমে ১৮টি রক্ষিত এলাকায় এবং জলবায়ু-সহিষ্ণু প্রতিবেশ ও জীবিকা বা ফ্রেল প্রকল্প (২০১৩-২০১৮) এর মাধ্যমে ২২টি রক্ষিত এলাকায় সহ-ব্যবস্থাপনা পদ্ধতি চালু করা হয়। রক্ষিত এলাকার জীববৈচিত্র্য সংরক্ষণ এবং প্রতিবেশ ব্যবস্থার টেকসই উন্নয়ন ও সুশাসন নীতির ভিত্তিতে স্বচ্ছ ও জবাবদিহিতামূলক ন্যায় ভিত্তিক অংশীদারিত্বমূলক বন্টন ব্যবস্থা নিশ্চিত করতে একটি অর্জনযোগ্য পরিকল্পনা প্রণয়ন ও এর সুষ্ঠু বাস্তবায়ন আবশ্যিক। সহ-ব্যবস্থাপনার মাধ্যমে স্থানীয় জনগোষ্ঠী, সম্পদ ব্যবহারকারী ও অন্যান্য অংশীজন সরকারের পাশাপাশি সম্পদ ব্যবস্থাপনায় প্রয়োজনীয় পরিকল্পনা প্রণয়ন, সিদ্ধান্ত গ্রহণ ও সুষ্ঠু বাস্তবায়নে গুরুত্বপূর্ণ ভূমিকা পালন করে।

বাংলাদেশের রক্ষিত এলাকা জীববৈচিত্র্য সংরক্ষণের পাশাপাশি বন নির্ভর জনগোষ্ঠীর জীবিকায়ন, ক্ষুদ্র নৃতাত্ত্বিক জনগোষ্ঠীর বাসস্থান ও খাদ্যের উৎস এবং দেশী-বিদেশী পর্যটকদের কাছে আকর্ষণীয় পর্যটন এলাকা হিসাবে গুরুত্বপূর্ণ। উপকূলীয় জনগোষ্ঠীকে প্রাকৃতিক দুর্যোগ থেকে রক্ষা, বিপন্ন উদ্ভিদ



রক্ষিত এলাকায় সহ-ব্যবস্থাপনা কার্যক্রম

ও প্রাণীকূলের আবাসস্থল এবং দেশের গুরুত্বপূর্ণ জীববৈচিত্র্য সমৃদ্ধ এলাকা হিসেবেও রক্ষিত এলাকার গুরুত্ব অপরিসীম। জনসংখ্যাবৃদ্ধি, দারিদ্র্য, জ্বালানীকাঠ সংগ্রহ, অবৈধভাবে গাছকর্তন, বন বিভাগের পর্যাপ্ত জনবলের অভাব, গবাদি পশুর বিচরণ, বনে আগুন এবং সর্বোপরি বনভূমি কৃষি ও জনবসতিতে পরিনত হওয়ায় বাংলাদেশের রক্ষিত এলাকা সমূহ হুমকির সম্মুখীন।

এ প্রেক্ষাপটে ২০০৩ সালে বাংলাদেশ সরকারের বনবিভাগ পাঁচটি রক্ষিত এলাকায় আটটি সহ-ব্যবস্থাপনা কমিটির মাধ্যমে সহ-ব্যবস্থাপনা কার্যক্রম গ্রহণ করে। এর ধারাবাহিকতায়, ২০১৫ পর্যন্ত বনবিভাগ নিসর্গ সহায়তা প্রকল্প (NSP, ২০০৩-২০০৮), সমন্বিত রক্ষিত এলাকা সহ-ব্যবস্থাপনা প্রকল্প (IPAC, ২০০৮-২০১৩) এবং ক্লাইমেট রেজিলিয়েন্ট ইকোসিস্টেমস্ এন্ড লাইভলি হুডস্ প্রকল্প (CREL, ২০১৩-২০১৮) এর মাধ্যমে ২২টি রক্ষিত এলাকায় ২৮ টি সহ-ব্যবস্থাপনা কমিটি গঠন করে। কিন্তু আর্থিক প্রতিবন্ধকতা, স্থানীয় প্রভাবশালী ও রাজনীতিবিদদের প্রভাব, প্রকল্প নির্ভরতা এবং প্রাতিষ্ঠানিক কাঠামোর দুর্বলতার কারণে সহ-ব্যবস্থাপনা কার্যক্রম এখনও আশানুরূপ ভূমিকা রাখতে পারেনি। সরকার ইতোমধ্যে রক্ষিত এলাকা ব্যবস্থাপনা বিধিমালা ২০১৭ অনুমোদন এবং সহ-ব্যবস্থাপনার একটি পূর্ণাঙ্গ রূপরেখা প্রণয়ন করেছে, যার সফল বাস্তবায়নে জীববৈচিত্র্য সংরক্ষণ ও বন নির্ভর জনগোষ্ঠীর জীবন-মানের উন্নয়ন হবে। বিশ্বব্যাংকের অর্থায়নে চলমান টেকসই বন ও জীবিকা (সুফল) প্রকল্প (২০১৯-২০২৩) এর আওতায় সহ-ব্যবস্থাপনা কার্যক্রমকে শক্তিশালী করণ ও নুতন রক্ষিত এলাকায় সম্প্রসারণের মাধ্যমে দেশের জীববৈচিত্র্য সংরক্ষণে কার্যকর ভূমিকা রাখবে।

সামাজিক বনায়ন ও সহ-ব্যবস্থাপনায় নারীর ক্ষমতায়ন

সামাজিক বনায়নে নার্সারিতে চারা উৎপাদন, পরিচর্যা, বাগান পরিচর্যা ইত্যাদি কার্যক্রমে নারীদের অংশগ্রহণের সুযোগ সৃষ্টি এবং আত্মনির্ভরশীল করা হয়ে থাকে। এছাড়া সামাজিক বনায়ন বিধিমালা (২০০৮) অনুযায়ী ৩০% দুঃস্থ নারী উপকারভোগী হওয়ায় সুযোগ পেয়ে থাকেন। স্থানীয় জনগোষ্ঠীর উদ্যোগে গৃহীত সামাজিক বনায়ন কার্যক্রমের ক্ষেত্রে ব্যবস্থাপনা কমিটির সদস্যদের অন্ততঃ দুইজন নারী থাকেন। বিধি ৭ এর (১) উপবিধিতে চুক্তির আওতায় উপকারভোগীর দায়িত্ব, কর্মব্যবস্থাপনা এবং সুবিধা এর ক্ষেত্রে স্ত্রী ও স্বামীকে সমান অধিকার অর্পণ করা হয়েছে। সামাজিক বনায়নের প্রশিক্ষণের ক্ষেত্রে ৫০% নারীকে অংশগ্রহণের সুযোগ দেয়া হয়ে থাকে। রক্ষিত এলাকা সহ-ব্যবস্থাপনা বিধিমালা ২০১৭ অনুযায়ী গ্রাম সংরক্ষণ দল, পিপলস্ ফোরাম, সহ-ব্যবস্থাপনা সাধারণ ও নির্বাহী কমিটির প্রতিটি পর্যায়ে এবং দাপ্তরিক পদমর্যাদায় নারীর অবস্থানকে নিশ্চিত করা হয়েছে। তাছাড়া বৃক্ষরোপণে প্রধানমন্ত্রীর জাতীয় পুরস্কার প্রদানের ক্ষেত্রে নীতিমালা অনুযায়ী নারীদের অগ্রাধিকার দিয়ে বৃক্ষরোপণে উৎসাহিত করা হয়ে থাকে।



সংযোগ সড়ক বনায়নে নারী

বার্ষিক কর্ম সম্পাদন চুক্তি

সরকার ২০৪১ সালরে মধ্যে বাংলাদেশকে উন্নত রাষ্ট্র হিসেবে বিনির্মাণে দৃঢ় প্রতিজ্ঞ এবং সুশাসন সুসংহতকরণে সচেষ্ট। সে লক্ষ্য বাস্তবায়নে একটি কার্যকর, দক্ষ এবং গতিশীল প্রশাসনিক ব্যবস্থা একান্ত অপরিহার্য মর্মে সরকার মনে করে। এর পরিপ্রেক্ষিতে স্বচ্ছতা ও দায়বদ্ধতা বৃদ্ধি, সম্পদের যথাযথ ব্যবহার নিশ্চিতকরণ এবং প্রাতিষ্ঠানিক সক্ষমতা উন্নয়নের জন্য ২০১৪-২০১৫ অর্থ বছরে ৪৮টি মন্ত্রণালয়/বিভাগের সঙ্গে বার্ষিক কর্মসম্পাদন চুক্তি স্বাক্ষরের মাধ্যমে কর্মসম্পাদন ব্যবস্থাপনা পদ্ধতি চালু হয়েছে। ২০১৫-২০১৬ অর্থ বছরে ৪৮টি মন্ত্রণালয়/বিভাগ এবং এর আওতাধীন দপ্তর/সংস্থাসমূহের সঙ্গে বার্ষিক কর্মসম্পাদন চুক্তি স্বাক্ষরিত হয়েছে। ২০১৬-২০১৭ অর্থ বছরে মন্ত্রণালয়/বিভাগ, আওতাধীন দপ্তর/সংস্থার পাশাপাশি বিভাগীয়/আঞ্চলিক ও জেলা পর্যায়ে কার্যালয়সমূহের সঙ্গেও বার্ষিক কর্মসম্পাদন চুক্তি স্বাক্ষরিত হয়েছে। ২০১৭-২০১৮ অর্থ বছরে ৫১ টি মন্ত্রণালয়/বিভাগ, আওতাধীন দপ্তর/সংস্থা এবং জেলা পর্যায়ের কার্যালয়সমূহের পাশাপাশি উপজেলা পর্যায়ের কার্যালয়সমূহ পর্যন্ত বার্ষিক কর্মসম্পাদন চুক্তি স্বাক্ষরিত হয়েছে। বন অধিদপ্তর ২০১৪-২০১৫ অর্থ বছর থেকে বার্ষিক কর্মসম্পাদন চুক্তি স্বাক্ষরের মাধ্যমে কার্যক্রম বাস্তবায়ন করে আসছে। ২০২০-২০২১ অর্থ বছরে দেশের অর্থনৈতিক উন্নয়ন, কর্মসংস্থান, দারিদ্র্য বিমোচন, প্রাকৃতিক বিপর্যয় রোধ এবং পরিবেশের ভারসাম্য রক্ষাকল্পে বন অধিদপ্তর কর্তৃক ১৫,৭০১ হেক্টর ব্লক বাগান, ১০,৪৭০ হেক্টর ম্যানগ্রোভ বাগান এবং ১৮২০.৪০ কিলোমিটার স্ট্রীপ বাগান সৃজন করা হয়েছে। এছাড়াও সামাজিক বনায়নে সম্পৃক্ত উপকারভোগীসহ ভূমি মালিক সংস্থা এবং ইউনিয়ন পরিষদ-কে পূর্বেকার বকেয়াসহ এ অর্থ বৎসরে ৪৪ কোটি ৪৮ লক্ষ ৪২ হাজার টাকা লভ্যাংশ বিতরণ করা হয়েছে। বনায়নের বর্নিত লক্ষ্য ও উদ্দেশ্য পূরণকল্পে ২০২১-২০২২ অর্থ বছরে বন অধিদপ্তরের অধিক্ষেত্রে ১০২৭০ হেক্টর ম্যানগ্রোভ বাগান সৃজিত হয়েছে। এছাড়াও ৭৫০০ হেক্টর ব্লক বাগান ও ১০০০ সিডলিং কিলোমিটার স্ট্রীপ বাগান সৃজনের কার্যক্রম চলমান রয়েছে।

রক্ষিত এলাকা সমূহ (জানুয়ারি ২০২২ সাল পর্যন্ত)

জীববৈচিত্র্য ও বন্যপ্রাণী সংরক্ষণের জন্য সরকার ঘোষিত বিশেষ জীববৈচিত্র্য সংরক্ষণ এলাকা, সকল অভয়ারণ্য, জাতীয় উদ্যান, কমিউনিটি কনজারভেশন এলাকা, সাফারী পার্ক, ইকো পার্ক, উদ্ভিদ উদ্যান, জাতীয় ঐতিহ্য ও কুঞ্জবন- এ সকল এলাকা রক্ষিত এলাকার অন্তর্ভুক্ত। দেশে বর্তমানে রক্ষিত এলাকার (Terrestrial & Marine) পরিমাণ ৮,১৫,৬০৭.৪২ হেক্টর। এর মধ্যে Terrestrial রক্ষিত এলাকার পরিমাণ ৪,৬৭,৫০৭.৪২ হেক্টর; যা দেশের মোট আয়তনের ৩.১৭ শতাংশ।

দেশের বন্যপ্রাণী সংরক্ষণকে সর্বাধিক গুরুত্ব প্রদান করে সরকার সারা দেশে সর্বমোট ৫১টি সংরক্ষিত এলাকা ঘোষণা করেছে। তারমধ্যে ১৯টি জাতীয় উদ্যান, ১টি উদ্ভিদ উদ্যান, ২৪টি বন্যপ্রাণী অভয়ারণ্য, ২টি বিশেষ জীববৈচিত্র্য সংরক্ষণ এলাকা, ৩টি ইকোপার্ক এবং ২টি মেরিন প্রোটেক্টেড এরিয়া রয়েছে (তালিকা নিম্নে প্রদর্শিত)। তাছাড়া শকুন সংরক্ষণের জন্য ০২টি শকুন নিরাপদ এলাকা (ভালচার সেফ জোন) ঘোষণা করা হয়েছে।

বন্যপ্রাণী অভয়ারণ্য:

- | | |
|---|--|
| ১. রেমাকালঙ্গা বন্যপ্রাণী অভয়ারণ্য | ৯. সোনার চর বন্যপ্রাণী অভয়ারণ্য |
| ২. ফাসিয়াখালী বন্যপ্রাণী অভয়ারণ্য | ১০. চর কুকরি-মুকরি বন্যপ্রাণী অভয়ারণ্য |
| ৩. হাজারীখিল বন্যপ্রাণী অভয়ারণ্য | ১১. টেকনাফ বন্যপ্রাণী অভয়ারণ্য |
| ৪. চুনতি বন্যপ্রাণী অভয়ারণ্য | ১২. সুন্দরবন পূর্ব বন্যপ্রাণী অভয়ারণ্য |
| ৫. দুধপুকুরিয়া-ধোপাছড়ি বন্যপ্রাণী অভয়ারণ্য | ১৩. সুন্দরবন পশ্চিম বন্যপ্রাণী অভয়ারণ্য |
| ৬. পাবলাখালী বন্যপ্রাণী অভয়ারণ্য | ১৪. সুন্দরবন দক্ষিন বন্যপ্রাণী অভয়ারণ্য |
| ৭. সাংগু বন্যপ্রাণী অভয়ারণ্য | ১৫. চাঁদপাই বন্যপ্রাণী (ডলফিন) অভয়ারণ্য |
| ৮. টেংরাগিরি বন্যপ্রাণী অভয়ারণ্য | ১৬. দুধমুখী বন্যপ্রাণী (ডলফিন) অভয়ারণ্য |

১৭. ঢাংমারী বন্যপ্রাণী (ডলফিন) অভয়ারণ্য
১৮. নগরবাড়ী- মোহনগঞ্জ (ডলফিন) অভয়ারণ্য
১৯. শিলন্দা নাগডেমরা বন্যপ্রাণী (ডলফিন) অভয়ারণ্য
২০. নাজিরগঞ্জ বন্যপ্রাণী (ডলফিন) অভয়ারণ্য

২১. পানখালী বন্যপ্রাণী (ডলফিন) অভয়ারণ্য
২২. শিবসা বন্যপ্রাণী (ডলফিন) অভয়ারণ্য
২৩. ভদ্রা বন্যপ্রাণী (ডলফিন) অভয়ারণ্য
২৪. পদ্মা সেতু বন্যপ্রাণী অভয়ারণ্য

জাতীয় উদ্যান:

১. ভাওয়াল জাতীয় উদ্যান
২. মধুপুর জাতীয় উদ্যান
৩. রামসাগর জাতীয় উদ্যান
৪. হিমছড়ি জাতীয় উদ্যান
৫. লাউয়াছড়া জাতীয় উদ্যান
৬. কাপ্তাই জাতীয় উদ্যান
৭. নিঝুমদ্বীপ জাতীয় উদ্যান
৮. মেধা কচ্ছপিয়া জাতীয় উদ্যান
৯. সাতছড়ি জাতীয় উদ্যান
১০. খাদিম নগর জাতীয় উদ্যান
১১. বাঁরয়াঢালা জাতীয় উদ্যান
১২. কুয়াকাটা জাতীয় উদ্যান
১৩. নবাবগঞ্জ জাতীয় উদ্যান
১৪. সিংড়া জাতীয় উদ্যান
১৫. কাদিগড় জাতীয় উদ্যান
১৬. আলতা দিঘী জাতীয় উদ্যান
১৭. বীরগঞ্জ জাতীয় উদ্যান
১৮. শেখ জামাল ইনানী জাতীয় উদ্যান
১৯. ধর্মপুর জাতীয় উদ্যান

উদ্ভিদ উদ্যানঃ

১. জাতীয় উদ্ভিদ উদ্যান, মিরপুর

বিশেষ জীববৈচিত্র্য সংরক্ষণ এলাকাঃ

১. রাতারগুল বিশেষ জীববৈচিত্র্য সংরক্ষণ এলাকা
২. আলতাদিঘী বিশেষ জীববৈচিত্র্য সংরক্ষণ এলাকা

ইকোপার্কঃ

১. চরমুগুরিয়া ইকোপার্ক
২. টিলাগড় ইকোপার্ক ও বন্যপ্রাণী প্রজনন কেন্দ্র
৩. মাধবকুন্ড ইকোপার্ক

মেরিন প্রোটেক্টেড এরিয়াঃ

১. সোয়াচ অব নো গ্রাউন্ড মেরিন প্রোটেক্টেড এরিয়া
২. সেন্টমার্টিন মেরিন প্রোটেক্টেড এরিয়া
- রক্ষিত এলাকা (Protected Area) ঘোষিত না হওয়া সত্ত্বেও রক্ষিত এলাকার ন্যায় কাজ করছে বা ব্যবহৃত হচ্ছে এমন ইকোপার্ক/সাফারী পার্ক এর তালিকা নিম্নরূপ :

(ক) ইকোপার্কঃ

১. সীতাকুন্ড বোটানিকেল গার্ডেন ও ইকোপার্ক
২. মধুটিলা ইকোপার্ক
৩. বাঁশখালি ইকোপার্ক
৪. কুয়াকাটা ইকোপার্ক
৫. বরশীজোড়া ইকোপার্ক
৬. যমুনা সেতু পশ্চিম পাড় ইকোপার্ক
৭. পিরোজপুর রিভারভিউ ইকোপার্ক

(খ) সাফারী পার্ক :


১. বঙ্গবন্ধু শেখ মুজিব সাফারী পার্ক, কক্সবাজার
২. বঙ্গবন্ধু শেখ মুজিব সাফারী পার্ক, গাজীপুর

সোয়াচ অব নো-গ্রাউন্ড মেরিন প্রোটেক্টেড এরিয়া

বাংলাদেশের বন্যপ্রাণী (সংরক্ষণ ও নিরাপত্তা) আইন ২০১২-এর ধারা ১৩ (১) এবং ১৩ (২) এর ক্ষমতা বলে পরিবেশ, বন ও জলবায়ু পরিবর্তন মন্ত্রণালয় কর্তৃক ২৭ অক্টোবর ২০১৪ খ্রিঃ তারিখে প্রজ্ঞাপন মূলে দক্ষিণ বঙ্গোপসাগরে অবস্থিত সোয়াচ অব নো-গ্রাউন্ড এর ১৭৩৮.০০ বর্গ কিলোমিটার অংশকে পাঁচ প্রজাতির বিপন্ন সামুদ্রিক ডলফিন (যেমন-ইরাবতী ডলফিন, গোলাপি ডলফিন, বোতলনাক ডলফিন, চিত্রা ডলফিন, ঘূর্ণি ডলফিন) পাখনাহীন শুশুক, কয়েক প্রজাতির তিমি (যেমন-ফিন তিমি, কুঁজো তিমি, কমন স্পার্ম তিমি, খাটো স্পার্ম তিমি, ঘাতক তিমি ইত্যাদি) এবং হাঙ্গর (হাতুরী হাঙ্গর, বাঘা হাঙ্গর, বিলাই হাঙ্গর, মইচিয়া হাঙ্গর, কানি হাঙ্গর, চোখা হাঙ্গর, কালা হাঙ্গর, নীল হাঙ্গর, থুটি হাঙ্গর, ফৌরি হাঙ্গর, করাতি হাঙ্গর ইত্যাদি) সংরক্ষণ ও বংশবৃদ্ধির লক্ষ্যে “সোয়াচ অব নো-গ্রাউন্ড মেরিন প্রোটেক্টেড এরিয়া” হিসেবে ঘোষণা করা হয়; যার গড় গভীরতা ৯০০+ মিটার।




বঙ্গোপসাগরের সোয়াচ অব নো-গ্রাউন্ড



সেন্টমার্টিন মেরিন প্রোটেক্টেড এরিয়া

বন্যপ্রাণী (সংরক্ষণ ও নিরাপত্তা) আইন, ২০১২ (২০১২ সালের ৩০ নং আইন) এর ধারা ১৩ (১) ও ১৩ (২) এর ক্ষমতা বলে বৈশ্বিকভাবে হুমকির সম্মুখীন প্রবাল, গোলাপি ডলফিন, হাঙ্গর, রে মাছ, সামুদ্রিক কাছিম, সামুদ্রিক পাখি, সামুদ্রিক ঘাস (Sea grass) এবং সামুদ্রিক জীববৈচিত্র্য ও এদের আবাসস্থল সংরক্ষণ; সামুদ্রিক মৎস্য সম্পদের টেকসই আহরণের মাধ্যমে স্থানীয় জনগোষ্ঠীর জীবিকার মানোন্নয়ন; ব্লু ইকোনমি সমৃদ্ধকরণ এবং টেকসই উন্নয়ন লক্ষ্যমাত্রা (SDG-14) অর্জনের লক্ষ্যে ১,৭৪৩ বর্গ কিলোমিটার এলাকা বাংলাদেশ গেজেটে প্রকাশের তারিখ হতে “সেন্টমার্টিন মেরিন প্রোটেক্টেড এরিয়া” হিসাবে ঘোষণা করা হয়। যার গভীরতা ৭০ মিটার পর্যন্ত।



মেরিন প্রোটেক্টেড এরিয়ার মানচিত্র

বাংলাদেশের বন্যপ্রাণী ও জীববৈচিত্র্য

ভূপ্রকৃতিগত অবস্থানের কারণে বাংলাদেশ একটি জীববৈচিত্র্য সমৃদ্ধ দেশ। IUCN এর ২০১৫ সালের জরীপে দেখা যায়, বাংলাদেশে বর্তমানে ১১৬৩ প্রজাতির মেরুদণ্ডী বন্য প্রাণী রয়েছে; তার মধ্যে ৪৯টি উভচর, ১৬৭ টি সরীসৃপ, ৫৬৬টি পাখি ও ১৩৮টি স্তন্যপায়ী প্রাণী ও ২৫৩ প্রজাতির মিঠাপানির মাছ রয়েছে। অমেরুদণ্ডী প্রাণীর মধ্যে ১৪১টি ক্রাইস্টাসিয়ান ও ৩০৫টি প্রজাতি অন্তর্ভুক্ত রয়েছে। তাছাড়া মেরুদণ্ডী ও অমেরুদণ্ডী প্রাণীসহ সর্বমোট ১৬১৯টি প্রজাতি রয়েছে।

বাংলাদেশের বন, অভ্যন্তরীণ জলাভূমি এবং বঙ্গোপসাগরে রয়েছে বিপুল জীববৈচিত্র্যের সমাহার, রয়েছে কতিপয় বিরল ও বিপন্ন প্রজাতির বন্যপ্রাণীর অস্তিত্ব। উদ্ভিদ প্রজাতির মধ্যে বাংলাদেশে ৪৭০ প্রজাতির ভাইরাস/ব্যাকটেরিয়া, ১৯৮৮ প্রজাতির শৈবাল, ২৭৫ প্রজাতির ফানজাই, ২৪৮ মস জাতীয় উদ্ভিদ, ১৯৫ প্রজাতির ফার্ন জাতীয় উদ্ভিদ, ৭ প্রজাতির নগ্নবীজ এবং ৩ হাজার ৬১১ প্রজাতির গুপ্তবীজ (২৬৩৩ প্রজাতির দ্বি-বীজপত্রী এবং ৯৮৮ প্রজাতির একবীজপত্রী) উদ্ভিদ রয়েছে।

বন্যপ্রাণী ও তাদের আবাসস্থল এবং জীববৈচিত্র্য সংরক্ষণের জন্য পৃথিবীর অন্যান্য দেশের মত বাংলাদেশেও বন্যপ্রাণী সংরক্ষণ ও জীববৈচিত্র্য ব্যবস্থাপনাকে গুরুত্ব প্রদান করা হয়েছে। বাংলাদেশ সরকার সংবিধানে ১৮(ক) অনুচ্ছেদ যুক্ত করে দেশের বন্যপ্রাণী ও জীববৈচিত্র্য সংরক্ষণকে আরো বেগবান করেছে। তাছাড়া বাংলাদেশ পৃথিবীব্যাপী বিভিন্ন আন্তর্জাতিক সংস্থার সাথে বিভিন্ন প্রটোকল ও চুক্তিতে স্বাক্ষর করেছে; যেমন: বাংলাদেশ জীববৈচিত্র্য সম্পর্কিত কনভেনশন (CBD), পরিযায়ী প্রজাতির সংরক্ষণ সম্পর্কিত কনভেনশন (CMS), মহাবিপদাপন্ন উদ্ভিদ ও প্রাণী প্রজাতির আন্তর্জাতিক ব্যবসা-বানিজ্য এবং পরিবহন নিয়ন্ত্রণ সম্পর্কিত কনভেনশন (CITES), জলাভূমি বিষয়ক Ramsar কনভেনশন, SAWEN, MIKE ইত্যাদি।

বাংলাদেশের বন্যপ্রাণীর অবস্থা (IUCN-Red list of Bangladesh 2015)

দল	মোট বসবাসরত প্রজাতি	বিলুপ্ত	মহাবিপন্ন	বিপন্ন	সংকটাপন্ন	হুমকির সম্মুখীন	ঝুঁকিপূর্ণ নয়	অপর্যাপ্ত তথ্য	অপর্যাপ্ত তথ্য
স্তন্যপায়ী প্রাণী	১৩৮	১১	১৭	১২	৯	৯	৩৪	৩৯	৭
পাখি	৫৫৬	১৯	১০	১২	১৭	২৯	৪২৪	৫৫	০০
সরীসৃপ	১৬৭	১	১৭	১০	১১	১৮	৬৩	২৭	২০
উভচর	৪৯	০০	২	৩	৫	৬	২৭	৬	০০
মিঠা পানির মাছ	২৫৩	০০	৯	৩০	২৫	২৭	১২২	৪০	০০
ক্রাইস্টাসিয়ান	১৪১	০০	০০	২	১১	১	৪৭	৭৯	১
প্রজাপতি	৩০৫	০০	১	১২১	৭৫	০০	৮৪	৩২	০০
মোট	১৬১৯	৩১	৫৬	১৯০	১৫৩	৯০	৮০২	২৭৮	২৮

উল্লেখ্য যে, বাংলাদেশের বন্যপ্রাণীর হালনাগাদ তথ্য সম্পর্কিত Red-list প্রণয়নের কাজ প্রক্রিয়াধীন রয়েছে।

বাংলাদেশের বিলুপ্ত বন্যপ্রাণী

বাংলাদেশ এক সময় প্রাণী বৈচিত্র্যে ভরপুর ছিল। IUCN এর ২০১৫ সালের প্রতিবেদনে দেখা যায়, গত শত বর্ষের ব্যবধানে আমাদের দেশ থেকে ৩১ প্রজাতির বন্যপ্রাণী বিলুপ্ত হয়েছে। এর মধ্যে ১১টি স্তন্যপায়ী, ১৯টি পাখি ও ১টি সরীসৃপ প্রজাতি। বিলুপ্ত বন্যপ্রাণীর তালিকায় রয়েছে ভারতীয়, সুমাত্রান ও জাভান গভার, বারশিংগা, দাগী হায়না, বন গরু, কৃষ্ণ ষাঁড়, নীলগাই, শ্মথ ভল্লুক, বুনো মহিষ, মিঠাপানির কুমির, সবুজ ময়ূর, ময়ূর, গোলাপী শির হাঁস, বাদি হাঁস, সারস, রাজ শকুন, স্পটবিল্ড পেলিকেন, বড় মদনটাক, বাংলা ফ্লোরিকেন, ছোট ফ্লোরিকেন, বারটেলড্ ট্রি ক্রিপার, কালোবুক প্যারটবিল, স্পট ব্রেস্টেড প্যারটবিল, বড় প্যারটবিল, ধূসর তিতির, রোফাস থ্রেটেড পারট্রিজ, রাস্ট্রি ফ্রন্টেট বারউংগ, সোয়াস্প তিতির ও সাদা বক। যদি আমরা এখনই বন ও বন্যপ্রাণী ব্যবস্থাপনায় গুরুত্ব প্রদান না করি তাহলে অদূর ভবিষ্যতে আরো অনেক বন্যপ্রাণী আমাদের এই দেশ থেকে বিলুপ্ত হয়ে যাবে।



One-horned Rhinoceros
Rhinoceros unicornis



Javan Rhinoceros
Rhinoceros sondaicus



Asiatic Two-horned Rhinoceros
Didermoceros sumatrensis



Swamp Deer
Cervus duvauceli



Blackbuck
Antelope cervicapra



Nilgai
Boselaphus tragocamelus



Banteng
Bos banteng



Wild Buffalo
Bubalus bubalis



Gaur
Bos gaurus



Grey Wolf
Canis lupus



Striped Hyena
Hyaena hyaena



Marsh Crocodile
Crocodylus palustris



Pink-headed Duck
Rhodonessa caryophyllacea



Common Peafowl
Pavo cristatus

বন্যপ্রাণী সংরক্ষণে গৃহীত সাম্প্রতিক কার্যক্রম সমূহ

- সুন্দরবন ও এ বনের বন্যপ্রাণী রক্ষায় পরিবেশ, বন ও জলবায়ু পরিবর্তন মন্ত্রণালয়ের অধীন পাঁচ বছর মেয়াদী “সুন্দরবন সুরক্ষা প্রকল্প” শীর্ষক একটি প্রকল্প গ্রহণ করা হয়েছে এবং প্রকল্পের ব্যয় নির্ধারিত হয়েছে ১৫৭ কোটি ৮৭ লক্ষ ৫০ হাজার টাকা। প্রকল্পে সুন্দরবন এবং এই বনের বন্যপ্রাণী রক্ষায় বিভিন্ন গবেষণা কার্যক্রম, ইকোলজিক্যাল মনিটরিং ইত্যাদি অন্তর্ভুক্ত করা হয়েছে।
- চলতি বছরের ৩ মার্চ সুন্দরবনে বন ও বন্যপ্রাণী রক্ষায় পর্যবেক্ষণ কার্যক্রম পরিচালনার জন্য বন অধিদপ্তরের নিকট ড্রোন হস্তান্তর করা হয়েছে। ইতোমধ্যেই বন অধিদপ্তরের মাঠ পর্যায়ের কর্মকর্তা-কর্মচারীদের ড্রোন পরিচালনা বিষয়ক প্রশিক্ষণ প্রদান কার্যক্রম শুরু করা হয়েছে।
- হাতি ও অন্যান্য বন্যপ্রাণীর আবাসস্থল সংরক্ষণ ও করিডোরের মাধ্যমে বন্য হাতির নিরাপদ চলাচল নিশ্চিত করার লক্ষ্যে “Feasibility Study of Transboundary Wildlife Corridor in Chattogram, Chattogram Hill Tracts and Cox’s Bazar with Myanmar and India” শীর্ষক সম্ভাব্যতা যাচাই প্রকল্পের কার্যক্রম চলমান রয়েছে।
- সম্প্রতি “বাংলাদেশের বন্যপ্রাণী সংরক্ষণ ও আবাসস্থল উন্নয়ন প্রকল্পের আওতায় কাপ্তাই অঞ্চলে ৮ কিলোমিটার ও শেরপুর জেলার বালিজুড়ি এলাকায় ২ কিলোমিটার বৈদ্যুতিক বেড়া বা সোলার ফেন্সিং স্থাপনের উদ্যোগ গ্রহণ করা হয়েছে।
- চলমান বিভিন্ন উন্নয়ন প্রকল্পের আওতায়, বিশেষত সুফল প্রকল্প এবং বাংলাদেশে বন্যপ্রাণী সংরক্ষণ ও আবাসস্থল উন্নয়ন প্রকল্পের আওতায় হাতি সমৃদ্ধ বনাঞ্চলে হাতির খাদ্য উপযোগী বাগান ও ANR (Assisted Natural Regeneration) সৃজন করা হচ্ছে।
- পরিবেশ, বন ও জলবায়ু পরিবর্তন মন্ত্রণালয়ের আন্তরিক প্রচেষ্টার ফলে অতি সম্প্রতি মন্ত্রিসভায় বাংলাদেশে ‘মহাবিপন্ন’ প্রাণীর তালিকায় থাকা শকুন রক্ষায় ব্যথানাশক ‘কিটোপ্রোফেন’ জাতীয় ব্যথানাশক ওষুধের উৎপাদন বন্ধের প্রস্তাব অনুমোদন দেয়া হয়েছে। একই সাথে কিটোপ্রোফেন জাতীয় ব্যথানাশক ওষুধের পরিবর্তে ‘ম্যলোক্সিক্যাম’ নামে একটি ওষুধ ব্যবহারের পরামর্শও প্রদান করা হয়েছে।
- বাংলাদেশে প্রাপ্ত নতুন প্রজাতির হাঙর ও রে অন্তর্ভুক্তির লক্ষ্যে বন্যপ্রাণী (সংরক্ষণ ও নিরাপত্তা) আইন, ২০১২ এর তফসিল ১ ও ২ সংশোধন করে নতুন গেজেট প্রকাশিত হয়েছে।
- পরিবেশ, বন ও জলবায়ু পরিবর্তন মন্ত্রণালয়ের অধীন বন অধিদপ্তর কর্তৃক সুফল প্রকল্পের আওতায় বাংলাদেশে প্রাপ্ত হাঙর ও রে প্রজাতি সংরক্ষণে একটি অ্যাকশন প্ল্যান প্রণয়ন ও হাঙর ও রে এর বাণিজ্য নিয়ন্ত্রণে নন-ডেফ্রিমেন্ট ফাইন্ডিংস তৈরির কার্যক্রম অব্যাহত আছে।
- বন্যপ্রাণী বিষয়ক অপরাধ নিরসনের লক্ষ্যে ২০২০ সালে ‘অপরাধ উদঘাটনে তথ্য প্রদানকারীকে পুরস্কার প্রদান বিধিমালা, ২০২০’ জারি করা হয়েছে।
- ২০২০-২০২১ অর্থ বছরে বন অধিদপ্তরের বিভিন্ন অঞ্চল/বিভাগ সমূহে বন্যপ্রাণীর জন্য ৬০,০০,০০০ টাকার পশুখাদ্য ক্রয় ও সরবরাহ করা হয়েছে।
- দেশের জীববৈচিত্র্য, পাখি ও বন্যপ্রাণী সংরক্ষণ নিশ্চিত করার লক্ষ্যে এয়ারগান নিষিদ্ধ করে গেজেট করে প্রজ্ঞাপন জারি করা হয়েছে।
- বন্যপ্রাণী সংরক্ষণ ও বন্যপ্রাণী সংক্রান্ত ব্যবসা নিয়ন্ত্রণের লক্ষ্যে বাংলাদেশ ১৯৮১ সালে CITES (Convention on International Trade in Endangered Species of Wild Fauna and Flora) সনদে স্বাক্ষর করে। CITES এর তিনটি পরিশিষ্টভুক্ত প্রাণী বাট্রাফি আমদনি, রপ্তানি ও পুনঃরপ্তানির ক্ষেত্রে CITES এর ব্যবস্থাপনা কর্তৃপক্ষ হিসেবে প্রধান বন সংরক্ষক, বন অধিদপ্তর এর তত্ত্বাবধানে বন সংরক্ষক, বন্যপ্রাণী ও প্রকৃতি সংরক্ষণ অঞ্চল, ঢাকা কর্তৃক CITES রিপোর্টিং এবং CITES পারমিট প্রদান সংক্রান্ত এ সংশ্লিষ্ট সকল কার্যক্রম পরিচালনা করা হয়।

- সংরক্ষিত বনাঞ্চলে গবেষণার অনুমতি প্রদান, বৈজ্ঞানিক গবেষণার কাজে রক্ষিত বনাঞ্চল বা সংরক্ষিত বনাঞ্চল থেকে নমুনা সংগ্রহ করে গবেষণা, বিদেশে নমুনা প্রেরণ, বিদেশী বন্যপ্রাণী আমদানি-রপ্তানি ইত্যাদি বিষয়ে অনুমতি প্রদান সংক্রান্ত কার্যক্রম পরিচালনা করা হয়।
- এছাড়াও বন্যপ্রাণী সংরক্ষণে দেশব্যাপী স্বেচ্ছাসেবী সংগঠনদের কার্যক্রমকে উৎসাহ ও পৃষ্ঠপোষকতা প্রদান করা হচ্ছে। এরই ধারাবাহিকতায় বিভাগীয় ও জেলা পর্যায়ে বন্যপ্রাণী সংরক্ষণে নিয়োজিত বিভিন্ন স্বেচ্ছাসেবী সংগঠনের সদস্যদের প্রশিক্ষণও প্রদান করা হচ্ছে।

বন্যপ্রাণী দ্বারা আক্রান্ত মানুষের জান-মালের ক্ষতিপূরণ বিধিমালা, ২০২১

মানুষ ও বন্যপ্রাণী দ্বন্দ্ব নিরসনের লক্ষ্যে বাংলাদেশ বন্যপ্রাণী (সংরক্ষণ ও নিরাপত্তা) আইন, ২০১২-এর অধীন ধারা-৫২ এর উপধারা-২(জ) অনুযায়ী চলতি বছর ২৩ মার্চ “বন্যপ্রাণী দ্বারা আক্রান্ত জানমালের ক্ষতিপূরণ বিধিমালা, ২০২১” প্রণীত হয়েছে। উক্ত বিধিমালা মোতাবেক ক্ষতিপূরণের ধরণ ও নির্ধারণের হার নিম্নরূপঃ

ক্রমিক নং	ক্ষতির ধরণ	ক্ষতিপূরণের পরিমাণ
(১)	মৃত ব্যক্তির ক্ষেত্রে	৩,০০,০০০/- (তিন লক্ষ টাকা)
(২)	গুরুতর আহত ব্যক্তির ক্ষেত্রে	অনাধিক ১,০০,০০০/- (এক লক্ষ টাকা)
(৩)	সরকারি বনাঞ্চলের বাইরে লোকালয়ে কোন ব্যক্তি বা প্রতিষ্ঠানের সম্পদ ক্ষতিগ্রস্ত হলে	অনাধিক ৫০,০০০/- (পঞ্চাশ হাজার টাকা)

২০১১-২০১২ থেকে ২০২০-২০২১ অর্থবছর পর্যন্ত বন্যপ্রাণী দ্বারা আক্রান্তদেরকে প্রদত্ত ক্ষতিপূরণের পরিমাণ

ক্র: নং	আর্থিক বৎসর	মোট ক্ষতিপূরণ প্রাপ্ত ব্যক্তির সংখ্যা	বন্যপ্রাণী আক্রান্তের সংখ্যা						বাড়িমর ও ফসলের ক্ষতি (সংখ্যা)	মোট প্রদত্ত ক্ষতিপূরণ (লক্ষ টাকায়)
			বাঘ		হাতি		কুমির			
			পঙ্গু	নিহত	পঙ্গু	নিহত	পঙ্গু	নিহত		
১।	২০১১-১২	৪৮	৮	২২	৩	১৫	-	-	১	৪২.৫
২।	২০১২-১৩	৫২	১	১৬	১	৩১	-	২	১	৪৯.২৫
৩।	২০১৩-১৪	২১	১	৫	৩	১৬	-	-	-	২২
৪।	২০১৪-১৫	২১	-	-	৮	২০	-	১	-	২৫
৫।	২০১৫-১৬	১৯৪	১	-	৯	২৬	-	২	১৫৭	৫৯.১৯
৬।	২০১৬-১৭	৭৫	-	-	১	২৪	-	-	৫০	২৯.৫
৭।	২০১৭-১৮	৩১২	-	২	১	২০	-	-	২৮৯	৪৬.২৫
৮।	২০১৮-১৯	১১৫	৫	১	৭	১৬	-	১	৮৫	৪৩.০৫
৯।	২০১৯-২০	১২৩	-	-	১২	৩১	-	-	৮০	৫৪.৩৫
১০।	২০২০-২১	১৩৩	১	২	১০	১৬	-	-	১০৮	৬৯.৯৭
	মোট	১০৯৪	১৭	৪৮	৫৫	২১৫	০	৬	৭৬৮	৪৪১.০৬

বন্যপ্রাণী সংরক্ষণে বিধিমালা ও নীতিমালাঃ

বন্যপ্রাণী ও প্রকৃতি সংরক্ষণ অঞ্চল, ঢাকা এর অধীনে বাংলাদেশ কাঁকড়া রপ্তানি নীতিমালা, ১৯৯৮ অনুযায়ী বেসরকারিভাবে বাংলাদেশ থেকে কাঁকড়া ও কাঁকড়াজাত পণ্য রপ্তানির জন্য আবেদনকৃত প্রতিষ্ঠান/খামার কর্তৃক প্রেরিত কাগজপত্র যাচাই-বাছাই করতঃ রপ্তানির অনুমতি বা No Objection Certificate (NOC) প্রদান করা হয়।

- হরিণ ও হাতি লালন পালন বিধিমালা-২০১৭ অনুযায়ী বেসরকারিভাবে হরিণ ও হাতি লালন-পালনের জন্য আবেদনকারীদের লালন-পালনের স্থান লাইসেন্সিং কর্তৃপক্ষ কর্তৃক দায়িত্বপ্রাপ্ত কর্মকর্তা দ্বারা পরিদর্শন এবং কাগজপত্র যাচাই-বাছাই করতঃ লাইসেন্স প্রদান, নবায়ন, বাতিল ও পজেশন সার্টিফিকেট প্রদান করা হয়।
- বেসরকারিভাবে কুমিরের খামার স্থাপনের জন্য কুমির লালন-পালন বিধিমালা, ২০১৯ অনুযায়ী আবেদনকারীদের খামার বা খামারের স্থান লাইসেন্সিং কর্তৃপক্ষ কর্তৃক দায়িত্বপ্রাপ্ত কর্মকর্তা দ্বারা পরিদর্শন এবং কাগজপত্র যাচাই-বাছাই করতঃ লাইসেন্স প্রদান, নবায়ন, বাতিল ও পজেশন সার্টিফিকেট প্রদান করা হয়।
- বেসরকারিভাবে পোষা পাখির খামার স্থাপনের জন্য পোষা পাখি ব্যবস্থাপনা বিধিমালা, ২০২০ আবেদনকারীদের খামার বা খামারের স্থান লাইসেন্সিং কর্তৃপক্ষ কর্তৃক দায়িত্বপ্রাপ্ত কর্মকর্তা দ্বারা পরিদর্শন এবং কাগজপত্র যাচাই-বাছাই করতঃ লাইসেন্স প্রদান, নবায়ন, বাতিল ও পজেশন সার্টিফিকেট প্রদান করা হয়।

বন্যপ্রাণী অপরাধ দমন ইউনিট

বন্যপ্রাণী অপরাধ দমনের লক্ষ্যে বন্যপ্রাণী (সংরক্ষণ ও নিরাপত্তা) আইন, ২০১২ এর আলোকে ২০১২ সালের জুলাই মাসে বন্যপ্রাণী অপরাধ দমন ইউনিট গঠন করা হয়। সূচনালগ্ন হতেই দেশের যে কোন স্থানে বন্যপ্রাণী সংক্রান্ত অপরাধ সংঘটিত হলে প্রাপ্ত তথ্যের ভিত্তিতে এ ইউনিটটি উক্ত অপরাধ দমনে অভিযান পরিচালনা করে থাকে। এছাড়া ই-মেইল, জাতীয় জরুরী সেবা ৯৯৯, সামাজিক যোগাযোগ মাধ্যম ব্যবহার করে বন্যপ্রাণী সংশ্লিষ্ট অপরাধের তথ্য সংগ্রহ, বিভিন্ন আইন প্রয়োগকারী সংস্থার সাথে সমন্বয় সাধন, গোয়েন্দা নেটওয়ার্কিং সৃষ্টি, ভ্রাম্যমাণ আদালতের মাধ্যমে আসামীদের বিভিন্ন মেয়াদে কারাদণ্ড ও জরিমানা প্রদান, উদ্ধারকৃত বন্যপ্রাণী সমূহ উপযুক্ত পরিবেশে অবমুক্তকরণ এবং বন্যপ্রাণী অপরাধের ডাটাবেস তৈরির ক্ষেত্রে ইউনিটটি নিরলসভাবে কাজ করে যাচ্ছে। জুলাই ২০১২ থেকে মে ২০২১ পর্যন্ত ইউনিটটি বন্যপ্রাণী পাচার/বিক্রয়কালে সর্বমোট ৩৫,৭৬৫ টি বন্যপ্রাণী উদ্ধার করে প্রকৃতিতে অবমুক্ত করতে সক্ষম হয়েছে।

এছাড়া ২০২০-২০২১ অর্থ বছরে অত্র ইউনিটটি বন্যপ্রাণী অপরাধ দমন এবং বন্যপ্রাণী হ্যান্ডেলিং বিষয়ক ০৩ টি প্রশিক্ষণ কর্মসূচীর আয়োজন করে এবং ৩৭ টি জেলার ৮৯ টি (রেঞ্জ/বিট/এসএফএনটিসি/এসএফপিসি/উপজেলা পরিষদ/ইসলামিক ফাউন্ডেশন ইত্যাদি) স্থানে বন্যপ্রাণী বিষয়ক সচেতনতামূলক কার্যক্রম সম্পন্ন করাসহ সর্বমোট ১৭,৯৭৩ টি বন্যপ্রাণী বিষয়ক সচেতনতামূলক পোস্টার, বুকলেট, লিফলেট এবং স্টিকার বিতরণ করা হয়।

বর্তমানে ইউনিটটির কার্যক্রম “বাংলাদেশের বন্যপ্রাণী সংরক্ষণ ও আবাসস্থল উন্নয়ন প্রকল্প” এর অর্থায়নে পরিচালিত হয়ে আসছে।



জনবল:

ইউনিটটিতে বর্তমানে ১৪ জন কর্মকর্তা-কর্মচারী নিয়োজিত আছেন; যার মধ্যে ১০ জন রাজস্ব খাতভূক্ত এবং ০৪ জন উন্নয়ন প্রকল্পের আওতায় নিয়োগ প্রাপ্ত।

বন্যপ্রাণী অপরাধ দমন ইউনিটের কার্যক্রম:


- বন্যপ্রাণী (সংরক্ষণ ও নিরাপত্তা) আইন, ২০১২ এর প্রয়োগের মাধ্যমে অবৈধ বন্যপ্রাণী শিকার, পাচার, হত্যা ও ক্রয়-বিক্রয় জনিত অপরাধ দমন;
- সমগ্র দেশে বন্যপ্রাণী সংশ্লিষ্ট অপরাধের তথ্য সংগ্রহ, বন্যপ্রাণী অপরাধের হটস্পট (Hotspot) চিহ্নিতকরণ এবং উক্ত পয়েন্টে নিয়মিত টহল প্রদান;
- নিয়মিত মামলা প্রদান ছাড়াও ভ্রাম্যমাণ আদালতের মাধ্যমে আসামীদের বিভিন্ন মেয়াদে কারাদণ্ড ও অর্থদণ্ড প্রদান পূর্বক তাৎক্ষণিক শাস্তির ব্যবস্থা করা;
- ওয়াইল্ডলাইফ ফরেনসিক ল্যাবে পরীক্ষা-নীরীক্ষার মাধ্যমে ট্রেফিক বা বন্যপ্রাণীর নমুনা থেকে প্রজাতি চিহ্নিত করা এবং জীনগত সিকোয়েন্স এর মাধ্যমে DNA বারকোড ডেটাবেস তৈরি করা;
- আহত, অসুস্থ, দলছুট অথবা বিভিন্ন কারণে লোকালয়ে চলে আসা বন্যপ্রাণী উদ্ধার করে তাদেরকে উপযুক্ত প্রাকৃতিক পরিবেশে অবমুক্ত করা;
- বন্যপ্রাণী সংরক্ষণের লক্ষ্যে দেশব্যাপী গণসচেতনতা সৃষ্টি।

বন্যপ্রাণী অপরাধ দমন ইউনিট কর্তৃক পরিচালিত অভিযানের (জুলাই ২০১২ থেকে মে ২০২১) সংক্ষিপ্ত তথ্য উপাত্ত:



২০১২ সাল থেকে ২০২১ সাল পর্যন্ত উদ্ধারকৃত বন্যপ্রাণী

■ পাখি ■ স্তন্যপায়ী ■ সরীসৃপ ■ ট্রফি



বন্যপ্রাণী অপরাধ সংশ্লিষ্ট কার্যক্রমের খন্ড চিত্র:



পরিবেশ, বন ও জলবায়ু পরিবর্তন মন্ত্রণালয়ের মাননীয় মন্ত্রী মহোদয় কর্তৃক প্রকৃতিতে পাখি অবমুক্তকরণ।



সুদ্বি কাছিম উদ্ধারপূর্বক প্রকৃতিতে অবমুক্ত করণ।



অনলাইন বিজ্ঞাপনের তথ্যের ভিত্তিতে বন্যপ্রাণী অপরাধ দমন ইউনিটের উদ্ধার কার্যক্রম।



বন্যপ্রাণী অপরাধ দমন ইউনিট এবং র‍্যাব-১ এর যৌথ অভিযানে পাখি উদ্ধারপূর্বক প্রকৃতিতে অবমুক্তকরণ।



বন্যপ্রাণী অপরাধ দমন ইউনিট এবং র‍্যাব-২ কর্তৃক বনরুই (Chinese Pangolin) উদ্ধার ও অবমুক্তকরণ।



প্রজাতির বনঝড় নাকামাথা চোখে পড়ে।
সাফারি পার্কের ভারপ্রাপ্ত কর্মকর্তা (এসিএফ) অবিন
রহমান জানান, এর আগেও আরো দুটি একই প্রজাতির
পুরুষ বনঝড় ও একটি নারী বনঝড় পার্কের গভীর
অরণ্যে অবনত হওয়া হয়েছে। এটি নিয়ে পার্কের তিনটি
পুরুষ ও একটি নারীসহ চারটি বনঝড় রয়েছে।

বন্ধু পাখি বিশেষায়িত শহরের অভ্যন্তরেও অন্য পাখি বিকি কল্লর ৩৫টি পাখি অন্য করে কল্লর গ্রামী পরিচালিত হয়। বিশেষায়িত শহরের শৌর্য মনোভি
একটি থেকে অতি কম গ্রাম পাখি আর শুকনো অর্থহীন করা হয়। ৩টি গ্রাম মনোভি

কার্যক্রম:

- বন্যপ্রাণী ফরেনসিক ল্যাবটি স্থাপনের পর হতে এ পর্যন্ত মোট ১৪ (চৌদ্দ) টি বিভিন্ন মামলার আলামত কোর্ট এর মাধ্যমে বিভিন্ন আইন প্রয়োগকারী সংস্থা থেকে এসেছে। তন্মধ্যে ১০(দশ)টি মামলার আলামতের বিশ্লেষণ কার্যক্রম সম্পন্ন হয়েছে এবং অবশিষ্ট ০৪(চার)টি মামলার আলামত বিশ্লেষণের কার্যক্রম চলমান রয়েছে।
- এছাড়াও ল্যাবটিতে বন্যপ্রাণী রিপোর্জিটরি উন্নয়নের লক্ষ্যে অদ্যাবধি ১৯০ (একশত নব্বই)টি বিভিন্ন বন্যপ্রাণীর নমুনা সংগ্রহ করা হয়েছে।
- ওয়াইল্ডলাইফ ফরেনসিক ল্যাব ইতোমধ্যেই ডি.এন.এ বারকোডিংয়ের মাধ্যমে বাংলাদেশের বন্যপ্রাণীর একটি জেনেটিক লাইব্রেরী সৃষ্টির লক্ষ্যে কাজ শুরু করছে; যা বন্যপ্রাণী সংরক্ষণে বন অধিদপ্তরের কার্যক্রমকে এক ধাপ এগিয়ে নিয়ে যাবে।

বন্যপ্রাণী অপরাধ দমন ইউনিট কর্তৃক পরিচালিত অভিযানের সংক্ষিপ্ত তথ্য :

সাল	মোট অভিযানের সংখ্যা	উদ্ধার/জব্দকৃত বন্যপ্রাণীর সংখ্যা				মোট মামলা সংখ্যা	ধৃত অপরাধীর সংখ্যা
		পাখি	স্তন্যপায়ী	সরীসৃপ	ট্রফি		
২০২১-২২	১৫১	৩৯৩২	৬৪০	১০৪৫	২৩১	১৯	৪০ জন
২০২০	৯৭	১৬৮৯	৩৫	৩৫	-	২৭	২৬ জন
২০১৯	১২৯	৩৭৯৬	৭৭	১৩১	২৯৮	৪৭	২৫ জন
২০১৮	২৪৭	২৩১০	৩৮	১৭	১৫	২৯	১৪ জন
২০১৭	১১২	২৪৫৫	১০	২০	-	০৪	০৫জন
২০১৬	১৮৫	৮১৮৯	২৯	২৪৮	৪০	৬৩	৩৪ জন
২০১৫	২৫৯	১৬৭৩	৩১	৬৬১৮	২৯৬	৫০	২৮ জন
২০১৪	২৪০	১২৫৭	২৩	৫৪৮	৩১৭	৪৭	৩০ জন
২০১৩	১৩৭	২২৪৩	৩২	৯২	০৩	৪৬	২৮ জন
২০১২	১৪১	৯৬১	১২	৪১০	২০৫	৪৬	৩৬ জন
মোট	১৬৯৮	২৮৫০৫	৯২২	৯১৪৬	১৪০৫	৩৭৮	২৬৬ জন

শেখ কামাল ওয়াইল্ডলাইফ সেন্টার

গণপ্রজাতন্ত্রী বাংলাদেশের সংবিধানের অনুচ্ছেদ ১৮(ক)-এ রাষ্ট্র কর্তৃক জীববৈচিত্র্য, বন ও বন্যপ্রাণী, সংরক্ষণ ও নিরাপত্তা বিধানের বিষয়টি অন্তর্ভুক্ত করা হয়েছে। এরই ধারাবাহিকতায় বাংলাদেশে বন অধিদপ্তর কর্তৃক জীববৈচিত্র্য, বন ও বন্যপ্রাণী সংরক্ষণ ও ব্যবস্থাপনায় বিভিন্ন ধরনের কর্মকান্ড পরিচালিত হচ্ছে। দেশের জীববৈচিত্র্য, বন ও বন্যপ্রাণীর আবাসস্থল সংরক্ষণ খাতের সুষ্ঠু ব্যবস্থাপনা ও দক্ষ পরিচালনা নিশ্চিতকল্পে সংশ্লিষ্ট বিষয়ে স্থানীয় ও আন্তর্জাতিকভাবে প্রশিক্ষিত ও দক্ষ জনশক্তি সৃষ্টি এবং মানসম্মত গবেষণা ও উন্নয়ন কর্মকান্ড পরিচালনার লক্ষ্যে ইতোমধ্যে বাস্তবায়িত “স্ট্রেংদেনিং রিজিওনাল কো-অপারেশন ফর ওয়াইল্ডলাইফ প্রটেকশন”

প্রকল্পের মাধ্যমে গাজীপুর সদর উপজেলায় মির্জাপুর-মাস্টার বাড়ীতে সর্বাধুনিক সুযোগ-সুবিধা সম্মিলিত শেখ কামাল ওয়াইল্ডলাইফ সেন্টার প্রতিষ্ঠা করা হয়েছে। গণপ্রজাতন্ত্রী বাংলাদেশ সরকারের মাননীয় প্রধানমন্ত্রী শেখ হাসিনা ৬ আষাঢ় ১৪২৬ বঙ্গাব্দ/২০ জুন ২০১৯ খ্রিস্টাব্দে শেখ কামাল ওয়াইল্ডলাইফ সেন্টারটির শুভ উদ্বোধন করেন।



শেখ কামাল ওয়াইল্ডলাইফ সেন্টারের মূল অবকাঠামো



শেখ কামাল ওয়াইল্ডলাইফ সেন্টারের একাডেমিক ভবন

অবস্থান ও আয়তন:

ঢাকা বিভাগের অধীন গাজীপুর জেলার গাজীপুর সদর উপজেলা ও গাজীপুর সিটি কর্পোরেশনের ২৩ নং ওয়ার্ডের ১৮ নং আড়ইশ প্রসাদ মৌজায় বাংলাদেশ ওয়াইল্ডলাইফ সেন্টারটি অবস্থিত। এটি গাজীপুর চৌরাস্তা থেকে উত্তরে ৭ কি.মি. দূরে মাস্টারবাড়ী নামক স্থানে ভাওয়াল জাতীয় উদ্যানের ভিতরে ঢাক-ময়মনসিং মহাসড়কের পূর্ব পার্শে নির্মিত। এর মোট আয়তন ৬.৮৫ একর।

উদ্দেশ্য:

১. বন, বন্যপ্রাণী ও জীববৈচিত্র্য সংরক্ষণ, উন্নয়ন ও ব্যবস্থাপনা খাতের সকল পেশাজীবী, কর্মকর্তা ও আগ্রহী দেশী-বিদেশী ব্যক্তিগণকে উচ্চতর প্রশিক্ষণ প্রদান;
২. জীববৈচিত্র্য সংরক্ষণ ও বন্যপ্রাণী ব্যবস্থাপনায় নিয়োজিত জনবলের দক্ষতা বৃদ্ধিকরণ এবং বন্যপ্রাণী বিষয়ক উদ্ভূত সমস্যা মোকাবেলার নিমিত্তে দেশ-বিদেশে প্রশিক্ষণের মাধ্যমে দক্ষ জনবল গড়ে তোলা;
৩. দেশীয় বন্যপ্রাণী সম্পদ সমূহকে সঠিক ব্যবস্থাপনার লক্ষ্যে একটি জ্ঞান ভিত্তিক ব্যবস্থাপনা কেন্দ্র প্রতিষ্ঠা করা, যা সংরক্ষণ ও বিভিন্ন উন্নয়ন বিষয়ক নীতি ও সিদ্ধান্ত গ্রহণের ক্ষেত্রে সংশ্লিষ্ট সংস্থা সমূহকে উপযুক্ত উপদেশ ও পরামর্শ প্রদান করবে;
৪. বন, বন্যপ্রাণী ও জীববৈচিত্র্য সম্পর্কিত উচ্চতর শিক্ষা ও গবেষণার সুযোগ সুবিধা সৃষ্টি করা;
৫. আধুনিক তথ্যপ্রযুক্তির সাহায্যে বন, বন্যপ্রাণী ও এর আবাসস্থল বিষয়ক একটি জাতীয় তথ্য ব্যাংক স্থাপন এবং সেন্টারকে বন্যপ্রাণী ব্যবস্থাপনা সেক্টরের রেফারেন্স কেন্দ্র হিসাবে প্রতিষ্ঠা করা;
৬. বন, বন্যপ্রাণী, জীববৈচিত্র্য, পরিবেশ ও জলবায়ু পরিবর্তন সংক্রান্ত মানসম্মত গবেষণা পরিচালনা ও দেশি, বিদেশি প্রতিষ্ঠানের বিশেষজ্ঞদের অংশগ্রহণে সেমিনার, সিম্পোজিয়াম ও কর্মশালার আয়োজন;
৭. বন, বন্যপ্রাণী ও জীববৈচিত্র্য বিষয়ে জাতীয় তথ্য ব্যাংকে সংগৃহীত ও সংরক্ষিত বিভিন্ন উপাত্ত, প্রতিবেদন ও তথ্য প্রকাশ;



শেখ কামাল ওয়াইল্ডলাইফ সেন্টারে স্মার্ট প্যাট্রোলিং
বিষয়ে প্রশিক্ষণ প্রদান



শেখ কামাল ওয়াইল্ডলাইফ সেন্টারে প্রশিক্ষণের
অংশ হিসেবে মাঠ পরিদর্শনে সুন্দরবন ভ্রমণ

বাংলাদেশের প্রকৃতি ও প্রতিবেশ পর্যটন

বর্তমান বিশ্বে প্রকৃতি পর্যটন একটি বিশাল সম্ভাবনার নাম। পৃথিবীর অনেক দেশে প্রকৃতি পর্যটন তাদের দেশীয় উৎপাদনে উল্লেখযোগ্য ভূমিকা পালন করে থাকে। সুজলা-সুফলা শস্য-শ্যামলা এ বাংলাদেশেও রয়েছে প্রকৃতি পর্যটনের অপার সম্ভাবনা। আদিকাল থেকে বহু বিখ্যাত পর্যটক এ প্রকৃতির অপরূপ দৃশ্যে মুগ্ধ হয়ে এদেশে ভ্রমণে এসেছিলেন। এদেশে রয়েছে অসংখ্য পাহাড়-পর্বত, নদী-নালা, খাল-বিল, হাওড়-বাওড় এবং বিশাল সমুদ্র। প্রকৃতি পর্যটনে জনগণের অংশীদারিত্ব থাকে এবং জনগণ প্রকৃতি পর্যটন থেকে উপকৃত হয়। বিশ্বের দীর্ঘতম কক্সবাজার সমুদ্র সৈকত, মহেশখালী-সোনাদিয়া দ্বীপের ম্যানগ্রোভ বন, সেন্টমার্টিন দ্বীপ এবং সিলেটের জলাভূমির বন পর্যটকের দৃষ্টি কেড়ে নেয়। সেন্টমার্টিন দ্বীপে রয়েছে সামুদ্রিক বিচিত্র রকমের কাছিমসহ কোরাল, কাঁকড়া এবং আরো বিচিত্র রকমের মাছ। কুয়াকাটায় সাগর তীরে সূর্যোদয় ও সূর্যাস্ত উপভোগ করার বিরল সুযোগ রয়েছে। এছাড়া সোনার চরের ঝাউবন সমৃদ্ধ সমুদ্র সৈকত এবং নজরকাড়া ম্যানগ্রোভ বন পর্যটকদের দৃষ্টি কাড়ে। বাংলাদেশের উল্লেখযোগ্য প্রকৃতি পর্যটন স্থানসমূহের তালিকা নিম্নরূপঃ



বিছানাকান্দি



সাপু সংরক্ষিত বনাঞ্চল

কেন্দ্রীয় এলাকা: ভাওয়াল ন্যাশনাল পার্ক (গাজীপুর), বঙ্গবন্ধু সাফারী পার্ক (গাজীপুর), ন্যাশনাল বোটানিক্যাল গার্ডেন (ঢাকা), বলধাগার্ডেন (ঢাকা), মধুপুর ন্যাশনাল পার্ক (টাঙ্গাইল), মধুটিলা ইকোপার্ক (শেরপুর), রাজেশপুর ইকোপার্ক (কুমিল্লা) ইত্যাদি।

সিলেট এলাকা: রাতারগুল জলাভূমির বন, লাউয়াছড়া জাতীয় উদ্যান, সাতছড়ি জাতীয় উদ্যান, মাধবকুন্ড ইকোপার্ক, বরশীজোড়া ইকোপার্ক, টিলাগড় ইকোপার্ক, খাদিমনগর জাতীয় উদ্যান, জাফলং, বিছানাকান্দি, হাকালুকী হাওড়, টাঙ্গুয়ার হাওড় ইত্যাদি।

চট্টগ্রাম এলাকা: সীতাকুন্ড বোটানিক্যাল গার্ডেন এন্ড ইকোপার্ক, বাঁশখালী ইকোপার্ক, বঙ্গবন্ধু সাফারী পার্ক (কক্সবাজার), বাইরেয়াটোলা জাতীয় উদ্যান, শেখ রাসেল এ্যাভিনিউ ইকোপার্ক, মহামায়া ইকোপার্ক, ফয়েজ লেক, পতেঙ্গা সমুদ্র সৈকত, কক্সবাজার সমুদ্র সৈকত, হিমছড়ি, টেকনাফ, মহেশখালী দ্বীপের সোনাদিয়া ম্যানগ্রোভ বন, সেন্টমার্টিন দ্বীপ ইত্যাদি।

পার্বত্য এলাকা: কাণ্ডাই ন্যাশনাল পার্ক, কাণ্ডাই লেক, রাম পাহাড়, সীতা পাহাড়, শুভলং ঝরনা, মাথিনের কুপ, আলুটিলা গুহা, বান্দরবানের চিমুক পাহাড়, মেঘলা পর্যটন কেন্দ্র, শৈল প্রপাত, নীলাচল ইত্যাদি।

উত্তরাঞ্চল: রামসাগর জাতীয় উদ্যান, নবাবগঞ্জ জাতীয় উদ্যান, সিংড়া জাতীয় উদ্যান, বীরগঞ্জ জাতীয় উদ্যান, বঙ্গবন্ধু সেতু ইকোপার্ক, আলতাদীঘি জাতীয় উদ্যান ইত্যাদি।

দক্ষিণাঞ্চল: কুয়াকাটা জাতীয় উদ্যান, নিঝুম দ্বীপ জাতীয় উদ্যান, টেংরাগিরি ইকোপার্ক, পিরোজপুর রিভারভিউ ইকোপার্ক ইত্যাদি।

দক্ষিণ-পশ্চিমাঞ্চল: বিশ্ব ঐতিহ্য সুন্দরবনের কটকা, হিরনপয়েন্ট, দুবলারচর, কচিখালী, হাড়াবাড়িয়া এবং করমজল জীববৈচিত্র্য সমৃদ্ধ আকর্ষণীয় পর্যটন স্পট। এখানে রয়েছে রয়েল বেঙ্গল টাইগার, চিত্রল হরিণ, বানর, শূকর, লোনা পানির কুমির, ডলফিনসহ বিচিত্র রকমের জীবজন্তু।

প্রকৃতি পর্যটন উপভোগ করতে হলে পর্যটকদের কিছু নিয়ম কানুন পালনের নির্দেশিকা :

কি কি কাজ করা উচিত	কি কি কাজ করা উচিত নয়
১) যে জায়গায় ভ্রমণে যাবেন সে জায়গার নিয়ম-কানুন মেনে চলা, যেমনঃ প্রবেশ ফি/ পার্কিং ফি থাকলে ফি দিয়ে প্রবেশ করা।	১) বনাঞ্চল ও বন্যপ্রাণির ক্ষতি হয় এমন কোন কাজ না করা।
২) নির্দিষ্ট ডাস্টবিনে ময়লা আবর্জনা ফেলা।	২) যত্র-তত্র ময়লা আবর্জনা না ফেলা।
৩) নির্দিষ্ট ট্রেইলে ভ্রমণ করা।	৩) রক্ষিত বনাঞ্চল, নদী, সাগর ও জলাশয়ে কোন ধরনের অপচনশীল দ্রব্যাদি না ফেলা।
৪) প্রয়োজনে ইকো-ট্যুর গাইড নিয়ে ভ্রমণ করা।	৪) উচ্চস্বরে মাইক ও হর্ণ না বাজানো।
৫) যে এলাকায় ভ্রমণ করা হয় এর আশেপাশের জনগণের মূল্যবোধকে সম্মান জানানো।	৫) হৈচৈ, চিৎকার- চোঁচামেচি না করা।

সাফারী পার্ক

চিড়িয়াখানায জীবজন্তুসমূহ আবদ্ধ অবস্থায় থাকে এবং দর্শনার্থীগণ মুক্ত অবস্থায় থেকে জীবজন্তু পরিদর্শন করেন। কিন্তু সাফারী পার্কে বন্যপ্রাণীসমূহ উন্মুক্ত অবস্থায় বনজঙ্গলে বিচরণ করে এবং মানুষ সতর্কতার সহিত চলমান যানবাহনে আবদ্ধ অবস্থায় জীবজন্তুসমূহ পর্যবেক্ষণ করে থাকে।

সাফারী পার্কে দেশী-বিদেশী বন্যপ্রাণীসমূহ ন্যূনতম প্রাকৃতিক পরিবেশে রক্ষিত অবস্থায় থেকে বংশ বৃদ্ধির সুযোগ পাবে এবং উন্মুক্ত অবস্থায় বিচরণ করবে। বিরল ও বিলুপ্তপ্রায় এবং মহাবিপদাপন্ন বন্যপ্রাণীদের সাফারী পার্কের ভিতরে (in-situ) এবং বাইরে (ex-situ) মূল আবাসস্থলে সংরক্ষণ, প্রজনন, বংশবৃদ্ধি; আহত ও দলছুট বন্যপ্রাণীর চিকিৎসা প্রদান; জীববৈচিত্র্য সংরক্ষণ এবং ইকোট্যুরিজমের উন্নয়ন সাধনের লক্ষ্যে সাফারী পার্ক গঠিত হয়। বাংলাদেশে সাফারী পার্ক মোট ২টি।

১. বঙ্গবন্ধু শেখ মুজিব সাফারী পার্ক, কক্সবাজার

২. বঙ্গবন্ধু শেখ মুজিব সাফারী পার্ক, গাজীপুর

বঙ্গবন্ধু শেখ মুজিব সাফারী পার্ক, কক্সবাজার

বঙ্গবন্ধু শেখ মুজিব সাফারী পার্ক বাংলাদেশের প্রথম সাফারী পার্ক। এটি কক্সবাজার জেলার অন্তর্গত চকোরিয়া উপজেলার ডুলাহাজরায় অবস্থিত। ১৯৮২ সালে ৪৩.০০ হেক্টর জমির উপর হরিণ প্রজনন কেন্দ্র হিসেবে এর যাত্রা শুরু হয়। পরবর্তীতে ১৯৯৯ সালে ডুলাহাজরা ও হারগজা ব্লকের ৯০০ হেক্টর বনাঞ্চল নিয়ে বঙ্গবন্ধু শেখ মুজিব সাফারী পার্ক প্রাতিষ্ঠিত হয় এবং ২০০০-২০০১ অর্থবছর হতে এ সাফারী পার্কের উন্নয়নমূলক কার্যক্রম শুরু হয়। সাফারী পার্কটি বাংলাদেশের বন্যপ্রাণী ও জীববৈচিত্র্য সংরক্ষণে গৃহীত মননশীল ও সফল পদক্ষেপসমূহের মধ্যে সময়োপযোগী একটি পদক্ষেপ। বঙ্গবন্ধু শেখ মুজিব সাফারী পার্কে বেষ্টনীতে আবদ্ধ বন্যপ্রাণী সমূহ হলো স্তন্যপায়ী ১৩৬টি, পাখি ৯৫টি, সরীসৃপ ৯৭টি ইত্যাদি।



ডুলাহাজরা সাফারী পার্কের প্রবেশ দ্বার

ডুলাহাজরা সাফারী পার্কের হাতি

সাফারী পার্ক ব্যবস্থাপনার মূল উদ্দেশ্যগুলো হলো-

- ১) প্রকৃতি হতে বিলুপ্ত, অতিবিপন্ন, বিপন্ন ও দুর্লভ প্রজাতির বন্যপ্রাণীর প্রজনন সুযোগ সৃষ্টি
- ২) বন্যপ্রাণী বিষয়ক গবেষণা
- ৩) পরিবেশ বিষয়ক শিক্ষা ও
- ৪) পরিবেশ বান্ধব পর্যটন সুবিধা বৃদ্ধি

বঙ্গবন্ধু শেখ মুজিব সাফারী পার্ক, কক্সবাজার এ ইতোমধ্যে নিম্নলিখিত প্রাণীসমূহের প্রজননে সফলতা পাওয়া গেছে-

শ্রেণী	প্রজাতির নাম	বাচ্চার সংখ্যা	সংরক্ষণ অবস্থা
স্তন্যপায়ী	কালো ভান্ডুক	৪	অতিবিপন্ন (আই.ইউ.সি.এন রেড লিস্ট, বি.ডি.-২০১৫)
	রয়েল বেঙ্গল টাইগার	২	অতিবিপন্ন (আই.ইউ.সি.এন রেড লিস্ট, বি.ডি.-২০১৫)
	সিংহ	৭	বিপন্ন (আই.ইউ.সি.এন)
	জলহস্তি	৬	বিপদাপন্ন (আই.ইউ.সি.এন)
	ওয়াইল্ড বিট	৫	কম ঝুঁকিপূর্ণ (আই.ইউ.সি.এন)
পাখি	ময়ূর	৫	বাংলাদেশ হতে বিলুপ্ত (আই.ইউ.সি.এন রেড লিস্ট, বি.ডি.-২০১৫)
সরীসৃপ	লোনা পানির কুমির	২০	বিপন্ন (আই.ইউ.সি.এন রেড লিস্ট, বি.ডি.-২০১৫)

সাফারী পার্ক দেশের বিশ্ববিদ্যালয়সমূহের জন্য একটি আর্দশ গবেষণা ক্ষেত্র। পশু চিকিৎসা বিজ্ঞান, প্রাণীবিদ্যা, পরিবেশ বিজ্ঞান, মৃত্তিকা বিজ্ঞান, বন ও উদ্ভিদ বিজ্ঞানের শিক্ষার্থীরা তাদের গবেষণার কাজে ত্র পার্কে আসেন। সারাদেশের স্কুল, কলেজ ও বিশ্ববিদ্যালয় সমূহের জন্য বঙ্গবন্ধু শেখ মুজিব সাফারী পার্ক, কক্সবাজার একটি মাঠ প্রশিক্ষণ কেন্দ্র। এখানে প্রতিবছর অনেক শিক্ষার্থী শিক্ষা সফরে আসেন। শিক্ষা সফরে আগত প্রতিটি শিক্ষার্থী দলকে ১জন দক্ষ কর্মকর্তার নেতৃত্বে পার্কে ভ্রমণের ব্যবস্থা করা হয়। এছাড়া শিক্ষার্থীদের জন্য পরিবেশ শিক্ষার সুবিধার্থে রয়েছে শিক্ষামূলক ডকুমেন্টারি, তথ্য ও শিক্ষাকেন্দ্র, বন্যপ্রাণী মিউজিয়াম এবং প্রকৃতি বীক্ষণ কেন্দ্র।

বঙ্গবন্ধু শেখ মুজিব সাফারী পার্ক, কক্সবাজার-এ পরিবেশ বান্ধব পর্যটনের বিদ্যমান সুযোগ-সুবিধার উন্নয়নের পাশাপাশি পার্কটিকে দর্শনার্থীদের কাছে আরো আকর্ষণীয় ও দৃষ্টিনন্দন করার লক্ষ্যে দেশী-বিদেশী পরামর্শক এর সহযোগীতায় একটি আধুনিক ও যুগোপযোগী মাস্টারপ্ল্যান প্রণয়ন করা হয়। অনুমোদিত মাস্টারপ্ল্যান এর আলোকে এবং আধুনিক সাফারী পার্ক তৈরীর ধ্যান-ধারণাকে সামনে রেখে জুলাই ২০১৯ হতে জুন ২০২২ অর্থ বছর পর্যন্ত “বঙ্গবন্ধু শেখ মুজিব সাফারী পার্ক, কক্সবাজার এর উন্নয়ন ও সম্প্রসারণ প্রকল্প” নামে নতুন একটি প্রকল্প চলমান রয়েছে। এই প্রকল্প বাস্তবায়নের মাধ্যমে ভবিষ্যতে “বঙ্গবন্ধু শেখ মুজিব সাফারী পার্ক, কক্সবাজার” এর নান্দনিক সৌন্দর্য বৃদ্ধির পাশাপাশি পরিবেশ বান্ধব পর্যটনের বহুমুখী সুযোগ-সুবিধাসহ বন্যপ্রাণী সংরক্ষণ, শিক্ষা ও গবেষণার ক্ষেত্রে অপার সম্ভাবনা সৃষ্টির আশা করা যাচ্ছে।

বঙ্গবন্ধু শেখ মুজিব সাফারী পার্ক, গাজীপুর

ঢাকা থেকে প্রায় ৪৮ কিলোমিটার উত্তরে ঢাকা-ময়মনসিংহ মহাসড়কের বাঘের বাজার থেকে প্রায় ৩ কিলোমিটার পশ্চিমে সাফারী পার্কটির অবস্থান। ভাওয়াল গড়ের শালবন একসময় জীববৈচিত্র্যে সমৃদ্ধ ছিল; কিন্তু ইতোমধ্যে অনেক প্রাণী ও গাছপালা বিলুপ্ত হয়ে গেছে। গাজীপুর জেলার শ্রীপুর উপজেলাধীন মাওনা ইউনিয়নের বড় রাখুরা মৌজা ও সদর উপজেলার পিরুজালী ইউনিয়নের পিরুজালী মৌজার খন্ড খন্ড শাল বনের ৪৯০৯.০ একর বনভূমি ছোট বড় বিভিন্ন প্রজাতির



বঙ্গবন্ধু শেখ মুজিব সাফারী পার্ক, গাজীপুরের প্রবেশ দ্বার

বন্যপ্রাণীর জন্য নিরাপদ আবাসস্থল হিসেবে পরিচিত। এর মধ্যে ৩৬৯০.০ একর এলাকাকে সাফারী পার্কের মাস্টার প্ল্যানের আওতাভুক্ত করা হয়েছে। বঙ্গবন্ধু শেখ মুজিব সাফারী পার্ক শীর্ষক প্রকল্পটির কার্যক্রম ২০১১ সালে শুরু হয় এবং ২০১৭ সালে শেষ হয়। সাফারী পার্কটি দক্ষিণ এশীয় মডেল, বিশেষ করে থাইল্যান্ডের সাফারী ওয়ার্ল্ড (Safari World) এর সাথে সামঞ্জস্য রেখে স্থাপন করা হয়েছে। সাফারী পার্কের চারদিকে নির্মান করা হয়েছে স্থায়ী ঘেরা এবং উহার মধ্যে দেশী/বিদেশী বন্যপ্রাণীর বংশবৃদ্ধি ও অবাধ বিচরণের সুযোগ সৃষ্টি করা হয়েছে; যাতে পর্যটকগণ চলমান যানবাহনে অথবা পায়ে হেঁটে ভ্রমণ করে শিক্ষা, গবেষণা ও চিত্তবিনোদনের সুযোগ লাভ করতে পারেন।

সাফারী পার্কের মূল উদ্দেশ্য

- ১। শাল বনের বন্যপ্রাণী ও উদ্ভিদ বৈচিত্র্য সংরক্ষণ;
- ২। বাংলাদেশের বিরল ও বিলুপ্ত প্রায় বন্যপ্রাণীকে নিজ আবাসস্থলে (in-situ) এবং আবাসস্থলের বাহিরে (ex-situ) সংরক্ষণ ও উন্নয়ন সাধন;
- ৩। ঢাকা মহানগরীর অতি নিকটে ইকো-ট্যুরিজমের সুযোগ সৃষ্টির মাধ্যমে পর্যটন শিল্পের বিকাশ, দারিদ্র বিমোচন ও কর্মসংস্থানের সুযোগ সৃষ্টি করা;
- ৪। শালবনের বন্যপ্রাণী যেমন বানর, মায়া হরিণ, বেজী, বনরুই, বাঘদাস, বন বিড়াল, খরগোশ, শিয়াল, খেকশিয়াল ও অজগরসহ বিপন্ন বন্যপ্রাণীর নিরাপদ আবাসস্থল সৃষ্টি ও সংরক্ষণ করা;
- ৫। এছাড়া বাঘ, সিংহ, সাম্বার হরিণ, মায়া হরিণ, চিত্রা হরিণ, প্যারা হরিণ এবং অন্যান্য তৃণভোজী বন্যপ্রাণীর প্রাকৃতিক পরিবেশ সংরক্ষণ ও বংশবৃদ্ধির সুযোগ সৃষ্টি করা;
- ৬। গভার, এশীয় হাতী, পারিয়ায়ী পাখী, জলজ পাখী, কালো ভাল্লুক, মিঠা পানির কুমির, লোনা পানির কুমির, নীল গাই, জলহস্তী ইত্যাদি বিপন্ন ও বিলুপ্ত বন্যপ্রাণীর প্রাকৃতিক পরিবেশ সংরক্ষণ;
- ৭। আহত ও উদ্ধারকৃত বন্যপ্রাণীর চিকিৎসার নিমিত্তে বন্যপ্রাণীর সেবাশ্রম ও হাসপাতাল স্থাপন;
- ৮। বন্যপ্রাণী ও জীববৈচিত্র্য সংরক্ষণ সংক্রান্ত শিক্ষা ও গবেষণার সুযোগ সৃষ্টি করা।



সাফারী পার্কে দর্শনীয় স্থান ও বেষ্টিনী

- | | | |
|--|------------------------------|-----------------------------------|
| ১। কোর সাফারী পার্ক (Core Safari Park) | ৭। প্রজাপতি গার্ডেন | ১৩। ম্যাকাউ ল্যান্ড |
| ২। বাঘ সাফারী | ৮। ফেলিস কার্প গার্ডেন | ১৪। 3-D Show |
| ৩। আফ্রিকান সাফারী | ৯। ন্যাচারহিস্ট্রি মিউজিয়াম | ১৫। পর্যবেক্ষণ টাওয়ার |
| ৪। সাদা সিংহ সাফারী | ১০। ফোয়ারা | ১৬। সিংহ পর্যবেক্ষণ রেস্টোরা |
| ৫। সিংহ সাফারী | ১১। তথ্য ও শিক্ষা কেন্দ্র | ১৭। বাঘ পর্যবেক্ষণ রেস্টোরা |
| ৬। হরিণ সাফারী | ১২। বুলন্ত সেতু | ১৮। কচ্ছপ ও কাছিম ব্রিডিং সেন্টার |

১৯। লিজার্ড পার্ক

২০। ফেসি ডার্ক গার্ডেন

২১। ইকো রিসোর্ট

২২। ক্রাউন ফিজেন্ট পাখীশালা

২৩। ধনেশ পাখীশালা

২৪। টিয়া/তোতা পাখীশালা

২৫। কুমির বেস্টনী

২৬। পাখি দ্বীপ

২৭। অর্কিড হাউজ

২৮। শকুন পুনর্বাসন কেন্দ্র

২৯। প্রকৃতি বীক্ষণ কেন্দ্র

৩০। শিশু পার্ক ইত্যাদি

জলবায়ু পরিবর্তন-প্রেক্ষাপট বাংলাদেশ

ভৌগোলিক অবস্থানগত কারণে বাংলাদেশ জলবায়ু পরিবর্তনের শিকার এবং ক্ষতিগ্রস্ত অন্যতম দেশ। অতিবৃষ্টি, অনাবৃষ্টি, বন্যা, খরা, সামুদ্রিক ঝড়, জলোচ্ছ্বাস ইত্যাদি প্রাকৃতিক দুর্যোগ বাংলাদেশের ইতিহাসে নতুন কোনো ঘটনা নয়। কিন্তু বিশ্বজুড়ে নগরায়ন, শিল্পবিপ্লব, নির্বিচারে বন নিধন ইত্যাদি অনিয়ন্ত্রিত কর্মকাণ্ডে পৃথিবীর উষ্ণতা বৃদ্ধি ও জলবায়ু পরিবর্তনের বিরূপ প্রভাবের ফলশ্রুতিতে প্রাকৃতিক দুর্যোগের ব্যাপ্তি, প্রকোপ ও আবর্তকালের পরিবর্তন জনপদকে আরও ঝুঁকিপূর্ণ করেছে। সে সাথে যোগ হয়েছে প্রাকৃতিক দুর্যোগের নতুনমাত্রা; যেমন- জলাবদ্ধতা, মরুময়তা, উপকূলীয় অঞ্চলের প্রায় ১৮ শতাংশ সমুদ্রগর্ভে তলিয়ে যাওয়ার সম্ভাবনা, উপকূলীয় অঞ্চলে কৃষিজমির লবণাক্ততা বৃদ্ধি এবং সর্বোপরি খাদ্য নিরাপত্তার হুমকি। বাংলাদেশ আজ ভৌগোলিক অবস্থান ও জলবায়ু পরিবর্তনের কারণে প্রাকৃতিক দুর্যোগের চরম ঝুঁকিপূর্ণ দেশগুলোর অন্যতম। বাংলাদেশকে এ জলবায়ু পরিবর্তনের জন্য দায়ী করা না গেলেও এ দেশ জলবায়ু পরিবর্তনে সৃষ্ট বিরূপ প্রভাবের নির্মম শিকার। সরকার এ সমস্যা মোকাবেলায় ইতোমধ্যে বিভিন্ন পদক্ষেপ গ্রহণ করেছে; যেমন- প্রাকৃতিক দুর্যোগের পূর্বাভাস সম্প্রচার, ঘূর্ণিঝড় আশ্রয়কেন্দ্র স্থাপন, উপকূলীয় এলাকায় বসবাসকারী মানুষকে যথাসময়ে নিরাপদ স্থানে স্থানান্তর, দ্রুত ত্রাণ সামগ্রী সরবরাহ, উপকূলীয় বাঁধ তৈরী, বাঁধ ও বাঁধ সংলগ্ন চর এলাকায় বনায়নের মাধ্যমে সবুজ বেষ্টিনী সৃষ্টি। কিন্তু নতুন মাত্রার প্রাকৃতিক দুর্যোগ এবং জলবায়ু পরিবর্তনের বিরূপ প্রভাব নিরসনে আরও প্রয়োজন আন্তর্জাতিক সহযোগিতা ও সমন্বিত প্রয়াস। আন্তর্জাতিক পর্যায়ে জলবায়ু পরিবর্তন গ্রহণযোগ্য মাত্রায় রাখতে ও এর বিরূপ প্রভাব মোকাবেলায় ১৯৯২ সনে স্বাক্ষরিত জাতিসংঘের কাঠামোগত কনভেনশন UNFCCC এবং এর আওতায় প্রণীত ক্যিওটো প্রটোকল অনুযায়ী জলবায়ু পরিবর্তনের জন্য দায়ী উন্নত দেশসমূহ উন্নয়নশীল ও পরিবর্তিত অর্থনীতির দেশসমূহকে আর্থিক ও কারিগরি সহায়তা প্রদানের আশ্বাস দিলেও তা খুব একটা আশানুরূপভাবে বাস্তবায়ন হয়নি। তাই উন্নয়নশীল দেশ ও পরিবর্তিত অর্থনীতির দেশসমূহ উন্নত দেশসমূহের সহায়তার আশ্বাসকে আইনী কাঠামোতে অন্তর্ভুক্তির জন্য জোর চেষ্টা চালিয়ে যাচ্ছে। বাংলাদেশ এ বিষয়ে গুরুত্বপূর্ণ ভূমিকা পালন করে যাচ্ছে। ২০২০ সালের মধ্যেই এ ধরনের আইনী কাঠামো গঠন করা সম্ভব হবে বলে সংশ্লিষ্ট বিশেষজ্ঞগণ আশা প্রকাশ করেছেন। এক্ষেত্রে BCCSAP প্রণয়নের কথা উল্লেখ করা যেতে পারে। প্রাকৃতিক দুর্যোগ রোধে উপকূলে জেগে ওঠা চর বনায়নের মাধ্যমে সবুজ বেষ্টিনী স্থাপনের লক্ষ্যে ৫১২ কি.মি. এলাকাজুড়ে আগামী ৫ বছরে প্রস্তাবিত “Coastal Afforestation in Newly Accreted Chars of Bay of Bengal” শীর্ষক প্রকল্পের আওতায় প্রায় ২৫০০০ হেক্টর ম্যানগ্রোভ বাগান সৃজনের লক্ষ্যমাত্রা নির্ধারণ করা হয়।

বন সেक्टरের সাম্প্রতিক কার্যক্রম ও অগ্রগতি

দেশের বনজ সম্পদ, বন্যপ্রাণী ও জীববৈচিত্র্য সংরক্ষণ, বন ও বৃক্ষাচ্ছাদন বৃদ্ধি, ভূমির ক্ষয় রোধ, দেশের মরুময়তা হ্রাস, কার্বন আধার সৃষ্টি, প্রাকৃতিক দুর্যোগ মোকাবেলা, গ্রাম বাংলার দরিদ্র মহিলাসহ সাধারণ মানুষের আর্থসামাজিক উন্নয়ন, দারিদ্র বিমোচন এবং জলবায়ু পরিবর্তন জনিত নেতিবাচক প্রভাব মোকাবেলাসহ পরিবেশের ভারসাম্য রক্ষার উদ্দেশ্যে বন অধিদপ্তর বিভিন্ন উন্নয়ন কার্যক্রম বাস্তবায়ন করে থাকে। অংশীদারিত্বমূলক সামাজিক বনায়নসহ বনায়ন কার্যক্রম ও

দেশব্যাপী বৃক্ষরোপণের ফলে দেশে মোট বৃক্ষাচ্ছাদিত ভূমির পরিমাণ ২২.৩৭ শতাংশে উন্নীত হয়েছে। ৮ম পঞ্চবার্ষিকী পরিকল্পনা (২০২১-২০২৫) অনুযায়ী দেশের বৃক্ষাচ্ছাদনের পরিমাণ ২৪ শতাংশ উন্নীত করার লক্ষ্যে বন অধিদপ্তরের বনায়ন ও বন সংরক্ষণ কার্যক্রম অব্যাহত রয়েছে। এছাড়া সরকারী বনাঞ্চলে বনায়নের পাশাপাশি বনের বাইরের এলাকা, উপকূলীয় অঞ্চলে জেগে উঠা চর ভূমি এবং সকল ধরনের প্রান্তিক ভূমি বনায়নের আওতায় আনা হচ্ছে। এ সকল কার্যক্রমকে অব্যাহত রাখার জন্য বন অধিদপ্তর বিভিন্ন উন্নয়ন প্রকল্প বাস্তবায়ন করে আসছে। ২০২১-২২ আর্থিক সালে বন অধিদপ্তর-এর আওতায় বাস্তবায়িত এডিপিভুক্ত ২২ টি উন্নয়ন প্রকল্প (১৬টি বিনিয়োগ, ০২টি কারিগরী প্রকল্প ও ০৪টি সমীক্ষা প্রকল্প) চলমান রয়েছে। ২০২১-২২ আর্থিক সালের উন্নয়ন প্রকল্পের মোট বরাদ্দ ৪২২৫৭.০০ লক্ষ টাকা (জিওবি-১৭৩৩৬.০০ লক্ষ টাকা এবং বৈদেশিক সহায়তা-২৪৯২১.০০ লক্ষ টাকা) মাত্র।

প্রকল্প তালিকা

বিনিয়োগ প্রকল্প:

১. বঙ্গবন্ধু শেখ মুজিব সাফারী পার্ক, গাজীপুরের এ্যাপ্রোচ সড়ক প্রশস্তকরণ ও প্রয়োজনীয় অবকাঠামো উন্নয়ন প্রকল্প (৩য় বার সংশোধিত) (জানুয়ারি ২০২১ হতে ডিসেম্বর ২০২২ পর্যন্ত)।
২. বাংলাদেশের বনাঞ্চলী সংরক্ষণ ও আবাসস্থল উন্নয়ন প্রকল্প (১ম বার সংশোধিত) (জুলাই ২০১৭ হতে জুন ২০২২ পর্যন্ত)।
৩. শেখ রাসেল এ্যাবিয়ারী এ্যাম্ব ইকো-পার্ক, রাঙুনিয়া, চট্টগ্রাম প্রকল্প (জানুয়ারি ২০১৮ হতে জুন ২০২১ পর্যন্ত)।
৪. বঙ্গোপসাগরে জেগে ওঠা নতুন চরসহ উপকূলীয় এলাকায় বনায়ন প্রকল্প (১ম বার সংশোধিত) (জানুয়ারি ২০১৮ হতে ডিসেম্বর ২০২২ পর্যন্ত)।
৫. স্থানীয় নৃগোষ্ঠী জনগণের সহায়তায় মধুপুর জাতীয় উদ্যানের ইকোটুরিজম উন্নয়ন ও টেকসই ব্যবস্থাপনা প্রকল্প (১ম সংশোধিত) (জুলাই ২০১৮ হতে জুন ২০২২ পর্যন্ত)।
৬. টেকসই বন ও জীবিকা (সুফল) প্রকল্প (জুলাই ২০১৮ হতে জুন ২০২৩ পর্যন্ত)।
৭. জাতীয় উদ্ভিদ উদ্যানের মাস্টার প্ল্যান হালনাগাদ করণ এবং বাস্তুসংস্থান সংরক্ষণসহ অত্যাৱশ্যকীয় অবকাঠামো সংস্কার/উন্নয়ন প্রকল্প (১ম বার সংশোধিত) (জুলাই ২০১৮ হতে জুন ২০২২ পর্যন্ত)।
৮. বঙ্গবন্ধু শেখ মুজিব সাফারী পার্ক, কক্সবাজার এর অধিকতর উন্নয়ন ও সম্প্রসারণ (২য় পর্যায়) প্রকল্প (জুলাই ২০১৯ হতে জুন ২০২২ পর্যন্ত)।
৯. কক্সবাজার জেলায় সবুজ বেটনী সৃজন, প্রতিবেশ পুনরুদ্ধার এবং ইকো-টুরিজম উন্নয়ন প্রকল্প (জুলাই ২০১৯ হতে জুন ২০২৪ পর্যন্ত)।
১০. জলবায়ু পরিবর্তনের বিরূপ প্রভাব নিরসনে সিলেট বিভাগে পুনঃবনায়ন ও অবকাঠামো উন্নয়ন প্রকল্প (জুলাই ২০১৯ হতে জুন ২০২৪ পর্যন্ত)।
১১. মহামায়া ইকো-পার্কের জীববৈচিত্র্য সংরক্ষণ ও প্রতিবেশ উন্নয়ন প্রকল্প (জানুয়ারী ২০২০ হতে ডিসেম্বর ২০২৪ পর্যন্ত)
১২. মাদারীপুর জেলার আওতায় বিদ্যমান চরমুগুরিয়া ইকো-পার্কের আধুনিকায়ন প্রকল্প (জানুয়ারি ২০২০ হতে ডিসেম্বর ২০২২ পর্যন্ত)।

১৩. সুন্দরবন পরিবেশবান্ধব পর্যটন (ইকোট্যুরিজম) সুবিধা সম্প্রসারণ ও উন্নয়ন প্রকল্প (জানুয়ারি ২০২০ হতে ডিসেম্বর ২০২২ পর্যন্ত)।
১৪. চর উন্নয়ন ও বসতি স্থাপন প্রকল্প-ব্রিজিং (সিডিএসপি-বি) (বন অধিদপ্তর অঙ্গ) (সিডিএসপি-অতিরিক্ত অর্থায়ন) (জুলাই ২০২০ হতে সেপ্টেম্বর ২০২২ পর্যন্ত)।
১৫. সুন্দরবন সুরক্ষা প্রকল্প (জানুয়ারি, ২০২১ হতে ডিসেম্বর, ২০২৪)
১৬. সামাজিক বনায়নের মাধ্যমে রাজশাহী বরেন্দ্র অঞ্চলের পরিবেশ সুরক্ষা (মার্চ, ২০২১ হতে জুন, ২০২৫)

কারিগরী প্রকল্পঃ

১. Strategic Environmental Assessment (SEA) of South West Region of Bangladesh for Conserving Outstanding Universal Value of the Sundarban (1st revised) (অক্টোবর, ২০১৯ হতে জুন, ২০২২)
২. সুন্দরবন ব্যবস্থাপনা সহায়তা প্রকল্প-২য় পর্যায় (SMP-II) (মে ২০১৯ হতে এপ্রিল ২০২২)

সমীক্ষা প্রকল্পঃ

1. Feasibility Study of Trans boundary Wildlife corridor in Chattogram, Chattogram Hill Tract and Cox's Bazar with Myanmar and India (জুলাই ২০২০ হতে জুন ২০২১ পর্যন্ত)।
2. Preparation of Master Plan and Feasibility Study for establishment of Bangabandhu Sheikh Mujib Safari Park at Moulvibazar (জুলাই ২০২০ হতে জুন ২০২১ পর্যন্ত)।
3. Feasibility Study for installing and operating cable car and preparation of Master Plan for Madhabkundo Eco-Park (জুলাই ২০২০ হতে জুন ২০২১ পর্যন্ত)।
4. ফিজিবিলিটি স্টাডি ফর ইনফ্রাস্ট্রাকচারাল ডেভেলপমেন্ট গ্র্যান্ড রিনোভেশন ওয়ার্কস অব এক্সিস্টিং স্ট্রাকচার অব ফরেস্ট ডিপার্টমেন্ট (জুলাই ২০২১ হতে জুন ২০২২)।

জলবায়ু পরিবর্তন ট্রাস্ট ফান্ডের প্রকল্পঃ

১. কুকরী-মুকরী ইকোপার্ক স্থাপন প্রকল্প (জুলাই ২০১৭ হতে ডিসেম্বর ২০২২ পর্যন্ত)।
২. মানুষ-হাতি দ্বন্দ্ব নিরসনে সৌর বেটনী স্থাপন প্রকল্প (জুলাই ২০১৭ হতে জুন ২০২২ পর্যন্ত)
৩. জলবায়ু পরিবর্তনের বিরূপ প্রভাব মোকাবেলায় সারাদেশব্যাপী ব্যাপক বনায়নের লক্ষ্যে চারা উত্তোলন (৩য় পর্যায়) প্রকল্প (জুলাই ২০১৮ হতে ডিসেম্বর ২০২২ পর্যন্ত)।
৪. চরফ্যাশন রেঞ্জের অবকাঠামো উন্নয়ন প্রকল্প (ডিসেম্বর ২০১৮ হতে ডিসেম্বর ২০২২ পর্যন্ত)।
৫. খুলনা জেলায় শেখ রাসেল ইকো পার্ক স্থাপন প্রকল্প (জুন ২০১৮ হতে জুন ২০২২ পর্যন্ত)।
৬. সিরাজগঞ্জ জেলাধীন কাজিপুর উপজেলায় সমন্বিত বনায়নের মাধ্যমে যমুনা নদীর চরাঞ্চল ও নাটুয়ার পাড়া বন্যা নিয়ন্ত্রণ বাঁধ রক্ষা প্রকল্প (নভেম্বর ২০১৮ হতে জুন ২০২২ পর্যন্ত)।
৭. সুন্দরবনে টেলি-যোগাযোগ ব্যবস্থার পুনঃস্থাপন প্রকল্প (১ম সংশোধিত) (সেপ্টেম্বর ২০১৮ হতে ডিসেম্বর ২০২১ পর্যন্ত)।

৮. জলবায়ু পরিবর্তনের বিরূপ প্রভাব মোকাবেলায় পরিবেশের ভারসাম্য ও জীববৈচিত্র্য সংরক্ষণের জন্য প্রচারের মাধ্যমে জনগণকে বৃক্ষ রোপণে উদ্বুদ্ধকরণ প্রকল্প (১ম সংশোধিত) (নভেম্বর ২০১৮ হতে ডিসেম্বর ২০২২ পর্যন্ত)।
৯. টেকসই বন ব্যবস্থাপনার লক্ষ্যে সুন্দরবনে সুপেয় পানীয় জল সরবরাহের জন্য পুকুর খনন ও পুনঃখনন প্রকল্প নভেম্বর ২০১৯ হতে ডিসেম্বর ২০২২ পর্যন্ত)।

টেকসই বন ও জীবিকা (সুফল) প্রকল্প

পরিবেশ, বন ও জলবায়ু পরিবর্তন মন্ত্রণালয়ের অধীনে বন অধিদপ্তর বিশ্বব্যাংকের ঋণ সহায়তা ও সরকারী অনুদানে ০১ জুলাই ২০১৮ হতে ৩০ জুন ২০২৩ পর্যন্ত মেয়াদে টেকসই বন ও জীবিকা (সুফল) প্রকল্প বাস্তবায়ন করছে। প্রকল্পটির মোট প্রাক্কলিত ব্যয় ১,৫০,২৭২.১৭ লক্ষ টাকা। বিশ্ব ব্যাংকের ঋণ সহায়তা ১,৪৭,০০০.০০ লক্ষ টাকা এবং জিওবি অনুদান ৩,২৭২.১৭ লক্ষ টাকা। প্রকল্পটি দেশের মোট ০৮ টি বিভাগের ২৮ টি জেলার ১৬৫ টি উপজেলায় বিস্তৃত। ২৬টি বন বিভাগীয় কার্যালয়ের মাধ্যমে মাঠ পর্যায়ে প্রকল্পটির কার্যক্রম বাস্তবায়ন করা হচ্ছে। প্রকল্পটি বাস্তবায়নের মাধ্যমে বন অধিদপ্তরের প্রাতিষ্ঠানিক উন্নয়ন, তথ্য প্রযুক্তির ব্যবহার, সহযোগীতা মূলক বন ব্যবস্থাপনা প্রবর্তন, বন নিষেধ জনগোষ্ঠীর বিদ্যমান বনের উপর নির্ভরশীলতা হ্রাস ও তাদের আর্থ-সামাজিক উন্নয়ন, বন্যপ্রাণী সংরক্ষণ, বৃক্ষাচ্ছাদন বৃদ্ধি এবং সর্বোপরি টেকসই বন ব্যবস্থাপনা নিশ্চিত হবে।

প্রকল্পের মূল উদ্দেশ্যঃ

ক) মূল উদ্দেশ্যঃ

প্রকল্পের মূল উদ্দেশ্য হলো-সহযোগীতামূলক বন ব্যবস্থাপনার উন্নয়ন এবং প্রকল্প এলাকায় বন নির্ভর স্থানীয় জনগোষ্ঠীর বিকল্প আয়-বর্ধক কাজের সুযোগ বৃদ্ধি।

খ) সুনির্দিষ্ট উদ্দেশ্যঃ

- ১) প্রাতিষ্ঠানিক শক্তিশালীকরণ, তথ্য ব্যবস্থাপনা ও প্রশিক্ষণ প্রদান;
- ২) সহযোগীতামূলক বন ব্যবস্থাপনা শক্তিশালীকরণ এবং রক্ষিত এলাকার উন্নয়ন;
- ৩) প্রকল্প এলাকার বন নির্ভর জনগোষ্ঠীর বিকল্প আয়-বর্ধক কাজের সুযোগ বৃদ্ধি, বন সম্প্রসারণ এবং বনের বাহিরে বৃক্ষাচ্ছাদন বৃদ্ধি; এবং
- ৪) প্রকল্প ব্যবস্থাপনা, পরিবীক্ষণ এবং রিপোর্টিং।

প্রকল্পের কার্যক্রমঃ

প্রকল্পের কার্যক্রম সমূহ নিম্নরূপ চারটি অঙ্গের আওতায় শ্রেণিবদ্ধ করা হয়েছেঃ

অঙ্গ-১। প্রাতিষ্ঠানিক দক্ষতা ও তথ্য ব্যবস্থাপনা শক্তিশালীকরণ এবং প্রশিক্ষণ প্রদানঃ

- বন অধিদপ্তরের প্রশাসনিক এবং পরিচালনা পদ্ধতি পর্যালোচনা, প্রাতিষ্ঠানিক সংস্কার প্রস্তাব এবং ফরেষ্ট ম্যানুয়েল হালানাগাদ করণ;
- সহযোগীতামূলক বন ও রক্ষিত এলাকার ব্যবস্থাপনা পরিকল্পনা, পরিচালনা ও নিরীক্ষণের জন্য প্রযুক্তি নির্ভর তথ্য ব্যবস্থা প্রতিষ্ঠা করা;
- ৭.৫ লক্ষ উন্নত চারা উত্তোলনের জন্য চট্টগ্রাম, গাজীপুর এবং যশোরের সামাজিক বনায়ন নার্সারি ও ট্রেনিং সেন্টারে ৩টি টিস্যু কালচার ল্যাব প্রতিষ্ঠা;

- উন্নত পদ্ধতিতে চারা উত্তোলনে ২,০০০ নার্সারি মালিক এবং আধুনিক করাতকল ব্যবস্থাপনায় ১,০০০ করাতকল মালিক-কে প্রশিক্ষণ প্রদান;
- সহযোগিতামূলক বন ব্যবস্থাপনা ও রক্ষিত এলাকা ব্যবস্থাপনা পদ্ধতি সম্পর্কে জ্ঞান ও দক্ষতা বৃদ্ধিতে বন অধিদপ্তরের ১,১৫৯ জন কর্মকর্তা-কর্মচারীকে প্রশিক্ষণ প্রদান;
- বন ও বন্যপ্রাণী বিষয়ের প্রযুক্তিগত ও ফলিত গবেষনার দ্বারা উন্মোচন; এবং
- ২০ লক্ষ জনগণের সচেতনতা বৃদ্ধি ও উদ্বুদ্ধ করার লক্ষ্যে গণযোগাযোগ, জনসংযোগ কার্যক্রম এবং বিভিন্ন গুরুত্বপূর্ণ দিবস উদযাপন।

অঙ্গ-২। সহযোগিতামূলক বন এবং রক্ষিত এলাকা ব্যবস্থাপনা শক্তিশালীকরণঃ

- বনায়নে স্থান-ভিত্তিক পরিকল্পনা (এসএসপি) প্রণয়নের মাধ্যমে বন পুনরুদ্ধার;
- চট্টগ্রাম (উত্তর ও দক্ষিণ), কক্সবাজার (উত্তর ও দক্ষিণ) এবং সিলেট বন বিভাগের নিমিত্ত সহযোগিতামূলক বন ব্যবস্থাপনা পরিকল্পনা প্রণয়ন;
- বন্যপ্রাণী ও জীববৈচিত্র্য সংরক্ষণে রক্ষিত এলাকার ব্যবস্থাপনা পরিকল্পনা প্রণয়ন, স্মার্ট পেটোলিং ও প্রতিবেশ সেবার মূল্য নির্ধারণ;
- ৫২,৭২০ হেক্টর অবক্ষয়িত ও বৃক্ষশূন্য পাহাড়ি ও সমতল বনভূমিতে বনাচ্ছাদন বৃদ্ধি;
- ২৪,৮৮০ হেক্টর উপকূলীয় চরে ম্যানগ্রোভ বাগান সৃজন;
- ২,৫০০ হেক্টর বন্যপ্রাণীর আবাসস্থল এবং ১,৩৩০ হেক্টর বন্যপ্রাণীর করিডোর উন্নয়ন;
- সংকটাপন্ন বন্যপ্রাণী সংরক্ষণ, উদ্ভিদের রেডলিস্টিং এবং আত্মসী প্রজাতির উদ্ভিদের নিয়ন্ত্রণ পরিকল্পনা প্রণয়ন;
- শেখ কামাল ওয়াইল্ডলাইফ সেন্টার, গাজীপুরের কার্যক্রম কার্যকর ও শক্তিশালীকরণ;
- মাঠ পর্যায়ের অফিস ও আবাসিক ভবন নির্মাণ ও সম্প্রসারণ।

অঙ্গ-৩। বন নির্ভর জনগোষ্ঠীর বিকল্প আয়-বর্ধক কাজের সুযোগ বৃদ্ধি ও বন সম্প্রসারণঃ

- বন ও রক্ষিত এলাকা সংলগ্ন ৬০০ গ্রামের ৪০,০০০টি বন নির্ভর পরিবারকে সহযোগিতামূলক বন ব্যবস্থাপনায় সম্পৃক্তকরণ;
- ৭টি এনজিও নিয়োগের মাধ্যমে ৬০০ গ্রামে সহযোগিতামূলক বন ব্যবস্থাপনা কমিটি গঠন ও প্রাতিষ্ঠানিকীকরণ;
- ১০,৮০০ জন সহযোগিতামূলক বন ব্যবস্থাপনা কমিটির সদস্যদের সক্ষমতা বৃদ্ধি;
- ৬৩.৫ লক্ষ চারা উত্তোলন ও বিতরণের মাধ্যমে বনের বাইরে বৃক্ষাচ্ছাদন বৃদ্ধি;
- ৩,৪৬০ কিলোমিটার ফ্রিট বাগান সৃজন;
- ৪০ বছরে ৩৩.০ মিলিয়ন টন কার্বন মজুদ বৃদ্ধি।

অঙ্গ-৪। প্রকল্প ব্যবস্থাপনা, পরিবীক্ষণ এবং রিপোর্টিংঃ

- কম্পিউটার-ভিত্তিক হিসাব-ব্যবস্থাপনা পদ্ধতির উন্নয়ন;
- ৪০,০০০ সহযোগিতামূলক বন ব্যবস্থাপনা সদস্যের অনলাইন ডাটাবেজ তৈরি;
- বনায়ন পরিবীক্ষণে রিমোট সেন্সিং ইমেজ ব্যবহার।

প্রকল্পটি বাস্তবায়নের মাধ্যমে দেশের সরকারি বন ব্যবস্থাপনায় সংশ্লিষ্ট প্রতিষ্ঠানসমূহ শক্তিশালীকরণ ও তথ্য ব্যবস্থাপনায় তথ্যপ্রযুক্তির প্রয়োগ বৃদ্ধিসহ অবক্ষয়িত বনাঞ্চল পুনরুদ্ধার, উপকূলীয় বনায়ন, বনের বাহিরে বৃক্ষাচ্ছাদন বৃদ্ধি, রক্ষিত এলাকার উন্নয়ন ও বন্যপ্রাণী ও

জীববৈচিত্র্য সংরক্ষণ করা হবে। অধিকন্তু, বন-নির্ভর জনগোষ্ঠীর বনের উপর নির্ভরশীলতা হ্রাসে বিকল্প জীবিকা কার্যক্রম ও জীবন-মান উন্নয়নে সহযোগীতামূলক বন ব্যবস্থাপনা (Collaborative Forest Management) কার্যক্রম বাস্তবায়ন ও শক্তিশালী করা হবে। প্রকল্প মেয়াদে দেশের ১৭ টি বন বিভাগে সংকটাপন্ন ও বিরল দেশীয় প্রজাতির চারা উত্তোলন, বনায়ন ও বিতরণ করা হবে; যা নিম্নোক্ত টেবিলে দেয়া হল।

টেবিলঃ সুফল প্রকল্পের বনায়নের লক্ষ্যমাত্রা

ক্রমিক নং	বনায়নের ধরণ	একক	মোট বনায়ন	চারার সংখ্যা
১।	রিফরেষ্টেশন	হেক্টর	৫৪,৮৯০	৯৯৩.৪১
২।	এনটিএফপি আন্ডারপ্লান্টিং	হেক্টর	১,৬৩০	৩২.১৩
৩।	ম্যানগ্রোভ বনায়ন	হেক্টর	২১,০৮০	৯৩৬.৮০
৪।	গোলপাতা বনায়ন	সিডলিং কিমি	১,৩৩০	১৩.৩০
৫।	স্ট্রিপ বনায়ন	সিডলিং কিমি	৩,৪৬০	৩৪.৬০
৬।	চারা বিতরণ	লক্ষ চারা	৬৪	৬৩.৫০
		মোট		২০৭৩.৭৪

উল্লেখ্য যে, ২০১৮-১৯ এবং ২০১৯-২০ অর্থবছরে মোট ১৮,৯১৯ হেক্টর বনায়ন সম্পন্ন করা হয়েছে এবং আরও ১৯,৮৭০ হেক্টর বনায়নের চারা নার্সারীতে উত্তোলিত হয়েছে যা ২০২০-২১ অর্থবছরে রোপিত হবে। প্রকল্পের আওতায় গৃহীত বনায়ন কার্যক্রম বাস্তবায়নের প্রারম্ভে সাইট স্পেসিফিক প্লানিং (এসএসপি) প্রণয়ন করার উদ্যোগ নেয়া হয়েছে। সে অনুযায়ী ইতোমধ্যে এসএসপি প্রণয়নের গাইড লাইন প্রস্তুত ও মাঠ পর্যায়ে ২০১৮-২০১৯ অর্থ বছরের ৭,৪১২ হেক্টর ও ১০০ সিডলিং কিলোমিটার এবং ২০১৯-২০২০ অর্থ বছরে মাঠপর্যায়ের কর্মকর্তা/কর্মচারীগণের প্রশিক্ষণ প্রদানের মাধ্যমে ৫,৬৬৭ হেক্টর ও ২৮২ সিডলিং কিলোমিটার এবং ২০২০-২০২১ অর্থ বছরে ১,৬৫৫ হেক্টর বনাঞ্চলের জন্য এসএসপি প্রণয়ন করা হয়েছে। আরো ৩৫,০০০ হেক্টর এলাকায় এসএসপি কার্যক্রম সম্পাদন এবং ও,ডি,কে-ভিত্তিক অন-লাইন ড্যাসবোর্ড তৈরীর কাজ চলমান রয়েছে। প্রকল্পের লক্ষ্যমাত্রা অনুযায়ী ১,৯৮৭ জন বন অধিদপ্তরের কর্মকর্তা/কর্মচারীকে বিভিন্ন মেয়াদী প্রশিক্ষণ দেয়া হয়েছে। ফলে, বন ব্যবস্থাপনায় সম্পৃক্ত কর্মকর্তা/কর্মচারীদের সক্ষমতা সমৃদ্ধ হতে পারে।

প্রকল্পের আওতায় বিভিন্ন রক্ষিত এলাকায় বন্যপ্রাণীর বাসস্থান ও করিডোর উন্নয়নের জন্য বিশেষ বনায়ন কার্যক্রম বাস্তবায়ন করা হচ্ছে। পাশাপাশি সংকটাপন্ন ও বিপদাপন্ন নিম্নলিখিত প্রাণি সংরক্ষণের বিশেষ পদক্ষেপ গ্রহণ করা হয়েছে।

- হাতি-মানুষের দ্বন্দ্ব নিরসণ;
- সার্ক ও রে প্রজাতির সংরক্ষণ কৌশল তৈরী;
- ঘরিয়াল সংরক্ষণ;
- শকুন সংরক্ষণ;
- ডলফিন সংরক্ষণ;
- শিকারী পাখি সংরক্ষণ ইত্যাদি।

প্রকল্পের আওতায় বন নির্ভর জনগোষ্ঠীকে গ্রাম-পর্যায়ে সংগঠিত করে বন অধিদপ্তরের মাঠ-পর্যায়ের বন বিট সমূহের সাথে সম্পৃক্ত করার পদক্ষেপ গ্রহণ করা হয়েছে। ১৭টি বন বিভাগের আওতাধীন প্রায় ৬০০ টি গ্রামের প্রায় ৪০,০০০ বন নির্ভর জনগোষ্ঠীকে সহযোগীতামূলক বন ব্যবস্থাপনা সংগঠন তৈরী ও কার্যকর করার কাজে সম্পৃক্ত করা হচ্ছে। পাশাপাশি প্রকল্পের আওতায় তাদের বিকল্প জীবিকার সংস্থান করা হবে। প্রকল্পের আওতায় বনায়ন কার্যক্রম এর সাথে সাথে প্রতিটি (সহযোগীতামূলক) গ্রাম-সংগঠনকে আর্থিক অনুদান প্রদান করা হবে। ফলে, বনের বৃক্ষাচ্ছাদন বৃদ্ধি পাবে, বনের বাহিরে বৃক্ষাচ্ছাদন বৃদ্ধির উপযুক্ত পরিবেশ সৃষ্টি হবে, উপকূলীয় তটরেখা সুরক্ষা পাবে এবং অতিদরিদ্র-বিপদাপন্ন নারী ও ক্ষুদ্র নৃ-গোষ্ঠীসহ সাধারণ জনগোষ্ঠীর কর্মসংস্থান বৃদ্ধি পাবে। অধিকন্তু এ প্রকল্পের আওতায় দেশের ১০টি রক্ষিত এলাকায় সহ-ব্যবস্থাপনা (PA Co-Management) পদ্ধতি সম্প্রসারণসহ আরো ১৬টি রক্ষিত এলাকায় বিদ্যমান সহ-ব্যবস্থাপনা কার্যক্রমকে শক্তিশালী করা হবে। উল্লেখিত কাজ সঠিক ভাবে বাস্তবায়নে ৭ টি বেসরকারী উন্নয়ন সংস্থাকে (NGO) নিয়োগের কাজ চলমান রয়েছে; যার মাধ্যমে প্রয়োজনীয় গ্রাম জরীপ, কমিউনিটি প্রোফাইলিং, বিভিন্ন কমিটি গঠন, সংগঠন ব্যবস্থাপনা প্রশিক্ষণ, বিকল্প জীবিকার প্রশিক্ষণ, মনিটরিং এবং অন্যান্য সহায়তা প্রদান করা হবে। সহযোগীতামূলক বন ব্যবস্থাপনার সফল বাস্তবায়নের মাধ্যমে বনভূমি সংলগ্ন দরিদ্র জনগোষ্ঠীর বনজ সম্পদের উপর নির্ভরতা কমে আসবে; ফলে, বন ও বন্যপ্রাণী রক্ষা পাবে। প্রকল্পের আওতায় সংকটাপন্ন বন্যপ্রাণী সংরক্ষণেও বিশেষ কার্যক্রম গ্রহণ করা হচ্ছে। প্রকল্পটির সফল বাস্তবায়ন বাংলাদেশকে বৈশ্বিক টেকসই উন্নয়ন অভ্যন্তর (Sustainable Development Goals) এর বন আচ্ছাদন বৃদ্ধি, কার্বন সংরক্ষণ, রক্ষিত এলাকা সম্প্রসারণ, জীববৈচিত্র্য সংরক্ষণসহ বেশকিছু উন্নয়ন সূচকে অগ্রগতি অর্জনে সহায়তা করবে।



ছবিঃ সুফল প্রকল্পের আওতায় সৃজিত এনরিচমেন্ট বনায়ন



ছবিঃ সুফল প্রকল্পের নার্সারিতে দেশীয় প্রজাতির উত্তোলিত চারা



ছবিঃ সুফল প্রকল্পের আওতায় এসএসপি প্রশিক্ষণ

বাংলাদেশের ডলফিন সংরক্ষণে গৃহীত পদক্ষেপ সমূহ

দেশের জলজ জীববৈচিত্র্য বিশেষ করে ডলফিন সংরক্ষণের টেকসই ব্যবস্থাপনার লক্ষ্যে বেশ কিছু উল্লেখযোগ্য পদক্ষেপ গ্রহণ করা হয়েছে। এর মধ্যে সম্পাদিত প্রধান প্রধান কার্যক্রম গুলো হলো:

১। বাংলাদেশের বিদ্যমান ছয়টি ডলফিন অভয়ারণ্যের সাথে সুন্দরবনের ডলফিনের হটস্পট গুলো চিহ্নিত করে নতুন তিনটি রক্ষিত এলাকা ঘোষণা করা হয়েছে। ডলফিনের জন্য ঘোষিত বাংলাদেশের মোট নয়টি রক্ষিত এলাকা হলো:

ক্রমিক	রক্ষিত এলাকার নাম	অবস্থান	আয়তন (হেঃ)
১	দুধমুখী বন্যপ্রাণী অভয়ারণ্য (ডলফিন)	সুন্দরবন	১৭০
২	চাঁদপাই বন্যপ্রাণী অভয়ারণ্য (ডলফিন)	সুন্দরবন	৫৬০
৩	ঢাংমারী বন্যপ্রাণী অভয়ারণ্য (ডলফিন)	সুন্দরবন	৩৪০
৪	নাজিরগঞ্জ বন্যপ্রাণী অভয়ারণ্য (ডলফিন)	পাবনা	১৪৬
৫	শিলন্দা-নাগডেমরা বন্যপ্রাণী অভয়ারণ্য (ডলফিন)	পাবনা	২৪.১৭
৬	নাগরবাড়ি-মোহনগঞ্জ বন্যপ্রাণী অভয়ারণ্য (ডলফিন)	পাবনা	৪০৮.১১
৭	পানখালী বন্যপ্রাণী অভয়ারণ্য (ডলফিন)	সুন্দরবন	৪০৪
৮	শিবসা বন্যপ্রাণী অভয়ারণ্য (ডলফিন)	সুন্দরবন	২১৫৫
৯	ভদ্রা বন্যপ্রাণী অভয়ারণ্য (ডলফিন)	সুন্দরবন	৮৬৮
		মোট	৫০৭৫.২৮

২। ডলফিনের গবেষণার ঘাটতি বিশ্লেষণ এবং আবাসস্থল সংরক্ষণ সম্পর্কিত প্রয়োজনীয় সকল তথ্যাবলী সংগ্রহ, সংরক্ষণ ও ব্যবহারের ব্যবস্থা করা হয়েছে।

৩। হালদা নদীতে ডলফিনের সংখ্যা নির্ণয় এবং ব্যবস্থাপনা পরিকল্পনা প্রণয়ন করা হয়েছে।

৪। সমাজ ভিত্তিক সম্পদ ব্যবহার ও কার্যকরী ব্যবস্থাপনা পরিকল্পনা প্রণয়ন, উন্নয়ন ও তার বাস্তবিক প্রয়োগ নিশ্চিত করা হয়েছে।

৫। পাঁচটি গুরুত্বপূর্ণ সেক্টর অর্থাৎ ট্যুরিজম, ফিসারিজ, একুয়াকালচার, কমার্স ও ইন্ডাস্ট্রি এবং ম্যারিটাইম ট্রাফিকিং এর জন্য গাইডলাইন প্রণয়ন করা হয়েছে।

৬। ডলফিন এ্যাকশন প্লান এবং সমগ্র বাংলাদেশের জন্য এটলাস প্রস্তুত করা হয়েছে।

৭। ডলফিন সংরক্ষণের জন্য ৭০ (সত্তর) জন সদস্য বিশিষ্ট ০৭ (সাতটি) ডলফিন কনজারভেশন দল গঠন করা হয়েছে।

৮। মৎস্য সম্পদের উপর নির্ভরশীল ১০০০ (এক হাজার) পরিবারকে প্রশিক্ষণ প্রদান এবং বিকল্প আয় বৃদ্ধিমূলক আর্থিক সহায়তা প্রদান করা হয়েছে এবং প্রত্যেকটি পরিবারকে ‘একটি বাড়ি একটি খামার’ প্রকল্পের সাথে সংযুক্ত করা হয়েছে।

৯। ডলফিন কনজারভেশন দল এবং সংশ্লিষ্ট বন কর্মীদের যথাযথ প্রশিক্ষণ প্রদান করা হয়েছে। এছাড়াও ডলফিন মেলা আয়োজন সহ বিভিন্ন স্কুল-কলেজ এবং কমিউনিটিতে ডলফিন সম্পর্কিত সচেতনতামূলক কার্যক্রম পরিচালনা করা হয়েছে।

উপর্যুক্ত কার্যক্রম সমূহ সফলতার সাথে সম্পন্ন করার ফলে সুন্দরবনে ডলফিনের সংখ্যা উল্লেখযোগ্য হারে বৃদ্ধি পেয়েছে। সুন্দরবনের তিনটি অভয়ারণ্য (টাংমারী, ঘাঘরামারী ও চাঁদপাই) তে এই বৃদ্ধির হার ৫৫%, যা দেশের ডলফিন সংরক্ষণের ক্ষেত্রে একটি মাইলফলক হিসেবে কাজ করবে।



চিত্র: শুশুক বা গাঙ্গেয় ডলফিন

সুন্দরবনের বাঘ শুমারী

USAID এর আর্থিক সহায়তায় Bengal Tiger Conservation Activity (BAGH) প্রকল্পের আওতায় দ্বিতীয় পর্যায়ে সুন্দরবনে ক্যামেরা ট্র্যাপিং এর মাধ্যমে বাঘ গণনার কার্যক্রম শুরু করা হয়। ১লা ডিসেম্বর, ২০১৬ সাল থেকে শুরু করে ২৪ শে এপ্রিল, ২০১৮ সাল পর্যন্ত চারটি ধাপে সুন্দরবনের সাতক্ষীরা, খুলনা ও শরণখোলা রেঞ্জের তিনটি ব্লকের ১,৬৫৬ বর্গ কিঃ মিঃ এলাকায় বিশেষ এক ধরনের ক্যামেরা ব্যবহার করে জরিপ কার্যক্রম পরিচালনা করা হয়। ২২ মে ২০১৯ খ্রিঃ তারিখে পরিবেশ, বন ও জলবায়ু পরিবর্তন মন্ত্রণালয়ের মাননীয় মন্ত্রী, জনাব মোঃ শাহাব উদ্দিন, এমপি এক অনুষ্ঠানের মাধ্যমে উক্ত জরিপের ফলাফল প্রকাশ করেন। মোট ২৪৯ দিনব্যাপী পরিচালিত এ জরিপ কার্যক্রমে ৬৩টি পূর্ণবয়স্ক বাঘ, ৪টি জুভেনাইল বাঘ এবং ৫টি অপ্রাপ্ত বয়স্ক বাঘের সর্বমোট ২৪৬টি ছবি পাওয়া যায়। SERC মডেলে তথ্য বিশ্লেষণ করে সুন্দরবনের প্রতি ১০০ বর্গ কিঃ মিঃ এলাকায় বাঘের আপেক্ষিক ঘনত্ব পাওয়া যায় ২.৫৫±০.৩২। সুন্দরবনে বাঘের বিচরণ ক্ষেত্র ৪,৪৬৪ কিঃ মিঃ এলাকাকে আপেক্ষিক ঘনত্ব দিয়ে গুণণ করে বাঘের সংখ্যা হিসাব করা হয়েছে ১১৪টি। এ হিসাব অনুযায়ী ২০১৮ সালের জরিপে সুন্দরবনে বাঘের সংখ্যা শতকরা ৮ ভাগ বৃদ্ধি পেয়েছে। ব্লক অনুযায়ী বাঘের ঘনত্ব বিশ্লেষণ করে দেখা যায় যে, শরণখোলা রেঞ্জে বাঘের ঘনত্ব সবচেয়ে বেশী (৩.৩৩ বাঘ/১০০ বর্গ কিঃ মিঃ) এবং খুলনা রেঞ্জে বাঘের ঘনত্ব সবচেয়ে কম (১.২১ বাঘ/১০০ বর্গ কিঃ মিঃ)।

২০১৫ সালে সুন্দরবনে ক্যামেরা ট্র্যাপিং এর মাধ্যমে প্রথমবারের মত বাঘ গণনার কার্যক্রম শুরু করা হয়েছিল। সে হিসাব অনুযায়ী বাঘের ঘনত্ব ছিল প্রতি ১০০ বর্গ কিঃ মিঃ এ ২.১৭টি এবং মোট বাঘের সংখ্যা ছিল ১০৬টি।



ক্যামেরা ট্র্যাপিং এর মাধ্যমে প্রাপ্ত বাঘের ছবি।

বাংলাদেশ বন মহা পরিকল্পনা (২০১৭-২০৩৭)

১৯৯৫ সনে বাংলাদেশ বন বিভাগ প্রথমবারের মতো ২০ বৎসরের জন্যে একটি বন মহাপরিকল্পনা প্রণয়ন করে; যার একটি উদ্দেশ্য ছিল দেশের ২০ শতাংশ ভূমি বন আচ্ছাদনের ভেতরে নিয়ে আসা। উক্ত মহাপরিকল্পনা বন ও বাস্তুতন্ত্রের অন্যান্য বিষয়, যেমন Sustainable Forest Management, জীববৈচিত্র্য, জলবায়ু পরিবর্তন, ইকোসিস্টেম সার্ভিসের ঝুঁকি, আন্তর্জাতিক কনভেনশনের প্রতিশ্রুতি, বন পরিবীক্ষণ ব্যবস্থা এবং দূর অনুধাবন (Remote Sensing) এবং ভৌগোলিক তথ্য পদ্ধতি (GIS) ইত্যাদির উপর যথাযথভাবে গুরুত্ব দিতে সমর্থ হয়নি। ২০ বৎসরের পুরাতন উক্ত মহাপরিকল্পনাকে ২০১৩ সালে হালনাগাদ করে পরবর্তী ২০ বৎসরের জন্য অর্থাৎ ২০১৭-২০৩৭ সাল পর্যন্ত করা হয়েছে। হালনাগাদ বন মহাপরিকল্পনা প্রণয়ন কার্য দেশীয় এবং আন্তর্জাতিক বিশ্লেষক ও সংস্থার সহায়তায় সম্পন্ন করা হয়েছে, যা সহসা অনুমোদনের জন্য সরকারের নিকট দাখিল করা হবে।

জাতীয় শুদ্ধাচার কৌশল

পরিবেশ, বন ও জলবায়ু পরিবর্তন মন্ত্রণালয়ের নির্দেশনা মোতাবেক জাতীয় শুদ্ধাচার কৌশল বাস্তবায়ন করার নিমিত্তে বন অধিদপ্তরে ২০১৯-২০২০ অর্থ বছরের জন্য কর্মপরিকল্পনা ও অগ্রগতি পরিবীক্ষণ কাঠামো তৈরী পূর্বক যথাযথ ভাবে বাস্তবায়ন করা হয়েছে। জাতীয় শুদ্ধাচার কৌশল বাস্তবায়নের জন্য প্রধান বন সংরক্ষকের দপ্তর, বন সংরক্ষকগণের দপ্তর এবং বিভাগীয় বন কর্মকর্তাগণের দপ্তরে নৈতিকতা কমিটি গঠন করা হয়েছে। নৈতিকতা কমিটি এবং অংশীজনের মিটিং নিয়মিতভাবে অনুষ্ঠিত হচ্ছে। নৈতিকতা কমিটিতে গৃহীত সিদ্ধান্ত যথাযথভাবে বাস্তবায়ন করা হয়েছে। সেবা প্রত্যাশী নাগরিকদের নিকট বন ও বন্যপ্রাণী বিষয়ক তথ্যাদি উপস্থাপনের জন্য বন অধিদপ্তরের প্রবেশ মূখে ডিজিটাল ডিসপ্লে এবং দর্শনার্থীদের জন্য আধুনিক মানের অপেক্ষাগার স্থাপন করা হয়েছে। এছাড়া মহিলা কর্মকর্তা/কর্মচারীদের জন্য পৃথক নামাজের ব্যবস্থাসহ শিশুদের জন্য মানসম্মত বিনোদন সম্বলিত ডে-কেয়ার সেন্টার স্থাপন করা হয়েছে। সিটিজেন চার্টারে উল্লেখিত প্রদেয় সেবা সহজীকরণ এবং সেবার মান বৃদ্ধি করার জন্য প্রধান বন সংরক্ষক মহোদয়ের সঙ্গে অংশীজনের অংশ গ্রহণে নিয়মিতভাবে গণশুনানি অনুষ্ঠিত হচ্ছে। এছাড়া ইনোভেশন এর দ্বারা বিভিন্ন সেবাকে সহজীকরণ করা হচ্ছে। সামাজিক বনায়নে অংশগ্রহণকারী উপকারভোগীদেরকে বনায়নের লভ্যাংশের চেক অনলাইনে প্রদান করা হচ্ছে এবং উপকারভোগীদের ডাটাবেস সম্বলিত অ্যাপস তৈরীর কার্যক্রম চলমান রয়েছে।

বন অধিদপ্তরসহ এর আওতাধীন বন সংরক্ষক এবং বিভাগীয় বন কর্মকর্তাগণের দপ্তরে কর্মকর্তা/কর্মচারীদের যথাসময়ে উপস্থিতি নিশ্চিত করার জন্য ডিজিটাল হাজিরা যন্ত্র স্থাপন করা হয়েছে। নৈতিকতা কমিটির সিদ্ধান্ত মোতাবেক উত্তোলিত বন বাগানে চারার প্রজাতি বৈচিত্র্য রক্ষা এবং গুনগত মান নিশ্চিত করার লক্ষ্যে বন অধিদপ্তরের উর্ধ্বতন কর্মকর্তাদের মাধ্যমে উত্তোলিত নার্সারী ও সৃজিত বাগান পরিদর্শন নিশ্চিত করা হয়েছে। জাতীয় শুদ্ধাচার কৌশল বাস্তবায়নের জন্য জাতীয় শুদ্ধাচার পুরস্কার নীতিমালা ২০১৭ অনুযায়ী বাছাই কমিটি গঠন করা হয়েছে। বর্ণিত নীতিমালার আলোকে বন অধিদপ্তরসহ এর আওতাধীন বন সংরক্ষক এবং বিভাগীয় বন কর্মকর্তাদের দপ্তরে নিয়োজিত কর্মকর্তা/কর্মচারীদের উদ্ভাবনী ও ভাল কাজে উৎসাহিত করার লক্ষ্যে শুদ্ধাচার পুরস্কার (২০২০-২০২১) প্রদান করা হয়েছে। এরই ধারাবাহিকতায় ২০২১-২০২২ অর্থ বছরের জন্য জাতীয় শুদ্ধাচার কর্মপরিকল্পনা প্রণয়ন পূর্বক বাস্তবায়নের কার্যক্রম চলমান রয়েছে।



সম্মানিত প্রধান বন সংরক্ষক মহোদয়ের সঙ্গে অংশীজনের অংশ গ্রহণে গণশুনানি



জাতীয় শুদ্ধাচার কৌশল এর আওতায় কর্মকর্তা/কর্মচারীদের ই-নথি বিষয়ক প্রশিক্ষণ



জাতীয় শুদ্ধাচার কৌশল এর আওতায় রক্ষিত এলাকায় প্লাস্টিক মুক্তকরণ কর্মসূচি

বন অধিদপ্তরের উদ্ভাবনী দক্ষতা বৃদ্ধি ও নাগরিক সেবা

বন অধিদপ্তরের কাজের গতিশীলতা ও উদ্ভাবনী দক্ষতা বৃদ্ধি এবং নাগরিক সেবা প্রদান প্রক্রিয়া দ্রুত ও সহজীকরণের পন্থা উদ্ভাবন ও চর্চার লক্ষ্যে উদ্ভাবন পরিকল্পনা-২০২০-২০২১ এর আওতায় বন অধিদপ্তরের উদ্ভাবনী উদ্যোগ হিসেবে “সামাজিক বনায়নে সম্পৃক্ত উপকারভোগীদের ডিজিটাল ডাটাবেজ তৈরী” এর কার্যক্রম চলমান। নাগরিক সেবা সহজীকরণের লক্ষ্যে হাতি লালন-পালন লাইসেন্স ও পজেশন সার্টিফিকেট প্রদানের কার্যক্রম গ্রহণের জন্য অফিস আদেশ জারি করা হয়। ২০২১-২০২২ অর্থ বছরে এ কাজ সম্পন্ন করা সম্ভব হবে। আধুনিক জীবন যাপনে ডিজিটাল সেবার গুরুত্ব অপরিসীম। তাৎক্ষণিকভাবে কোন তথ্যাদি জানার উপযুক্ত প্ল্যাটফর্ম হলো ডিজিটাল প্রযুক্তি। তাই ডিজিটাল সেবা মানুষের জীবনকে করেছে সহজ ও জ্ঞানসমৃদ্ধ। ২০২০-২০২১ অর্থবছরে বন অধিদপ্তরের যাবতীয় কার্যক্রম ডিজিটাল সেবার মাধ্যমে গণমানুষের কাছে পৌছাতে অরণ্য বার্তা প্রকাশ করা হয়েছে।

ই-নথি (অফিস ব্যবস্থাপনা)

মাননীয় প্রধানমন্ত্রীর কার্যালয় কর্তৃক পরিচালিত a2i প্রোগ্রামের আওতায় বন অধিদপ্তরের সদর দপ্তর ২০১৭ সাল থেকে ই-নথি (অফিস ব্যবস্থাপনা) কার্যক্রমের সাথে যুক্ত হয়ে ই-নথি কার্যক্রম বাস্তবায়ন করে আসছে। বন অধিদপ্তরের আঞ্চলিক ও মাঠ পর্যায়ের দপ্তরসমূহকে এখনও ই-নথি সিস্টেমে যুক্ত করা সম্ভব হয়নি। শুধুমাত্র সদর দপ্তরের কার্যক্রমের উপর ভিত্তি করে বন অধিদপ্তর বাংলাদেশের মধ্যম ক্যাটাগরির ১৮টি দপ্তরের মধ্যে ৫ম অবস্থানে উঠে এসেছে। a2i কর্তৃক ড্যাস বোর্ডের উন্নয়ন কাজ চলমান থাকায় বিগত আগস্ট ২০২০ মাস হতে মাসিক রিপোর্ট পাওয়া যাচ্ছে

না। বন অধিদপ্তরের আঞ্চলিক ও মাঠ পর্যায়ে দপ্তর সমূহকে ই-নথি সিস্টেমে যুক্ত করার কার্যক্রম চলছে। ই-নথির পরিবর্তে ডি-নথির সিস্টেমে কার্যক্রম শুরু হবে বিধায় চলতি অর্থবছরে কোন কর্মচারীকে ই-নথি বিষয়ক প্রশিক্ষণ প্রদান করা হয়নি।

বন অধিদপ্তরের আঞ্চলিক ও মাঠ পর্যায়ে দপ্তর সমূহকে ই-নথি সিস্টেমের আওতায় আনা হলে বন অধিদপ্তর এর পক্ষে অপেক্ষাকৃত বড় ক্যাটাগরির অধিদপ্তরের মধ্যে একটি বিশেষ অবস্থানে পৌঁছানো সম্ভব হবে।

বন সংরক্ষণ ও ব্যবস্থাপনায় জাতীয় ও আন্তর্জাতিক পুরস্কার

জাতীয় পুরস্কারঃ

বৃক্ষরোপণে বিশেষ অবদান এবং বন্যপ্রাণী সংরক্ষণে বিশেষ অবদানের জন্য বাংলাদেশ সরকার কর্তৃক নিম্নলিখিত পুরস্কার প্রদান করা হয়ে থাকে :

- ১। বৃক্ষরোপণে প্রধানমন্ত্রীর জাতীয় পুরস্কার
- ২। বঙ্গবন্ধু এওয়ার্ড ফর ওয়াইল্ড লাইফ কনজারভেশন

আন্তর্জাতিক পুরস্কারঃ

বন সংরক্ষণ ও সহব্যবস্থাপনায় সাফল্যের স্বীকৃতি স্বরূপ বন বিভাগ বিভিন্ন আন্তর্জাতিক পুরস্কার অর্জন করেছে ; যথাঃ

- i) UN declared Equitor Award 2012
- ii) Wangiri Mathai Award 2012
- iii) JSW Earth Care Award 2012
- iv) Solution Search 2013
- v) HSBC-Daily Star Climate Award
- vi) People's Choice Award (The Conservance & RARE, USA)
- vii) Champion of the earth 2015

বৃক্ষরোপণে প্রধানমন্ত্রীর জাতীয় পুরস্কার

সরকারি সিদ্ধান্ত অনুযায়ী বৃক্ষরোপণ আন্দোলনকে একটি স্থায়ী, চলমান ও স্বতঃস্ফূর্ত কার্যক্রমে পরিণত করার উদ্দেশ্যে সংশ্লিষ্ট সকলকে অনুপ্রাণিত ও সম্পৃক্ত করার লক্ষ্যে বৃক্ষরোপণে যারা বিশেষ কৃতিত্ব প্রদর্শন করেন তাদেরকে “বৃক্ষরোপণে প্রধানমন্ত্রীর জাতীয় পুরস্কার” প্রদান করা হয়। ১৯৯৩ সাল থেকে প্রতিবছর এই পুরস্কার প্রদান করা হচ্ছে। বিভিন্ন ব্যক্তি ও প্রতিষ্ঠান কর্তৃক গৃহীত বৃক্ষরোপণ কর্মকাণ্ডকে মোট ১০টি শ্রেণিভুক্ত করে প্রত্যেক শ্রেণিতে ১ম, ২য় ও ৩য় পুরস্কার প্রদান করা হয়। প্রতিটি শ্রেণির পুরস্কার প্রাপ্তদের ক্রেস্ট ও সনদসহ একাউন্ট পেয়ী চেকে অর্থ প্রদান করা হয়। প্রথম স্থান অধিকারীকে ৩০,০০০ টাকা, দ্বিতীয় স্থান অধিকারীকে ২০,০০০ টাকা এবং তৃতীয় স্থান অধিকারীকে ১৫,০০০ টাকা প্রদান করা হয়। তবে “বৃক্ষরোপণে প্রধানমন্ত্রীর জাতীয় পুরস্কার প্রদানের নীতিমালা (সংশোধনী)-২০২১” এ বর্ণিত পুরস্কারের অর্থ বৃদ্ধি করে প্রথম পুরস্কার- ১,০০,০০০/- (এক লক্ষ টাকা), দ্বিতীয় পুরস্কার-৭৫,০০০/- (পঁচাত্তর হাজার টাকা) ও তৃতীয় পুরস্কার-৫০,০০০/- (পঞ্চাশ হাজার টাকা) করার নিমিত্ত নীতিগতভাবে সিদ্ধান্ত গৃহীত হয়েছে। যার প্রজ্ঞাপন বর্তমানে বাংলাদেশ সরকারি মুদ্রণালয়, তেজগাঁও, ঢাকাতে ছাঁপার অপেক্ষায় রয়েছে।



মুজিববর্ষ উদযাপন উপলক্ষ্যে গণভবনে মাননীয় প্রধানমন্ত্রী কর্তৃক বৃক্ষরোপণ

বঙ্গবন্ধু এওয়ার্ড ফর ওয়াইল্ডলাইফ কনজারভেশন

জাতীয়ভাবে প্রকৃতি ও বন্যপ্রাণী সংরক্ষণে নিবেদিত ব্যক্তি/সংস্থাকে সম্মানিত করা এবং ভবিষ্যত প্রজন্মকে সংরক্ষণে উদ্বুদ্ধ করার লক্ষ্যে ২০১০ সাল থেকে “Bangabandhu Award for Wildlife Conservation” পদক প্রদান করা হচ্ছে। পরবর্তীতে জাতীয় এই পদক প্রদানের বিষয়টিকে আরও জোরদার করার অভিপ্রায়ে ২০১২ সালে “Bangabandhu Award for Wildlife Conservation” নীতিমালা প্রবর্তন করা হয়।

সরকার ২০১০ সাল থেকে মূলতঃ বন্যপ্রাণী বিষয়ক শিক্ষা, গবেষণা ও সংরক্ষণ কার্যক্রম, বন্যপ্রাণীর আবাসস্থল উন্নয়ন ও সংরক্ষণে অবদান, বন্যপ্রাণী সংক্রান্ত অপরাধ দমন কার্যক্রম, মানুষ-বন্যপ্রাণী দ্বন্দ্ব নিরসনে বিশেষ অবদান এবং তৃণমূল পর্যায়ে বন ও বন্যপ্রাণী সংরক্ষণে গণসচেতনতা সৃষ্টির ক্ষেত্রে বিশেষ অবদান-এ বিষয়সমূহ বিবেচনা করতঃ মোট ৩টি ক্যাটাগরিতে নির্বাচিত ব্যক্তি ও প্রতিষ্ঠানকে এ পুরস্কার প্রদান করে আসছে। প্রতি বছর প্রত্যেক ব্যক্তি/প্রতিষ্ঠানকে একটি ২ ভরি (২৩.৩২ গ্রাম) ওজনের স্বর্ণ পদক অথবা পদকের ওজন পরিমাণ স্বর্ণের বাজারমূল্যের সমপরিমাণ নগদ অর্থ ও ৫০,০০০/- (পঞ্চাশ হাজার) টাকার অ্যাকাউন্ট পেয়ি চেক এবং সদনপত্র প্রদান করা হয়। ২০১০ হতে ২০২০ সাল পর্যন্ত নিম্নোক্ত ৩টি ক্যাটাগরিতে সর্বমোট ৩৪ ব্যক্তি/প্রতিষ্ঠানকে পুরস্কার প্রদান করা হয়েছে।

ক্যাটাগরিসমূহঃ

- বন্যপ্রাণী সংরক্ষণ কাজে নিয়োজিত কর্মকর্তা, খ্যাতিমান গবেষক, বিজ্ঞানী, বন্যপ্রাণী সংরক্ষণবাদী ব্যক্তি ও গণমাধ্যম কর্মী/ব্যক্তিত্ব;
- বন্যপ্রাণী বিষয়ক শিক্ষা ও গবেষণা এবং
- বন্যপ্রাণী সংরক্ষণে নিবেদিত প্রতিষ্ঠান।

২০২০ সালে পুরস্কার প্রাপ্তদের তালিকা

ক্রমিক নং	ক্যাটাগরী	পুরস্কার প্রাপ্ত ব্যক্তি ও প্রতিষ্ঠান
১।	বন্যপ্রাণী ও সংরক্ষণ কাজে নিয়োজিত কর্মকর্তা, খ্যাতিমান গবেষক, বিজ্ঞানী, বন্যপ্রাণী সংরক্ষণবাদী ব্যক্তি ও গণমাধ্যম কর্মী/ব্যক্তিত্ব	জনাব ইশতিয়াক উদ্দিন আহমদ সাবেক প্রধান বন সংরক্ষক
২।	বন্যপ্রাণী বিষয়ক শিক্ষা ও গবেষণা	ড. মোহাম্মদ ফিরোজ জামান অধ্যাপক, প্রাণিবিদ্যা বিভাগ ঢাকা বিশ্ববিদ্যালয়, ঢাকা।
৩।	বন্যপ্রাণী সংরক্ষণে নিবেদিত প্রতিষ্ঠান	আশুরহাট পাখি সংরক্ষণ সমিতি ১২ নং নিত্যনন্দপুর, শৈলকূপা, ঝিনাইদহ পক্ষে: সভাপতি, জনাব মোঃ আব্দুর রাজ্জাক

উল্লেখ্য যে, ২০২০ সালে “Bangabandhu Award for Wildlife Conservation-2020” প্রদানের নিমিত্ত ২২-০৩-২০২১ খ্রিঃ তারিখে প্রজ্ঞাপন জারী করা হয়। কোভিড-১৯ অতিমারীর কারণে জাতীয় বৃক্ষমেলা ২০২১ অনুষ্ঠিত না হওয়ায় পদক প্রাপ্তদের মধ্যে পুরস্কার বিতরণ করা সম্ভব হয়নি। যা পরবর্তী সুবিধাজনক সময়ে পুরস্কার প্রাপ্তদের মাঝে বিতরণ করা হবে বলে জানা যায়।



মাননীয় প্রধানমন্ত্রীর হাত থেকে পুরস্কার নিচ্ছেন জনাব বেনজীর আহমেদ, অবসরপ্রাপ্ত অধ্যাপক, প্রাণিবিদ্যা বিভাগ, চট্টগ্রাম বিশ্ববিদ্যালয়।

উদযাপিত আন্তর্জাতিক দিবস সমূহ

জাতিসংঘ ও আন্তর্জাতিকভাবে ঘোষিত দিবস উপলক্ষে বিশ্বের অন্যান্য দেশের মতো বাংলাদেশেও বিভিন্ন কর্মসূচি পালন করা হয়। দিবসগুলো উদযাপন উপলক্ষে বন অধিদপ্তর বিভিন্ন কর্মসূচি গ্রহণ করে। দিবসগুলির তাৎপর্য ও অবদান সম্পর্কে গণসচেতনতা বৃদ্ধির লক্ষ্যে বন বিভাগ বিভিন্ন সমাবেশ, শোভাযাত্রা ও আলোচনা সভার আয়োজন করে। নিম্নে বন বিভাগে সংশ্লিষ্ট দিবসের ছবি ও তথ্য দেয়া হল:

আন্তর্জাতিক বন দিবস

২০১২ সালে জাতিসংঘের সাধারণ পরিষদে ২১ মার্চকে আন্তর্জাতিক বন দিবস হিসাবে উদযাপন করার সিদ্ধান্ত গৃহীত হয়। তারই ধারাবাহিকতায় ২০২২ সালেও বিশ্বব্যাপী আন্তর্জাতিক বন দিবস পালন করা হয়। ২০২২ সালে আন্তর্জাতিক বন দিবসের প্রতিপাদ্য ছিলো “বন সংরক্ষণের অঙ্গীকার, টেকসই উৎপাদন ও ব্যবহার”। প্রতিবারের মতো বাংলাদেশ বন বিভাগ দিবসটিকে আড়ম্বরভাবে উদযাপন করে। বাংলাদেশ বন অধিদপ্তর আন্তর্জাতিক বন দিবস ২০২২ উদযাপন উপলক্ষে বন ভবন, আগারগাঁওস্থ হৈমন্তী সম্মেলন কক্ষে একটি আলোচনা সভার আয়োজন করে। উক্ত অনুষ্ঠানে প্রধান অতিথি হিসেবে উপস্থিত ছিলেন গণপ্রজাতন্ত্রী বাংলাদেশ সরকারের পরিবেশ, বন ও জলবায়ু পরিবর্তন মন্ত্রণালয়ের মাননীয় মন্ত্রী, জনাব মোঃ শাহাব উদ্দিন, এম.পি; বিশেষ অতিথি হিসেবে উপস্থিত ছিলেন বেগম হাবিবুন নাহার, এম.পি, মাননীয় উপ-মন্ত্রী, পরিবেশ, বন ও জলবায়ু পরিবর্তন মন্ত্রণালয়, জনাব মোঃ মোস্তফা কামাল, সচিব এবং জনাব ইকবাল আব্দুল্লাহ হারুন, অতিরিক্ত সচিব, পরিবেশ, বন ও জলবায়ু পরিবর্তন মন্ত্রণালয়। এছাড়াও উপস্থিত ছিলেন জনাব মুকিত মজুমদার বাবু, চেয়ারম্যান, প্রকৃতি ও জীবন ফাউন্ডেশন। উক্ত অনুষ্ঠানে সভাপতিত্ব করেন জনাব মোঃ আমীর হোসাইন চৌধুরী, প্রধান বন সংরক্ষক, বাংলাদেশ।



আন্তর্জাতিক বন দিবস উদযাপন

বিশ্ব বন্যপ্রাণী দিবস

২০১৩ সালের ২০ ডিসেম্বর জাতিসংঘের সাধারণ পরিষদের ৬৮তম অধিবেশনে ৩ মার্চকে বিশ্ব বন্যপ্রাণী দিবস হিসাবে ঘোষণা করা হয়। তখন থেকে প্রতি বছরই পরিবেশ, বন ও জলবায়ু পরিবর্তন মন্ত্রণালয়ের নেতৃত্বে বাংলাদেশ বন অধিদপ্তর এই দিবসটি পালন করে আসছে। এ উপলক্ষে ২০২২ সালে বাংলাদেশ বন অধিদপ্তরের হৈমন্তী মিলনায়তনে একটি আলোচনা সভা অনুষ্ঠিত হয়। উক্ত অনুষ্ঠানে প্রধান অতিথি হিসেবে উপস্থিত ছিলেন গণপ্রজাতন্ত্রী বাংলাদেশ সরকারের পরিবেশ, বন ও জলবায়ু পরিবর্তন মন্ত্রণালয়ের মাননীয় মন্ত্রী, জনাব মোঃ শাহাব উদ্দিন, এম.পি; বিশেষ অতিথি হিসেবে উপস্থিত ছিলেন জনাব সাবের হোসেন চৌধুরী, এম.পি. মাননীয় সভাপতি, পরিবেশ, বন ও জলবায়ু পরিবর্তন মন্ত্রণালয় সম্পর্কিত সংসদীয় স্থায়ী কমিটি, জনাব মোঃ মোস্তফা কামাল, সচিব এবং জনাব ইকবাল আব্দুল্লাহ হারুন, অতিরিক্ত সচিব, পরিবেশ, বন ও জলবায়ু পরিবর্তন মন্ত্রণালয়। এছাড়াও উপস্থিত ছিলেন জনাব মুকিত মজুমদার বাবু, চেয়ারম্যান, প্রকৃতি ও জীবন ফাউন্ডেশন এবং জনাব রাকিবুল আমিন, কান্ট্রি রিপ্রেজেন্টেটিভ, আই,ইউ,সি,এন বাংলাদেশ। উক্ত অনুষ্ঠানে

সভাপতিত্ব করেন জনাব মোঃ আমীর হোসাইন চৌধুরী, প্রধান বন সংরক্ষক, বাংলাদেশ। এ বছর বন্যপ্রাণী দিবসের প্রতিপাদ্য নির্ধারণ করা হয়েছে “বিপন্ন বন্যপ্রাণী রক্ষা করি, প্রতিবেশ পুনরুদ্ধারে এগিয়ে আসি”।



বিশ্ব বন্যপ্রাণী দিবস

বিশ্ব পরিযায়ী পাখি দিবস

২০০৬ সালে আন্তর্জাতিকভাবে এ দিবস উদযাপনের উদ্যোগ নেয়া হয়। বাংলাদেশে ২০১০ সাল হতে জাতীয়ভাবে বিশ্ব পরিযায়ী পাখি দিবস উদযাপন করা হচ্ছে। তবে ২০১৭ সাল থেকে প্রতি বছর মে মাসের দ্বিতীয় শনিবার এবং অক্টোবর মাসের দ্বিতীয় শনিবার অর্থাৎ বছরে দু’টি দিন বিশ্বব্যাপী পালিত হয় এ দিবসটি। প্রতি বছরের ন্যায় এ বছরও বিশ্ব পরিযায়ী পাখি দিবস উদযাপনের লক্ষ্যে বন অধিদপ্তর কর্তৃক অনলাইন ভিত্তিক একটি আলোচনা সভার আয়োজন করা হয়। উক্ত আলোচনা সভায় প্রধান অতিথি হিসাবে উপস্থিত ছিলেন গণপ্রজাতন্ত্রী বাংলাদেশ সরকারের পরিবেশ, বন ও জলবায়ু পরিবর্তন মন্ত্রণালয়ের মাননীয় মন্ত্রী, জনাব মোঃ শাহাব উদ্দিন, এম.পি। এ বছর বিশ্ব পরিযায়ী পাখি দিবস-২০২১ এর প্রতিপাদ্য নির্ধারিত হয়েছে- “Sing, Fly, Soar – Like a bird!”, যার বাংলা ভাবার্থ করা হয়েছে- “পাখির মত গান গাই, উড়ে যাই সুউচ্চ দিগন্তে”।

আন্তর্জাতিক বাঘ দিবস

২০১০ সালে রাশিয়ার সেন্ট পিটার্সবার্গে অনুষ্ঠিত বাঘ সমৃদ্ধ ১৩টি দেশের (Tiger Range Country) সরকার প্রধানদের সম্মেলনে বাঘ সংরক্ষণকে বেগবান করার জন্য তৈরি ঘোষণাপত্রের আলোকেই প্রতি বছরের ন্যায় এ বছরও ২৯ জুলাই আন্তর্জাতিক বাঘ দিবস উদযাপনের লক্ষ্যে বন অধিদপ্তর কর্তৃক একটি ওয়েবিনারের আয়োজন করা হয়। উক্ত ওয়েবিনারে প্রধান অতিথি হিসাবে উপস্থিত ছিলেন গণপ্রজাতন্ত্রী বাংলাদেশ সরকারের পরিবেশ, বন ও জলবায়ু পরিবর্তন মন্ত্রণালয়ের মাননীয় উপ-মন্ত্রী, বেগম হাবিবুন নাহার এম.পি.। ২০২১ সনে আন্তর্জাতিক বাঘ দিবসের প্রতিপাদ্য নির্ধারণ করা হয়েছে- “বাঘ বাঁচায় সুন্দরবন, সুন্দরবন বাঁচায় লক্ষ জীবন”।

বিশ্ব হাতি দিবস

২০১১ সালে থাইল্যান্ডের Elephant Reintroduction Foundation, কানাডার চলচ্চিত্রকার Patricia Sims এবং Michael Clark এর উদ্যোগের ফলে প্রতি বছর ১২ আগস্ট বিশ্ব হাতি দিবস পালন করার সিদ্ধান্ত গৃহীত হয়। এর ফলশ্রুতিতে, ২০১২ সাল থেকে প্রতি বছর ১২ আগস্ট পৃথিবীর হাতি সমৃদ্ধ

দেশসমূহে বিশ্ব হাতি দিবস পালন করা হচ্ছে। প্রতি বছরের ন্যায় এ বছরও বিশ্ব হাতি দিবস উদযাপনের লক্ষ্যে বন অধিদপ্তর কর্তৃক একটি ওয়েবিনারের আয়োজন করা হয়। উক্ত ওয়েবিনারে প্রধান অতিথি হিসাবে উপস্থিত ছিলেন বন অধিদপ্তরের সম্মানিত প্রধান বন সংরক্ষক, জনাব মোঃ আমীর হোসাইন চৌধুরী। ২০২১ সনে বিশ্ব হাতি দিবসের প্রতিপাদ্য নির্ধারণ করা হয়েছে-“হাতি করলে সংরক্ষণ, রক্ষা পাবে সবুজ বন”।

আন্তর্জাতিক মিঠাপানির ডলফিন দিবস

বাংলাদেশ বন অধিদপ্তর আন্তর্জাতিক মিঠাপানির ডলফিন দিবস ২০২১ উদযাপন উপলক্ষ্যে বন ভবন, আগারগাঁওস্থ হৈমন্তী সম্মেলন কক্ষে একটি আলোচনা সভার আয়োজন করে। উক্ত অনুষ্ঠানে প্রধান অতিথি হিসেবে উপস্থিত ছিলেন গণপ্রজাতন্ত্রী বাংলাদেশ সরকারের পরিবেশ, বন ও জলবায়ু পরিবর্তন মন্ত্রণালয়ের মাননীয় মন্ত্রী; জনাব মোঃ শাহাব উদ্দিন, এম.পি; বিশেষ অতিথি হিসেবে উপস্থিত ছিলেন বেগম হাবিবুন নাহার, এম.পি., মাননীয় উপ-মন্ত্রী, জনাব মোঃ মোস্তফা কামাল, সচিব এবং জনাব ইকবাল আব্দুল্লাহ হারুন, অতিরিক্ত সচিব, পরিবেশ, বন ও জলবায়ু পরিবর্তন মন্ত্রণালয়। এছাড়াও অনুষ্ঠানে উপস্থিত ছিলেন জনাব মুকিত মজুমদার বাবু, চেয়ারম্যান, প্রকৃতি ও জীবন ফাউন্ডেশন এবং জনাব রাকিবুল আমিন, কান্ট্রি রিপ্রেজেন্টেটিভ, আই,ইউ,সি,এন বাংলাদেশ। উক্ত অনুষ্ঠানে সভাপতিত্ব করেন জনাব মোঃ আমীর হোসাইন চৌধুরী, প্রধান বন সংরক্ষক, বাংলাদেশ।

বিভিন্ন আন্তর্জাতিক দিবস :

- | | |
|--|--|
| ১. বিশ্ব জলাভূমি দিবস: ২ ফেব্রুয়ারি। | ১২. আন্তর্জাতিক ওজোন দিবস:
১৬ সেপ্টেম্বর। |
| ২. আন্তর্জাতিক বন দিবস: ২১ মার্চ। | ১৩. বিশ্ব নদী দিবস: ২৮ সেপ্টেম্বর। |
| ৩. বিশ্ব পানি দিবস: ২২ মার্চ। | ১৪. বন্যপ্রাণী সংরক্ষণ দিবস: ৪ ডিসেম্বর। |
| ৪. বিশ্ব ঐতিহ্য দিবস: ১৮ এপ্রিল। | ১৫. বিশ্ব বন্যপ্রাণী দিবস: ৩ মার্চ। |
| ৫. ধরিত্রী দিবস: ২২ এপ্রিল। | ১৬. আন্তর্জাতিক জীববৈচিত্র্য দিবস: ২২ মে। |
| ৬. আন্তর্জাতিক জীববৈচিত্র্য দিবস:
২২ মে। | ১৭. বিশ্ব পরিযায়ী পাখি দিবস:
১০ অক্টোবর। |
| ৭. বিশ্ব পরিবেশ দিবস: ৫ জুন। | ১৮. আন্তর্জাতিক মিঠাপানির ডলফিন দিবস:
২৪ অক্টোবর। |
| ৮. বিশ্ব সমুদ্র দিবস: ৮ জুন। | ১৯. আন্তর্জাতিক কাছিম দিবস: ২৩ মে। |
| ৯. বিশ্ব বাঘ দিবস: ২৯ জুলাই। | |
| ১০. বিশ্ব হাতি দিবস: ১২ আগস্ট। | |
| ১১. আন্তর্জাতিক শকুন সচেতনতা দিবস:
সেপ্টেম্বর মাসের প্রথম শনিবার। | |

সংরক্ষিত বনভূমিতে বাস্তুচ্যুত মায়ানমার নাগরিক কর্তৃক বসতি স্থাপন, বনজ সম্পদ ও পরিবেশ ধ্বংসের তথ্যাদি

মায়ানমার এর রাখাইন প্রদেশে রাজনৈতিক অস্থিতিশীলতার জন্য সেখানকার নির্ধাতিত মুসলিম জনগোষ্ঠী বিভিন্ন সময়ে সীমান্ত পার হয়ে বাংলাদেশে আগমন করে। পরবর্তীতে তাদেরকে কক্সবাজার জেলার উখিয়া উপজেলার কুতুপালং ও টেকনাফ উপজেলার নয়াপাড়া রেজিস্টার্ড শরণার্থী ক্যাম্পে পুনর্বাসন করা হয়। এর বাইরে উখিয়া উপজেলার কুতুপালং ও টেকনাফের লেদা আনরেজিস্টার্ড শরণার্থী ক্যাম্পেও রোহিঙ্গা জনগোষ্ঠী বসতি স্থাপন করে। উক্ত ক্যাম্পগুলি কক্সবাজার দক্ষিণ বন বিভাগের গেজেটভুক্ত সংরক্ষিত/রক্ষিত বনভূমিতে অবস্থিত। পরবর্তীতে ২০১৬ সালের শেষের দিকে পুনরায় তারা ব্যাপকহারে সীমান্ত অতিক্রম করে বাংলাদেশে প্রবেশ করে। উক্ত জনগোষ্ঠী বনভূমিতে বসতি স্থাপন করার ফলে একদিকে যেমন বনভূমি জবরদখল হয়, অন্যদিকে তাদের জীবিকার বিকল্প কোন ব্যবস্থা না থাকায় বনভূমির গাছ কর্তন ও পাচারে লিপ্ত হয়। শরণার্থী ক্যাম্প ও বনাঞ্চলে বসবাসকারী রোহিঙ্গারা বিভিন্ন ধরনের অপরাধ কর্মকাণ্ড ছাড়াও বন ও পরিবেশের ব্যাপক ক্ষতি সাধন করে আসছে। তন্মধ্যে অন্যতম ক্ষতিকর দিকগুলো হলো- বিপুল পরিমাণ রোহিঙ্গা জনগোষ্ঠীর জ্বালানীর চাহিদা মেটাতে বনভূমি হতে ব্যাপকভাবে জ্বালানী সংগ্রহ, পাহাড় কর্তন ও মাটি বিক্রি, অবৈধভাবে কাঠ ও অন্যান্য বনজদ্রব্য পাচার, বনভূমি জবরদখলসহ অন্যান্য অপরাধমূলক কর্মকাণ্ডে স্থানীয় প্রভাবশালী/কুচক্রিমহল কর্তৃক রোহিঙ্গাদের ব্যবহার, স্থানীয় প্রভাবশালী গোষ্ঠী কর্তৃক অবৈধভাবে গাছ কর্তন ও পাচার কাজে শ্রমিক হিসেবে রোহিঙ্গাদের ব্যবহার, রোহিঙ্গাদের সংখ্যা অত্যধিক হওয়ায় গণস্বাস্থ্য, পয়ঃনিষ্কাশন, সামাজিক কর্মকাণ্ড, গণযোগাযোগ ইত্যাদি ক্ষেত্রে পরিবেশের উপর বিরূপ প্রভাব পড়ে। এতদ্ব্যতীত সঠিক নাম ঠিকানার অভাবে রোহিঙ্গাদের দ্বারা অপরাধমূলক কর্মকাণ্ড সংঘটিত হওয়ার পরও অপরাধীকে যথাযথভাবে সনাক্ত এবং আইনানুগ ব্যবস্থা গ্রহণ অধিকাংশ ক্ষেত্রে দূরহ হয়ে পড়ে।

মায়ানমারের রাখাইন প্রদেশে পুনরায় সহিংসতার কারণে গত ২৫ আগস্ট ২০১৭ তারিখ হতে ব্যাপকহারে রোহিঙ্গা জনগোষ্ঠী সীমান্ত অতিক্রম করে এবং প্রায় ১১ লক্ষাধিক রোহিঙ্গা (নিবন্ধনকৃত আশ্রয় প্রার্থীদের সংখ্যা ১১,১৮,৫৭৬ জন) জনগোষ্ঠী বাংলাদেশে অনুপ্রবেশ করে বনভূমিতে বসতি স্থাপন করে। শরণার্থী, ত্রাণ ও প্রত্যাবাসন কমিশনার, কক্সবাজার কর্তৃক প্রদত্ত মায়ানমার হতে আগত আশ্রয়প্রার্থীদের মানবিক সহায়তা প্রদান কাজের হালনাগাদ অবস্থা বিষয়ক গত ১৭/০৬/২০২১ খ্রিঃ তারিখের প্রতিবেদনে ২০১৭ সালে ৭,১৫৪ জন, ২০১৮ সালে ৩২,৮৮০ জন ও ২০১৯ সালে ৩২,৪৭৩ জন রোহিঙ্গা শিশু জন্ম গ্রহণ করেছে মর্মে উল্লেখ করা হয়েছে। এক সাথে লক্ষ লক্ষ রোহিঙ্গা জনগোষ্ঠী অনুপ্রবেশ করে বনভূমিতে বসতি স্থাপনকালে সীমিত জনবল নিয়ে উহা প্রতিহত করা সম্ভব হয়নি। উখিয়া উপজেলার কুতুপালং, বালুখালী, বালুখালী ঢালা/ময়নারঘোনা, তাজনিমা খোলা, মক্করার বিল/হাকিমপাড়া, জামতলী বাঘঘোনা, শফিউল্লা কাটা এবং টেকনাফ উপজেলার পুটিবুনিয়া, উনচিপ্রাং, আলীখালী, লেদা, জাদিমুরা, নয়াপাড়া শালবন, শামলাপুর ও কেরনতলী এলাকায় বন বিভাগের গেজেটভুক্ত বনভূমিতে রোহিঙ্গা জনগোষ্ঠী অস্থায়ী বসতি স্থাপন করে এবং বন ও বনজসম্পদের ব্যাপক ক্ষতি সাধন করে। আশ্রয় গ্রহণকারী রোহিঙ্গা জনগোষ্ঠীর আবাস স্থলে মোট ৩৪টি ক্যাম্প (উখিয়া-২৬টি ও টেকনাফ-৮টি ক্যাম্প/২টি পুরাতন ও ৩২টি নতুন ক্যাম্প) প্রতিষ্ঠা করা হয়। প্রায় ১১ লক্ষাধিক রোহিঙ্গা কক্সবাজার দক্ষিণ বন বিভাগের ৬,১৬৪.০২ একর বনভূমিতে বসতি স্থাপনের ফলে ২,০২৭.৫০ একর বনভূমির সৃজিত বন (প্রধানতঃ সামাজিক বনায়ন) এবং ৪,১৩৬.৫২ একর প্রাকৃতিক বন ধ্বংস হয়ে যায়। সৃজিত বনের ক্ষেত্রে বনজসম্পদের ক্ষতির পরিমাণ ১৯৭,৯৬,৯১,৯৭৫.৭৮ টাকা। ৪,১৩৬.৫২ একর প্রাকৃতিক বনে মূলতঃ প্রাকৃতিকভাবে জন্মানো বিবিধ প্রজাতির গাছ, লতা, গুল্ম, সানথাস, উলুফুল,

বাঁশ, বেত, ঔষধি গাছসহ অন্যান্য আগাছা জাতীয় উদ্ভিদ ছিল। প্রাকৃতিক বনের আনুমানিক ক্ষতির পরিমাণ ২৫৮,১১,১১,৬৬৪.৮২ টাকা মাত্র। মোট ক্ষতির পরিমাণ ৪৫৬,০৮,০৩,৬৪০.৬০ টাকা মাত্র।


রোহিঙ্গা জনগোষ্ঠী কক্সবাজার দক্ষিণ বন বিভাগের সংরক্ষিত/রক্ষিত বনভূমিতে ব্যাপকভাবে বসতি স্থাপন করার ফলে জীববৈচিত্র্য ব্যাপকভাবে ধ্বংস হয়। জীববৈচিত্র্যের ক্ষয়ক্ষতি নিরূপনে দীর্ঘ সময়ের প্রয়োজন এবং বিশেষজ্ঞ কমিটির মাধ্যমে উহা নিরূপন করা বাঞ্ছনীয়। কক্সবাজার জেলার মহেশখালী উপজেলায় বাস্তবায়নাধীন Single Point Mooring (SPM) প্রকল্পের জন্য প্রস্তাবিত সংরক্ষিত বনভূমির জন্য গত সেপ্টেম্বর ২০১৬ খ্রিঃ মসে বিশেষজ্ঞ কমিটি দ্বারা জীববৈচিত্র্যের ক্ষয়ক্ষতি নিরূপন করা হয়েছিল। একই জেলায় প্রায় একই ভূ-প্রকৃতির অংশ হওয়ায় Single Point Mooring (SPM) প্রকল্পের জন্য বিশেষজ্ঞ কমিটি কর্তৃক নির্ধারিত ক্ষয়ক্ষতির অনুরূপ হারে রোহিঙ্গা জনগোষ্ঠী দ্বারা ধ্বংস প্রাপ্ত ৬,১৬৪.০২ একর রক্ষিত ও সংরক্ষিত বনভূমির জীববৈচিত্র্যের ক্ষয়ক্ষতির পরিমাণ দাঁড়ায় প্রায় ১৪০৯,৪৮,৫৪,১৯৫.১৯ টাকা মাত্র। অর্থাৎ বনজন্মব্য ও জীববৈচিত্র্যও মোট ক্ষয়ক্ষতির পরিমাণ দাঁড়ায় ১৮৬৫,৫৬,৫৭,৮৩৫/৭৯ টাকা (বনজন্মব্য ৪৫৬,০৮,০৩,৬৪০/৬০ + জীববৈচিত্র্য ১৪০৯,৪৮,৫৪,১৯৫.১৯ টাকা মাত্র)। তবে, জীববৈচিত্র্যের ক্ষয়ক্ষতির সঠিক হিসাব নিরূপনের জন্য কক্সবাজার দক্ষিণ বন বিভাগের প্রস্তাবের আলোকে পরিবেশ, বন ও জলবায়ু পরিবর্তন মন্ত্রণালয় কর্তৃক ইতোমধ্যে ১০ (দশ) সদস্য বিশিষ্ট বিশেষজ্ঞ কমিটির রূপরেখা প্রণয়ন করা হয়েছে।



বন ভূমি ধ্বংস করে রোহিঙ্গা জনগোষ্ঠী কর্তৃক বসতি স্থাপন

রোহিঙ্গা কর্তৃক দখলকৃত বনভূমির পরিমাপের জন্য দখলকৃত এলাকা সরেজমিনে ঘরে সীমানা বরাবর বিভিন্ন স্থানে জি.পি.এস (GPS) waypoint (Latitude & Longitude) গ্রহণ করে Computer Software এর মাধ্যমে মোট ভূমির পরিমাপ হিসেব করা হয়েছে, যাতে বাস্তবের সাথে পরিমাপের সঠিকতার (Accuracy) কিছুটা তারতম্য হতে পারে। শরণার্থী, ত্রাণ ও প্রত্যাবাসন কমিশনার, কক্সবাজার কর্তৃক প্রদত্ত মায়ানমার হতে আগত আশ্রয়প্রার্থীদের মানবিক সহায়তা প্রদান কাজের হালনাগাদ অবস্থা বিষয়ক গত ১৭/০৬/২০২১ খ্রিঃ তারিখের প্রতিবেদনে উক্ত ভূমির পরিমাণ ৬,৫০০.০ একর (আনুমানিক ২৬.০ বর্গকিলোমিটার) হিসেবে প্রদর্শন করা হয়েছে। মাননীয় প্রধানমন্ত্রীর কার্যালয়ে গত ০৬/০৯/২০১৮ খ্রিঃ তারিখে মাননীয় প্রধানমন্ত্রীর মুখ্য সচিব মহোদয়ের সভাপতিত্বে অনুষ্ঠিত বলপূর্বক বাস্তবায়িত মায়ানমার নাগরিকদের মানবিক সহায়তা কার্যক্রম, তাদেরকে ভাসানচরে স্থানান্তর এবং ক্যাম্প এলাকার সার্বিক আইন-শৃঙ্খলা পরিস্থিতি পর্যালোচনা বিষয়ক সভার কার্যবিবরণীর ০২ নং ক্রমিকে বর্ণিত সিদ্ধান্তের অনুবৃত্তিক্রমে ২৯ অক্টোবর ২০১৮ খ্রিঃ তারিখে স্পষ্টীকরণে উল্লেখ করা হয় যে, ১. বাস্তবায়িত রোহিঙ্গা জনগোষ্ঠীর জন্য ভাসানচরে সকল সুবিধাদির সমন্বয়ে আবাসনের ব্যবস্থা করা হচ্ছে বিধায় কক্সবাজার জেলায় আর কোন ভূমি বরাদ্দ দেয়া যাবে না। ২. কক্সবাজার জেলায় বরাদ্দকৃত ৮,০০০ একর জমির বাইরে অতিরিক্ত কোন জমিতে রোহিঙ্গাদের বসবাসের জন্য কোন স্থাপনা নির্মাণ করা যাবে না। ৩. জেলা

প্রশাসক, কক্সবাজার এর তত্ত্বাবধান করবেন। মাননীয় প্রধানমন্ত্রীর কার্যালয়ে গত ০৬/০৯/২০১৮ তারিখে অনুষ্ঠিত সভায় গৃহিত সিদ্ধান্তের আলোকে গত ০৯/০৯/২০১৮ খ্রিঃ তারিখে জেলা প্রশাসক, কক্সবাজার এর কার্যালয়ে অনুষ্ঠিত জেলা আইন-শৃংখলা কমিটির সভায় রোহিঙ্গা ক্যাম্পের জন্য নির্ধারিত স্থান ব্যাতিত অন্যত্র রোহিঙ্গাদের অবস্থানের সুযোগ না দেয়ার সিদ্ধান্ত গৃহীত হয়। বিষয়টি উল্লেখ করে নতুন করে স্থাপনা নির্মাণ না করতে এবং বসতি স্থাপনের জন্য নতুন করে কোন বনভূমি ব্যবহার না করতে জেলা প্রশাসক, কক্সবাজার এবং শরণার্থী, ত্রাণ ও প্রত্যাবাসন কমিশনার, কক্সবাজারকে অনুরোধ করা হয়েছে।



বিভিন্ন সংস্থা কর্তৃক ক্যাম্প এলাকায় চলাচলের জন্য রাস্তা, ল্যাট্রিন, নলকূপ, গুদামঘর/ওয়ারহাউজ ইত্যাদি তৈরী করা

হচ্ছে। বন বিভাগের গেজেটভুক্ত সংরক্ষিত/রক্ষিত বনভূমিতে স্থাপনা তৈরী করা হলেও উক্ত বিষয়ে বন বিভাগকে অবহিত করা হচ্ছে না। শরণার্থী, ত্রাণ ও প্রত্যাবাসন কমিশনার, কক্সবাজার কর্তৃক মায়ানমার হতে আগত আশ্রয় প্রার্থীদের মানবিক সহায়তা প্রদান কাজের হালনাগাদ অবস্থা ও প্রাসঙ্গিক অন্যান্য তথ্যাবলী বিষয়ে ১৭/০৬/২০২১ খ্রিঃ তারিখে প্রদত্ত প্রতিবেদনে দেখা যায়, আশ্রয় গ্রহণকারীদের জন্য এ পর্যন্ত ৩৫টি ক্যাম্প (ভাসানচর ০১টি সহ) ও ৩২টি সিআইসি অফিস স্থাপন করা হয়েছে। এসব রোহিঙ্গা ক্যাম্প এলাকায় এ পর্যন্ত ২,১২,৬০৭ টি ঘর (অস্থায়ী শেল্টার), ৮,৯২৫টি নলকূপ, ৫৭,৩৬৩টি ল্যাট্রিন, ১৮,৫২২টি গোসলখানা, ২০ কিঃ মিঃ বিদ্যুৎ লাইন, ৫৯.৬০ কিঃ মিঃ সংযোগ সড়ক, ত্রাণ সংরক্ষণের জন্য ২০ টি অস্থায়ী গুদাম, ৭৯ কিঃমিঃ খাল সংস্কার করা হয়েছে। বাংলাদেশ সেনাবাহিনীর মাধ্যমে রোহিঙ্গা ক্যাম্পের চার পার্শ্বে ১৪৫ কিঃমিঃ কাঁটা তারের বেষ্টনী নির্মাণের লক্ষ্যমাত্রা নির্ধারণ করা হলেও বর্তমানে ৪২ কিঃমিঃ এর কাজ সম্পন্ন করা হয়েছে এবং ১০৩ কিঃমিঃ এর কাজ চলমান রয়েছে। উল্লেখ্য যে, স্থাপনার সংখ্যা প্রতিনিয়ত বাড়ছে। স্থাপনাসমূহ নির্মাণের জন্য IOM ও UNHCR সহ বিভিন্ন এনজিও, বাংলাদেশ সেনাবাহিনী, এলজিইডি, জনস্বাস্থ্য প্রকৌশল অধিদপ্তর এবং অন্যান্য সংস্থা কর্তৃক ব্যাপকহারে পাহাড় কর্তন করা হচ্ছে। এছাড়া, ক্যাম্প এলাকাতে বিদ্যমান বনভূমির পাহাড় কর্তন করে পুলিশ ক্যাম্প এবং বিভিন্ন সংস্থার অফিসের জন্য স্থায়ী অবকাঠামো তৈরী করা হচ্ছে।

কক্সবাজার জেলার বনভূমি Critically Endangered এশিয়ান হাতির বাসস্থান, বিচরণ ও প্রজনন ক্ষেত্র। IUCN (International Union for Conservation of Nature) এর ২০১৭ সালের প্রতিবেদন মোতাবেক বন বিভাগের নিয়ন্ত্রণাধীন এলাকায় প্রায় ৬৩টি এশিয়ান হাতি বাস করে। সেগুলো মূলতঃ উখিয়া, টেকনাফ এবং রামু (আংশিক) উপজেলার বনভূমিতে বসবাস করলেও পানেরছড়া-রাজারকূল এবং বালুখালী-ঘুনধুম করিডোর দিয়ে সেগুলো এ জেলা হতে বান্দরবান ও

বাংলাদেশে অবস্থানকারী এ সকল রোহিঙ্গা জনগোষ্ঠিকে বিভিন্ন ধরনের ত্রাণ সামগ্রী প্রদান করা হলেও রান্নার জন্য কোন জ্বালানীর ব্যবস্থা করা হয়নি। জ্বালানীর ব্যবস্থা না করায় জ্বালানী কাঠের জন্য রোহিঙ্গা ক্যাম্পের বাহিরে এ বন বিভাগের ১৮৩৭.০ একর (সৃজিত বন প্রধানত সামাজিক বনায়ন ৫৮০.০ একর ও প্রাকৃতিক বন ১২৫৭.০ একর) বাগানে অবৈধভাবে অনুপ্রবেশ করে গাছ কর্তন ও অধিকাংশ ক্ষেত্রে গাছ কর্তনের সাথে সাথে শিকড়ও উঠিয়ে ফেলা হয়েছে। সৃজিত বনের ক্ষেত্রে বনজসম্পদের আনুমানিক ক্ষতির পরিমাণ ৫৬,৬৩,২৩,৬০০/-টাকা ও প্রাকৃতিক বনের ক্ষেত্রে আনুমানিক ক্ষতি ৭৮,৪২,১৮,৪১৭/-টাকা; অর্থাৎ মোট ক্ষতি ১৩৫,০৫,৪২,০১৭/-টাকা প্রায়। Single Point Mooring (SPM) প্রকল্পের জন্য বিশেষজ্ঞ কমিটি কর্তৃক নির্ধারিত ক্ষয়ক্ষতির অনুরূপ হারে রোহিঙ্গা জনগোষ্ঠি দ্বারা জ্বালানী কাঠের জন্য ধ্বংস প্রাপ্ত ১৮৩৭.০ একর রক্ষিত ও সংরক্ষিত বনভূমির জীববৈচিত্র্যের ক্ষয়ক্ষতির পরিমাণ দাঁড়ায় ৪২০,০৫,৪৫,৬১০.৮৭ টাকা প্রায়। জ্বালানী কাঠ সংগ্রহের কারণে বনজন্ম ও জীববৈচিত্র্যের ক্ষয়ক্ষতির পরিমাণ দাঁড়ায় ৫৫৫,১০,৮৭,৬২৭.৮৭ টাকা। অর্থাৎ রোহিঙ্গা জনগোষ্ঠি কর্তৃক এ বন বিভাগের সংরক্ষিত/রক্ষিত বনভূমিতে বসতি স্থাপনের কারণে ধ্বংস প্রাপ্ত বনভূমি (৬,১৬৪.০২ একর) ও জ্বালানী কাঠ সংগ্রহের কারণে ক্ষতিগ্রস্ত বনভূমি (১৮৩৭.০ একর) এবং বনজসম্পদ ও জীববৈচিত্র্যের মোট ক্ষয়ক্ষতির পরিমাণ দাঁড়ায় ২৪২০,৬৭,৪৫,৪৬৩.৫০ টাকা (বনজন্ম ৫৯১,১৩,৪৫,৬৫৭.৬০ + জীববৈচিত্র্য ১৮২৯,৫৩,৯৯,৮০৫.৯০) প্রায়।

বিভিন্ন সংস্থা কর্তৃক ইতোমধ্যে ২,১২,৬০০টি পরিবারকে (Host Community সহ) বিকল্প জ্বালানী হিসেবে LPG (এলপিগজি) সরবরাহ করা হয়েছে (রোহিঙ্গা পরিবার ১,৯২,৫৪৭ এবং হোস্ট কমিউনিটি পরিবার ২০,০৫৩)। এছাড়া, কিছু কিছু স্থানে সীমিত সংখ্যক বায়োগ্যাস প্রকল্প স্থাপন করা হলেও উহা প্রয়োজনের তুলনায় অপ্রতুল। এক্ষেত্রে, সমস্ত রোহিঙ্গা ও ক্যাম্প সন্নিহিত স্থানীয় জনগোষ্ঠিকে বিকল্প জ্বালানী সরবরাহের সাথে সাথে দ্রুত বৃক্ষশূণ্য এলাকায় বনায়ন করা প্রয়োজন। বিভিন্ন আন্তর্জাতিক সংস্থা ও দেশী বিদেশী এনজিও কর্তৃক ক্যাম্পসমূহে বিগত ২০১৮ সালের বর্ষা মৌসুমে ২,০৪,৩০০টি ও ২০১৯ সালের



রোহিঙ্গা জনগোষ্ঠি কর্তৃক পার্শ্ববর্তী বনাঞ্চল হতে জ্বালানী সংগ্রহ



পাহাড় কেটে রাস্তা তৈরী

বর্ষা মৌসুমে ৫,০০,০০০টি বিবিধ প্রজাতির চারা রোপণ করা হয়েছে এবং ২০২০-২০২১ সনের বর্ষা মৌসুমে আরও ২,৫০,০০০টি বিবিধ প্রজাতির চারা স্থাপন করা হয়। অবশিষ্ট এলাকার রোহিঙ্গা জনগোষ্ঠীকে অন্যত্র স্থানান্তর অথবা প্রত্যাবাসন করা হলে খালি জায়গায় অগ্রাধিকার ভিত্তিতে বনায়নের কর্মসূচি গ্রহণ করা হবে। কক্সবাজার জেলার পাহাড়গুলো প্রধানতঃ Laterite and sandy ধরনের হওয়ায় মাটির কাঠিন্য/দৃঢ়তা খুবই কম। ফলে একটানা বেশি দিন উল্লেখযোগ্য

পরিমাণে বৃষ্টিপাত হলে পাহাড় ধ্বংসের সৃষ্টি হয়। ২০১৬ সালে বর্ষা মৌসুমেও পাহাড় ধ্বংসে কক্সবাজার জেলায় জানমালের ব্যাপক ক্ষতি হয়। এ জেলার উখিয়া ও টেকনাফ উপজেলায় বন বিভাগের পাহাড়ে পরিকল্পনাহীন রোহিঙ্গা বসতি তৈরী এবং রাস্তাসহ অন্যান্য স্থাপনা তৈরীর জন্য নির্বিচারে পাহাড় কর্তন এবং বৃক্ষাচ্ছাদন ধ্বংসের ফলে মাটি উন্মুক্ত হয়ে যাওয়ায় ভবিষ্যতে বর্ষায় রোহিঙ্গা বসতি এলাকায় পাহাড় ধ্বংসের প্রবল আশংকা তৈরী হয়েছে। ক্যাম্প এলাকাতো বিভিন্ন প্রতিষ্ঠান কর্তৃক বিক্ষিপ্তভাবে ঘাস ও গাছের চারা রোপণ করা হলেও সেটি খুব একটা পরিকল্পিত নয়। এ ক্ষেত্রে সমন্বিত উদ্যোগ নেয়া প্রয়োজন।

East Asia Australasian Flyway Partnership (EAAFP) Sites in Bangladesh

পরিযায়ী পাখি (Migratory Birds) প্রতি বছর যে ভৌগোলিক পথে (Geographical Route) এক দেশ থেকে অন্য দেশে বা এক অঞ্চল থেকে অন্য অঞ্চলে নিয়মিত ভাবে পরিভ্রমণ করে থাকে, তাকে উড়ন্ত পথ (Flyways) বলে। পৃথিবীতে ৯টি Flyway Site Network আছে; তন্মধ্যে বাংলাদেশ East Asian- Australasian Flyway (EAAF) ও Central Asian Flyway এর অন্তর্ভুক্ত। East Asian- Australasian Flyway Partnership ৬ নভেম্বর ২০০৬ খ্রিঃ তারিখে প্রতিষ্ঠিত হয়। EAAFP এর সদরদপ্তর দক্ষিণ কোরিয়ার ইনচিয়নে অবস্থিত। EAAFP এর বর্তমানে ৩৭ টি Partners রয়েছে; তন্মধ্যে ১৮ টি দেশ, ৬ টি Intergovernmental agencies, ১২ টি International NGOs এবং ১ টি International private enterprise অন্তর্ভুক্ত রয়েছে। এ Flyway Partnership-এর উদ্দেশ্য হলো সরকার, সাইট ম্যানেজার, বহুপাক্ষিক পরিবেশগত চুক্তি, প্রযুক্তি প্রতিষ্ঠান, জাতিসংঘের সংস্থা, উন্নয়ন সংস্থা, শিল্প ও সকল স্তরের সহ বিভিন্ন স্টেকহোল্ডারের মধ্যে সংলাপ, সহযোগিতা এবং প্রচারের জন্য একটি ফ্লাইওয়ে বিস্তৃত কার্ঠামো সরবরাহ করা এবং পরিযায়ী পাখি এবং এদের আবাসস্থল সংরক্ষণ করা।

EAAF এর আওতায় বাংলাদেশ, রাশিয়া, চীন, দক্ষিণ কোরিয়া, অস্ট্রেলিয়া, ইন্দোনেশিয়া, জাপান, ফিলিপিন্স, সিংঙ্গাপুর, থাইল্যান্ড, মালয়েশিয়া, মায়ানমার, পাপুয়া নিউগিনি, নিউজিল্যান্ড ও পূর্ব তিমুরসহ ২২ টি দেশে পরিযায়ী পাখির আনাগোনা করে থাকে। বিশেষজ্ঞদের মতে, EAAF উড়ন্ত পথে পৃথিবীর ২৫০ প্রজাতির প্রায় ৫০ মিলিয়ন পরিযায়ী পাখি (৫ কোটি) চলাচল করে থাকে। এর মধ্যে প্রায় ২৮টি পরিযায়ী পাখি আন্তর্জাতিকভাবে মহাবিপন্ন হিসেবে চিহ্নিত হয়েছে।

বাংলাদেশের প্রধান প্রধান পরিযায়ী পাখি

বাংলাদেশে প্রায় ২৫০-৩০০ প্রজাতির পরিযায়ী পাখি আছে। এর মধ্যে প্রায় ২১০টি শীতকালীন অতিথি পাখি এবং অবশিষ্ট পাখি বৎসরের অন্য সময়, বিশেষ করে গ্রীষ্মকালে আমাদের দেশে এসে থাকে। অতিথি পাখির মধ্যে উল্লেখযোগ্য হলো- রাজহাঁস, দাগী রাজহাঁস, রাজ সরালি, পাতি সরালি, মান্দারিন হাঁস, ঝুঁটি হাঁস, চকাচকি, লেঞ্জা হাঁস, খুন্তে হাঁস, বালি হাঁস, তিলি হাঁস, লালশির, নীলশির, গিরিয়া হাঁস, পিয়ং হাঁস, ভূতি হাঁস, স্মিউ হাঁস, পাতি মারগেঞ্জার, গুমচা, পাপিয়া, খঞ্জন, ফুটকি, সাহেলি, চ্যাগা, গুলিন্দা, সারস, ত্রিধিনি, মানিকজোড়, এশিয় শামোকখোল, নীলকণ্ঠ, বৈরী, চামচ ঠুটো বাটান ও বিভিন্ন জাতের সৈকত-পাখি (shore bird) ইত্যাদি।

বাংলাদেশে East Asia Australasian Flyway Sites

বাংলাদেশ ২৯ সেপ্টেম্বর, ২০১১ সালে EAAFP (East Asia Australasian Flyway Partnership) এর সদস্য হয়েছে এবং ৬ টি এলাকাকে (টাংগুয়ার হাওর, হাকালুকি হাওর, হাইল হাওর, সোনাদিয়া, নিব্বুম দ্বীপ ও গাঙুইয়ার চর) Flyway Site হিসেবে ঘোষণা করেছে।

গাঙগুইয়ার চর

গাঙগুইয়ার চরটি নোয়াখালী জেলার হাতিয়া উপজেলার পূর্ব মেঘনা মোহনায় জেগে উঠা একটি চর। এটি এখনো মানব বসতিহীন একটি বিচ্ছিন্ন কাদাচর। এই চরটির পূর্বে হাতিয়া উপজেলা, পশ্চিমে চট্টগ্রাম জেলার অন্তর্গত সন্দ্বীপ উপজেলা এবং উত্তরে জাহাজের চর অবস্থিত। ২০১৫-১৮ সালের একাধিক জরিপে গাঙগুইয়ার চর ও এর আশেপাশের চরাঞ্চলে প্রতিবছর সর্বমোট ৪২ প্রজাতির গড়ে ২৫,০০০টি পরিযায়ী পাখি পাওয়া গেছে। এ বিশাল সংখ্যাটি বৈশ্বিক পরিযায়ী পাখিদের একটি গুরুত্বপূর্ণ অংশ। এছাড়া এ চরের পার্শ্ববর্তী মেঘনা মোহনা বৈশ্বিকভাবে বিপদাপন্ন ডলফিন প্রজাতি ও ইলিশের জন্য বিশেষভাবে গুরুত্বপূর্ণ।



নিবুম দ্বীপ

নিবুম দ্বীপ বাংলাদেশের একটি ছোট দ্বীপ, যা গঙ্গা-ব্রহ্মপুত্র-মেঘনা নদী মোহনা মুখে অবস্থিত। এটি নোয়াখালী জেলার হাতিয়া উপজেলার অন্তর্গত। আয়তন প্রায় ৩৬৯৭০.৪৫৪ হেক্টর। ১৯৪০ এর দশকে এই দ্বীপটি বঙ্গোপসাগর হতে জেগে উঠতে শুরু করে। নিবুম দ্বীপের পূর্ব নাম ছিলো চর-ওসমান। তবে, এটি ইছামতীর চর নামেও পরিচিত ছিল। ২০১৩ সালে দ্বীপটি জাহাজমারা ইউনিয়ন হতে পৃথক হয়ে স্বতন্ত্র ইউনিয়নের মর্যাদা লাভ করে।



শীতকালে, বিশেষত ডিসেম্বর থেকে ফেব্রুয়ারী মাস পর্যন্ত প্রায় ১০,০০০-২০,০০০টি পরিযায়ী পাখির আনাগোনা থাকে এ এলাকা জুড়ে। পরিযায়ী

পাখিদের মধ্যে বিশ্বব্যাপী বিরল ও বিপন্ন কিছু প্রজাতির পাখিরও দেখা মেলে এখানে। বিশ্বব্যাপী অতি বিরল ও মহাবিপন্ন চামচুঁটো বাটান (*Calidris pygmaea*) এদের মধ্যে অন্যতম।

সোনাদিয়া

সোনাদিয়া দেশের সর্বদক্ষিণের জেলা কক্সবাজারের উত্তর-পশ্চিমে এবং উপকূলীয় দ্বীপ মহেশখালীর কুতুবজং ইউনিয়নের অন্তর্গত বিচ্ছিন্ন একটি দ্বীপ। আয়তন প্রায় ৪৯২৪ হেক্টর। পূর্ব-পশ্চিমে লম্বালম্বিভাবে বঙ্গোপসাগরের উপকূল সংলগ্ন এ দ্বীপটি নানা ধরনের প্রাকৃতিক সম্পদে ভরপুর। সোনাদিয়া কক্সবাজার-টেকনাফ সড়ক থেকে প্রায় ২.৬



কিলোমিটার দূরে অবস্থিত এবং সমুদ্র সৈকতে এর দৈর্ঘ্য ১৯.২০ কিলোমিটার। কক্সবাজার থেকে উত্তর-পশ্চিমে এবং মহেশখালী দ্বীপের দক্ষিণ থেকে ৭ কিলোমিটার দূরে সাগরের বুকে সোনাদিয়া দ্বীপটির অবস্থান।

সোনাদিয়ার প্যারাবনে প্রায় ১৯ প্রজাতির স্তন্যপায়ী প্রাণী, ৮ প্রজাতির সরীসৃপ, ৪ প্রজাতির উভচর প্রাণী এবং ২৭ প্রজাতির পাখির দেখা মেলে। জীববৈচিত্র্য সমৃদ্ধ এ দ্বীপেই দেখা মেলে বিশ্বব্যাপী মহাবিপন্ন পাখি চামচঠুটো-বাটান। শীতকালে এই দ্বীপে মহাবিপন্ন এ পাখি সবচেয়ে বেশি পরিমাণে দেখা যায়। কেবল সামুদ্রিক বা পরিযায়ী পাখিই নয়, দ্বীপের উপকূল ১৯ প্রজাতির চিংড়ি, লবস্টার, লাল কাঁকড়া, ১৪ প্রজাতির শামুক, ঝিনুক, ডলফিন আর নানা প্রজাতির কচ্ছপের আবাসস্থল। দ্বীপের সমুদ্র উপকূলে শীতকালে হাজার মাইল সমুদ্র পাড়ি দিয়ে ডিম পাড়তে আসে অসংখ্য মা-কচ্ছপ।

টান্জুয়ার হাওর

টান্জুয়ার হাওর বাংলাদেশের বৃহত্তম জলমহালগুলোর অন্যতম। বাংলাদেশের উত্তর-পূর্ব প্রান্তে সুনামগঞ্জ জেলার ধর্মপাশা এবং তাহিরপুর উপজেলাস্থিত জীববৈচিত্র্য সমৃদ্ধ মিঠা পানির এ হাওর বাংলাদেশের ২য় রামসার এলাকা। স্থানীয় লোকজনের কাছে এ হাওরটি নয়কুড়ি কান্দার ছয়কুড়ি বিল নামে পরিচিত। বর্তমানে এ হাওরের মোট জলমহাল সংখ্যা ৫১টি এবং মোট আয়তন ৬,৯১২.২০ একর। তবে, হিজল-করচ বন ও নলখাগড়া বনসহ বর্ষাকালে সমগ্র হাওরটির আয়তন দাঁড়ায় প্রায় ২০,০০০ একর। প্রকৃতির অকৃপণ দানে সমৃদ্ধ এ হাওর পাখি, মাছ এবং অন্যান্য জলজ প্রাণীর এক বিশাল অভয়াশ্রম।

টান্জুয়ার হাওরে ১৬৭ প্রজাতির পাখি পাওয়া যায়; যার মোট সংখ্যা ৬৫ হাজারের বেশি। জলচর পাখি জরিপের গণনা অনুযায়ী, প্রতি বছর শুধু শীতকালেই পৃথিবীর বিভিন্ন শীতপ্রধান দেশ থেকে প্রায় ৮৪ প্রজাতির পরিযায়ী পাখিরা এ হাওরকে নিরাপদ আশ্রয়স্থল হিসেবে বেছে নেয়। ২০২০ সালে পরিচালিত জলচর পাখিগুমারী অনুযায়ী, ৩৫ প্রজাতির ৫১,৩৬৮টি জলচর পাখি পাওয়া গেছে। এ হাওরে বিশ্বব্যাপী বিপন্ন ও বিপদাপন্ন পাখি প্রজাতির মধ্যে বৈকাল-তিলিহাঁস (*Sibirionetta formosa*) এর দেখা মেলে। বাংলাদেশে ‘মহাবিপন্ন’ এবং বিশ্বে ‘বিপন্ন’ প্রাণী হিসেবে বিবেচিত পালাসি-কুরাঈগলের (*Haliaeetus leucoryphus*) দেখা মেলে এ হাওরের হিজল-করচ গাছে। এরা শীত মৌসুমে এদেশে আসে এবং প্রজনন শেষে বর্ষা মৌসুমে উত্তর মেরুর দিকে চলে যায়। ভারত, নেপাল, ভুটান, চীন, সাইবেরিয়ার দক্ষিণাঞ্চলসহ দক্ষিণ ও দক্ষিণ-পূর্ব এশিয়ায় এদের বৈশ্বিক বিস্তৃতি রয়েছে।



হাকালুকি হাওর

হাকালুকি হাওর বাংলাদেশের সর্ববৃহৎ হাওর। এটি দেশের অন্যতম বৃহৎ মিঠাপানির জলাভূমি। এর আয়তন ১৮,১১৫ হেক্টর; তন্মধ্যে শুধুমাত্র বিলের আয়তন ৪,৪০০ হেক্টর। এটি মৌলভীবাজার জেলার বড়লেখা (৪০%), কুলাউড়া (৩০%); সিলেট জেলার ফেঞ্চুগঞ্জ (১৫%), গোলাপগঞ্জ (১০%) ও বিয়ানীবাজার (৫%) জুড়ে বিস্তৃত। ভূতাত্ত্বিকভাবে এর অবস্থান উত্তরে ভারতের মেঘালয় পাহাড় এবং পূর্বে ত্রিপুরা পাহাড়ের পাদদেশে। হাকালুকি হাওরের বিশাল জলরাশির মূল প্রবাহ হলো জুরী এবং পানাই নদী। হাকালুকি হাওরে ছোট, বড় ও মাঝারি আকারের প্রায় ২৩৮টি বিল রয়েছে।

প্রায় সারাবছরই বিল গুলোতে পানি থাকে। শীতকালে এসব বিলকে ঘিরে পরিযায়ী পাখিদের বিচরণে মুখর হয়ে উঠে গোটা এলাকা। ২০২০ সালের ফেব্রুয়ারী মাসে পরিচালিত জলচর পাখি গুমারী অনুযায়ী, ৫৩ প্রজাতির মোট ৪০,১২৬টি জলচর পাখি পাওয়া গেছে। এ হাওরে বিশ্বব্যাপী মহাবিপন্ন বেয়ারের-ভূতিহাঁস (*Aythya baeri*), সংকটাপন্ন পাতি-ভূতিহাঁস (*Aythya ferina*), প্রায়-সংকটাপন্ন মরচেরং-ভূতিহাঁস (*Netta rufina*) ইত্যাদি পাখি প্রজাতির দেখা মেলে।



হাইল হাওর

হাইল হাওর বাংলাদেশের বৃহত্তর সিলেটের মৌলভীবাজার ও হবিগঞ্জ জেলার কিয়দাংশে অবস্থিত একটি বৃহদায়তন জলাভূমি। এতে রয়েছে ১৪টি বিল এবং পানি নিষ্কাশনের ১৩টি নালা। এই হাওরটির মোট আয়তন ১০হাজার হেক্টর। বাইস্কা বিলে প্রতিবছর শীত মৌসুমে প্রচুর পরিযায়ী পাখির সমাগম ঘটে। ২০১১ সালে নতুন ৪টি পরিযায়ী পাখির দেখা



মিলেছে এ বিলের চারপাশের বনে; সেগুলো হলোঃ বড়টুটি-নলফুটকি, উদয়ী-নলফুটকি, বৈকাল-ঝাড়ফুটকি ও সাইক্লের-ফুটকি।

বন সম্পর্কিত কিছু গুরুত্বপূর্ণ তথ্য

১. পৃথিবীতে বনভূমির পরিমাণ ৩১%।
২. পৃথিবীতে সর্বোচ্চ ৯৮% বনভূমির দেশ ফ্রেঞ্চ গুয়ানা।
৩. রাশিয়া, ব্রাজিল, কানাডা, আমেরিকা, চীন, অস্ট্রেলিয়া, কঙ্গো, ইন্দোনেশিয়া, পেরু এবং ভারতে পৃথিবীর ৬৬% বন আছে।
৪. কাতার, জিব্রালটার, হলি সি, মোনাকা, সান ম্যারিনো, সেইন্ট ব্যাথেলিমাই, ফকল্যান্ড, আইল্যান্ড ও সালবার্ড এন্ড জেন মেইন আইল্যান্ডে কোন বনভূমি নাই।
৫. প্রতিদিন ২০০ বর্গ কিলোমিটার বন হারিয়ে যাচ্ছে।
৬. প্রায় ১.৬ বিলিয়ন মানুষ জীবন-জীবিকার জন্য বনের উপর নির্ভরশীল।
৭. পৃথিবীতে ৩০০ মিলিয়নের অধিক লোক বনে বাস করে।
৮. পৃথিবীর স্থলভাগের জীববৈচিত্র্যের ৮০% বন ধারণ করে।
৯. পৃথিবীর মোট অক্সিজেনের ৪০% এর বেশি Tropical Rainforest থেকে উৎপন্ন হয়।
১০. পৃথিবীর মোট গ্রীন হাউস গ্যাসের ১৭.৪% ডিফরেস্টেশন এবং ফরেস্ট ডিগ্রেডেশন থেকে নির্গত হয়।

১১. পৃথিবীতে বনের বায়োমাসে (Bio-mass) ২৮৯ গিগাটন কার্বন মজুদ আছে।
১২. বাংলাদেশের ভূ-উপরিস্থ বায়োমাসের (Bio-mass) মোট পরিমাণ ৮,৪৬,০০০ হাজার টন।
১৩. বাংলাদেশে হেক্টর প্রতি ভূ-উপরিস্থ বায়োমাসের (Bio-mass) পরিমাণ ৫৭ টন।
১৪. বাংলাদেশের বনে ভূ-উপরিস্থ বায়োমাসের (Bio-mass) পরিমাণ ২,৭৮,০০০ হাজার টন।
১৫. বাংলাদেশের বনে হেক্টর প্রতি ভূ-উপরিস্থ বায়োমাসের (Bio-mass) পরিমাণ ১৯৩ টন।
১৬. বাংলাদেশের ভূ-উপরিস্থ মোট কার্বনের পরিমাণ ৪,২৩,০০০ হাজার টন।
১৭. বাংলাদেশের ভূ-উপরিস্থ হেক্টর প্রতি কার্বনের পরিমাণ ২৯ টন।
১৮. বাংলাদেশের বনে ভূ-উপরিস্থ মোট কার্বনের পরিমাণ ১৩৯,০০০ হাজার টন।
১৯. বাংলাদেশের বনে ভূ-উপরিস্থ হেক্টর প্রতি কার্বনের পরিমাণ ৯৬ টন।

তথ্যসূত্র: i. National Forest Inventory 2016-2019
ii. FAO, UN-REED, UNDP, UNEP & IUCN website
iii. বন অধিদপ্তরের সংশ্লিষ্ট ইউনিটসমূহ

বর্তমান সরকারের গৃহীত কার্যক্রমের প্রেক্ষিতে বন অধিদপ্তরের অর্জন

দেশের বনজ সম্পদের ঘাটতি পূরণ, বন্যপ্রাণী ও জীববৈচিত্র্য সংরক্ষণ এবং সামাজিক বনায়নের মাধ্যমে গ্রামীণ জনগণের আর্থ-সামাজিক অবস্থার উন্নয়নের লক্ষ্যে বন অধিদপ্তর ইতোমধ্যেই ব্যাপক কর্মসূচী হাতে নিয়েছে। এছাড়াও বন ব্যবস্থাপনায় প্রযুক্তিগত উন্নয়ন সাধনের জন্য সকল পর্যায়ে প্রশিক্ষণ প্রদানসহ কতিপয় কার্যক্রম ডিজিটাইজড করণ এ কর্মসূচী সমূহের অন্তর্ভুক্ত। বন এলাকার পাশাপাশি গ্রামীণ এলাকায় সরকারী এবং ব্যক্তি মালিকানাধীন পতিত ও প্রান্তিক ভূমিতে জনগণের অংশ গ্রহণের মাধ্যমে ব্যাপকহারে বৃক্ষরোপণ করে বনজ সম্পদ বৃদ্ধিকরণের উদ্যোগ গ্রহণ করা হয়েছে। অধিকন্তু, জনগণের মধ্যে বৃক্ষরোপণ ও পরিচর্যার বিষয়ে গণসচেতনতা সৃষ্টির লক্ষ্যে বিশেষ প্রচেষ্টা অব্যাহত রয়েছে।



রাস্তার ধারে সামাজিক বনায়ন



স্কুলের ছাত্র-ছাত্রীদের অংশগ্রহণে প্রাতিষ্ঠানিক বনায়ন



সুন্দরবনে SMART Patrolling

বন্যপ্রাণী ও বন্যপ্রাণী অপরাধ সম্পর্কিত কতিপয় প্রয়োজনীয় তথ্য

- বন্যপ্রাণী (সংরক্ষণ ও নিরাপত্তা) আইন ২০১২-এ বর্ণিত বন্যপ্রাণীর সংজ্ঞানুযায়ী আমাদের চারপাশে বিদ্যমান বিভিন্ন প্রকার প্রাণী, যেমনঃ শিয়াল, বেজি, খেঁকশিয়াল, টিয়া, চড়ুই, শালিক, মুনিয়া, ব্যাঙ, কচ্ছপ ও সাপ বন্যপ্রাণীর অন্তর্ভুক্ত।
- বিদেশী বা কেইজবার্ড (যেমন-বারজিগর, লাভবার্ড, ম্যাকাও, আফ্রিকান গ্রে-প্যারট ইত্যাদি) প্রজাতির পাখি সৌখিনভাবে যে কেউ বাসায় পুষতে পারেন। তবে, দেশীয় কোন প্রজাতির পাখি নয়।
- CITES অর্থ হল Convention on International Trade in Endangered Species of Wild Fauna and Flora এটি একটি আন্তর্জাতিক কনভেনশন, যা সারাবিশ্বব্যাপী বন্যপ্রাণীর বৈধ ব্যবসা ও বিনিময় নিয়ন্ত্রণ করে থাকে।
- বন্যপ্রাণী (সংরক্ষণ ও নিরাপত্তা) আইন ২০১২ অনুযায়ী দেশীয় প্রজাতির পাখিসহ সকল বন্যপ্রাণী, বন্যপ্রাণীর কোন অংশ, মাংস, ট্রফি অথবা উহা হতে উৎপন্ন দ্রব্য ক্রয়-বিক্রয় বা আমদানী-রপ্তানী আইনত দণ্ডনীয় অপরাধ। বিধায় দেশীয় প্রজাতির পাখির কোন প্রকার ব্যবসা পরিচালনা করা যাবেনা এবং খাঁচায় আটকে রাখা যাবেনা।
- বন্যপ্রাণী (সংরক্ষণ ও নিরাপত্তা) আইন ২০১২ অনুযায়ী লাইসেন্স বা পারমিট ব্যতীত যে কোন প্রজাতির সাপ বা বানর ধরা, নিজ হেফাজতে আবদ্ধ অবস্থায় দখলে রাখা বা ব্যবসার উদ্দেশ্যে প্রদর্শন করা আইনত দণ্ডনীয় অপরাধ। সে কারণেই ব্যবসায়িক উদ্দেশ্যে সাপ ও বানরের খেলা প্রদর্শন করা যাবেনা।
- বন্যপ্রাণী (সংরক্ষণ ও নিরাপত্তা) আইন ২০১২ এর বিধান মতে, লাইসেন্স অথবা পারমিট প্রাপ্ত কোন ব্যক্তি ব্যতীত অন্য কাহারো নিকট হইতে কোন বন্যপ্রাণী, বন্যপ্রাণীর কোন অংশ, মাংস, ট্রফি অথবা উহা হতে উৎপন্ন দ্রব্যাদি ক্রয়-বিক্রয় বা আমদানী-রপ্তানী বা নিজ হেফাজতে আবদ্ধ অবস্থায় দখলে রাখা বা ব্যবসার উদ্দেশ্যে প্রদর্শন করা আইনত দণ্ডনীয় অপরাধ। সঙ্গতঃ কারণেই কবিরাজগণ বন্যপ্রাণীর অংশ-বিশেষ নিয়ে ক্যানভাস করে রাস্তা-ঘাটে ঔষধ বিক্রয় করতে পারবেন না।
- বন্যপ্রাণী (সংরক্ষণ ও নিরাপত্তা) আইন ২০১২ এবং সংশ্লিষ্ট বিধিমালায় বিধান মতে, চিত্রা হরিণ (Spotted Deer) ও এশীয় হাতি (Asiatic Elephant) এবং লবনাক্ত/লোনা পানির কুমির ও ময়ূর লালন-পালন করা যায়।
- বন সংরক্ষকের কার্যালয়, বন্যপ্রাণী ও প্রকৃতি সংরক্ষণ অঞ্চল, বন ভবন, আগারগাঁও, ঢাকা হতে বন্যপ্রাণী বিষয়ে যে কোন গবেষণার অনুমতি গ্রহণ করা যায়। এছাড়াও হরিণ ও হাতি লালন-পালনের জন্য লাইসেন্স এবং বিদেশী পোষা পাখি লালন-পালন ও আমদানী সংক্রান্ত NOC (No Objection Certificate) প্রদান করা হয়ে থাকে।
- হাতির দ্বারা রাস্তা-ঘাটে, হাট-বাজার বা দোকান ইত্যাদি স্থানে চাঁদাবাজী ও ভয়ভীতি প্রদর্শন করা শাস্তিযোগ্য অপরাধ। এরূপ ঘটনা দেখামাত্র নিকটস্থ থানাকে অবহিত করার জন্য অনুরোধ করা যাচ্ছে।
- আপনার একটি ফোনকল একটি বন্যপ্রাণী বা পাখির জীবন রক্ষা করতে পারে। বন্যপ্রাণী অপরাধ সংক্রান্ত কোন ঘটনা দেখা বা জানামাত্র বন্যপ্রাণী অপরাধ দমন ইউনিট (WCCU) এর হট নাম্বার (০১৯৯৯০০০৯৫)-এ কল করার জন্য অনুরোধ জানানো হলো।

প্রকাশকাল : জুন ২০২২ খ্রিঃ।

সম্পাদনা : তথ্যসেল, বন অধিদপ্তর।

বন ও বন্যপ্রাণী প্রকৃতির আধার
রক্ষার দায়িত্ব আপনার, আমার, সবার



বৃক্ষপ্রাণে প্রকৃতি - প্রতিবেশ
আগামী প্রজন্মের টেকসই বাংলাদেশ



বন অধিদপ্তর
পরিবেশ, বন ও জলবায়ু পরিবর্তন মন্ত্রণালয়